

Sirtuxrxixrzuaxl Sul

1

¹⁻² Tixrafeiloxr vaervaerpor, ngo ni leil sul vaexr gger beil ber gga mel, Yisu miar bei beil cirdae a yar leil merlabbor zi deix zzezze vaexr ho a. Yar gol dae seir car a, azo lerler bei goxr, ca leil azo lerler mul gger goxr, halae yar Arbosobo ddei Xiu ddei leil koxl dae a, yar tiur teixlleil a miardal dae ca mel leil azo lerler miardal goxr maelmaerjia lei vaexr deix dae a. ³ Yar si a, gol du xixl lei ho a, middurbbor licei ni hher a, yar miardal dae ca mel leil hormo boxl nei mia lol. Yoxl cirza-hanga baxlfaxr sser a, yaa leil yar gol du xixl lei ho a saexl lol. Halae yaa leil Arbosobo ddei goxr ddei biar gger. ⁴ Yisu yaa dax cirgo a zzo zzor dae car a, yaa leil miardal a bbeix: “Nia Yiluxlsaler zzi gga ddux nr ddo, ngabbor leil xia dae a, yar bbeix har zaxr goxr ddei nia leil gger lol. Eil ddei mel nia ngo bbeix ggie bbejjiur goxr a. ⁵ Yuehal ajjix sser a, ca leil sexlsir gger. Nael zeixleixr nr ni sael goxr a mel, Arbosobo yar ddei Xiu ddei sser a, nia leil sexlsir gger nia.”

Yisu Leil Merlabbor Zi Deix

⁶ Yaa Yisu dax cirgo a hher dax dae car a, Yisu leil biex a bbeix: “Seirpor, ni niul Yoxrtaexl su ca mel leil Yirsaexllixl goxrjia ddei leil guaxr xixl lol du a nga nga?”

⁷ Yisu yaa leil bbeix: “Ngabbor arddolcar, arddol cir ni, arsaе bei mel yar lozza; nia saexl nr var. ⁸ Nael Arbosobo ddei Xiu ddei nia nixmox zzar hher ji dae a mel, nia dder yarzi ddo var, yel nia Yiluxlsaler zzi, Yoxrtaexl mermi nei Sarmarlixlyal mermi, halae middurbbor zzarvul-zzarmae ca mel leil ngo arsaе lerler bei goxr, azo lerler ddar bbeix goxr mel bbeix gger ssi nia.”

⁹ Yisu ddar eil mel bbeix jjia a, yar dax mae dae su ca mel halae yar leil i doxr dae seir, yar leil dder merlabbor zi deix si a. Zico ar co a yar leil jiul gex dae a, yaa dder yar leil mia nr xie a. ¹⁰ Yisu merlabbor ddeix car a, yaa halae meix lei nr cix merlabbor i doxr dae a neixleixrsael dder pia piulpiu veixr dae ca nnel a yaa dax ngier dae a bbeix: ¹¹ “Jialixllixl mermi su ca mel, nia arsaenga a ngier dae a, merlabbor i doxr dae leir? Nia Yisu leil arsae merlabbor zi deix si mia a mel, arddolcar a yar halae arsae jjixr lei nia.”

Yoxrdaxl Dirtu Ca Tiur

¹² Giedae Yisu miardal dae ca mel dder Saercor worga hal ga leil cirdae a, Yiluxlsaler zzi gga jjixr a. Saercor worga hal ga mel zzi ddei dax giex vi-nr-mir.^a ¹³ Yaa zzi gga ddir ci a dder yaa hher ggie xi gga lebbor ddeix a. Birdaexr, Yuehal, Yargel, Adaexrlixl, Feilixl, Domar, Badoloxrmaer, Martaexl, Yallexlfei ddei ssor Yargel, Loxrmar goxrjia leil dir su Ximexr, nei Yargel ddei ssor Yoxrdaxl halmaex gga hher dae. ¹⁴ Capor eil mel nei ssormaer nneltsael, halae Yisu yarma Marlixlyal nei Yisu ddei nimar mel, yaa maelmaerjjia halmaex lei a cirgo a hher dae a, nixmox ddei ciryoxr a xiar dae a, arddolcar a lei Arbosobo dax ddar biar doxr.

¹⁵ Halcar, Yisu leil ddarzzi su ca cirxiu nrzeimo cirgo a hher dae. Birdaexr yaa agala gga ngier du lei a bbeix: ¹⁶ “Arzzi-nimar arzzi-nimo mel, Arbosobo Ddei Sul ber gga Yoxrdaxl arsae lerler nga var vaexr dae mel eilboxl yarzi loxr a. Eil mel mel arddol-cirsil dder Arbosobo ddei Xiu ddei Daxlweixl leil bbeix lol goxr a. Yoxrdaxl mel dder ca mel leil hier dae a, Yisu leil ssu lei su ddei nga a. ¹⁷ Halleix mel, yar lei niul dax cirgo a miar bei, yar lei Yisu miardal dae ca mel gga ar ddei a.”

^a**1:12** *Saercor worga hal ga mel zzi ddei dax giex vi-nr-mir* Wornol nixixl hal cir ni ssi meirne jjiumo giex dae, hherdder yil golir sael a zza.

¹⁸ Yar nr seir bei a zex si lei zzirbae ddei mi ar bbae vae wo a. Yar halmaex gga zilgordae de zei a, xilbe lei bbeixzil a, vu lei yox teixl lei a.

¹⁹ Yiluxlsaler zzi gga ca mel eil mel bbejjiur a dder yaa ddei ddar mel sser a, mi eil bbae leil “Yalgexrdaxlmar” mi gger. Yilsi mel dder sirnilni zza mi.

²⁰ “Sipi Sul hal ber leil vaexr dae a bbeix:

‘Yar hher ggie mel mipaerbbae loxr lol nia,
halmaex gga ca goxr su nr zza lol nia.’^b

Yoxl bbeix:

‘Kebal ca ar ddei tiur a, yar ddei dirtu bei lol nia.’^c

²¹⁻²² Yel Birdaexr yoxl bbeix: “Niul, niul dax cirgo a ca dae, hherdder Yuehal ca leil sexlsir gger cirdae a Seirpor Yisu leil merlabbor zi deix si zzezze lei niul dax cirgo a hher dae ca ar ddei tiur box nia. Yar niul dax cirgo a Yisu si a yoxl gol du xixl lei a ca leil biar gger ssi nia.”

²³ Yel yaa dder ca nnel tiur teixl lei a: hherdder Yuesaexl nei Martixryal. Yuesaexl leil mel, Basarba halae Yoxrsixldu lei mi. ²⁴⁻²⁵ Ca mel dder Arbosobo dax ddar biar a bbeix: “Seirpor, ni ca cirddeir-hanga ddei nixmox lei saexl. Yoxrdaxl mel, yar miar bei dae mel nr bei; yar, yar ssi mibbe ggie ssi jixr a. Ca eil nnel arddol ddei saelnei ni tiur har dae a, Yoxrdaxl ddei dirtu Yisu miardal dae ca bei lol, ni ngua leil bbeix gger la?” ²⁶ Yaa dder arleixr nijiu a, Martixryal leil nijiu gex dae a. Yar dder Yisu miardal dae ca ceidilmo dax cirgo a bei dax dae a.

^b1:20 Sipi Sul 69:25 leil vaexr dae.

^c1:20 Sipi Sul 109:8 leil vaexr dae.

2

Arbosobo Ddei Xiu Ddei Zei Lei

¹ Wurxuexr jiax^d hal cir ni ci a, yaa maelmaerjia cirgo a hher dae.

² Neixleixrsael, merlabbor qiurte ar ddei lei a; hherdder mersi vaer ar pu jia gel sael a nga. Yaa hher dae xi giex lorbba gga lei bbejjiur ddo. ³ Yoxl lo sael a adoxlle ar mel a bbe kae a, ca cirddeir-hanga leil ddeix ggie mia a. ⁴ Arbosobo ddei Xiu ddei dder yaa cirddeir-hanga nixmox zzar hher ji dae a, yaa leil kebal su ddei ddar biar du lei lol.

⁵ Halcar a mel, mer woxrke cirgoxr-hanga gga lei Arbosobo leil ddarzzi Yoxrtaexl su ca mel lei Yiluxlsaler zzi gga hher dae. ⁶ Yaa qiurte eil ddei leil bbejjiur a qie, ca cirke a cirgo a pex mal lei a. Yaa Yisu dax mae dae su ca mel ca cirddeir-hanga ddei ddar mel te ggie bbejjiur a, xiar lei xiar nr ci. ⁷ Yaa murgur zildu a bbeix: “Ddar biar su ca eil mel doxl nr nga Jialixllixl mermi su ca a zzarmar? ⁸ Yaa giel arsae niul cirddeir-hanga ddei ddar mel biar var leir? ⁹ Niul Paltixryal mermi su ca, Mirdiryal mermi su ca, Yirlaxr mermi su ca nei Meirsorbuxldaxrmiryal mermi su ca, Yoxrtaexl mermi su ca, Jiapaxldojia mermi su ca, Berdu mermi su ca, Yalxilyal mermi su ca, ¹⁰ Fuxrliurjia mermi su ca, Paxrfeililyal mermi su ca, Aezixr goxrjia su ca lei zza. Halae Lilbiryal goxrjia gga Gurlixlnaexl

^d2:1 *Wurxuexr jiax* Arbosobo Yoxrtaexl su ca mel leil **ssu** cirke se wo lol a yaa Arbosobo leil nawo. Ngorcei ni giedae, Arbosobo Yoxrtaexl su ca mel leil **so** cirke se wo lol a yaa Wurxuexr jiax goxr a Arbosobo leil nawo. Lixlweixljil Sul 23 leil biar dae. Yoxrtaexl su **ssu** se wo a Arbosobo leil nawo hal cir ni hherdder Yisu Zidu gol du xixl lei hal cir ni nga a. Yoxrtaexl su **so** se wo a Arbosobo leil nawo hal cir ni hherdder Arbosobo yar ddei cassor-worssor mel leil yar ddei Xiu gger hal cir ni nga a.

zzi dax naer dae su ca, Loxrmar zzi gga ngol hher dae hherdder Yoxrtaexl su ca nei Yoxrtaexl su loxr ho ca lei zza. ¹¹ Kellirtexl dal su nei Alaboxr su ca lei zza. Niul cirddeir-hanga lei arsae yaa niul ddei ddar mel biar a, Arbosobo ddoddomo bei dae mel biar ggie bbejjiur leir?” ¹² Ca mel xiar lei xiar nr ci, murgur zildu a, zzicarzzi dax bbeix: “Arsae eine nga var leir?” Pentecost map|Pentecost YCL.tif|span|Acts 2:9-11|SIL|

¹³ Nael ca ar mel a yaa leil vaessi a bbeix: “Yaa puxrto zzibbaer ddayixr a nga arnar a mei!”

Birdaexr Ca Mel Leil Arbosobo Ddei Ddar Biar Gger

¹⁴ Birdaexr dder kebal Yisu miardal dae ca ceidilmo dax cirgo a ngier dae a worcixl-worni bbeix: “Yoxrtaexl su ca nei Yiluxlsaler zzi gga hher dae ca maelmaerjgia, arsaenga a eine nga mel nia saexl nia. Nia ngo ddar bbeix dae mel leil zabbar seilseir a noni dae nia. ¹⁵ Nia zzir dae a ca eil mel zzibbaer ddayixr a ngo? Nr nga mar! Eilcar eilneixrnehe 9:00 a ngaseir. ¹⁶ Eil ddei mel hherdder halleix xiezi Yue'aer bbeix dae mel sael a nga:

¹⁷ ‘Arbosobo bbeix: “Nixixl maelele ci a mel, ngo, ngo ddei Xiu ddei leil miardal si lei a ca cirddeir-hanga dax hher ji dae lol nia.

Nia ddei ssormine mel, arddolcar a arsae lerler nga var bbeix zaxr nia;

nia ddei caleixlssor mel meixcir mia nia, nia ddei camar mel yixrmeixka nia.

¹⁸ Hane ci a, ngo, ngo ddei Xiu ddei ngo leil visser su capor nei ssormaer mel dax hher ji dae lol nia, yel yaa arddolcar a arsae lerler nga var bbeix zaxr nia.

¹⁹ Nia halae merlabbor gga ngo murgurgurmo bei dae mel mia nia,

middurbbor lei ngo ddoddomo bei dae mel mia nia;
sirnilni lei zza, adoxl lei zza, alker lei zza.

²⁰ Merni taex lei bbe nr le neixmar loxr nia,
xiubbo taex lei sirnilni sael a ni nia.

Eil zzu maelmaerjjia lei Seirpor ddoddomo bbobbolbbo lei hal cir ni
xilmeir leil nga nia.

²¹ Hane ci a mel, Seirpor ddei leil qiuxr su maelmaerjjia mel,
Seirpor dder yaa leil jiuxl var.” ’ ”^e

²² Birdaexr yoxl bbeix: “Yirsaexllixl su ca mel nia ngo ddar bbeix dae
mel noni dae: Naxrsalexl kax gga su ca Yisu, nia dax cirgo a hher dae
car a, Arbosobo yar leil ddoddomo murgurgurmo ar mel bei lol a, yar mel
Arbosobo dax lei ar ddei a nia leil saexl lol. Eil mel mel nia armael saexl.

²³ Arbosobo mel azo lei saexl zaxr dae. Yar yar dixl har dae mel dax zox
dae a, Yisu leil nia leil jia gger a. Nia nei Lixlfaxr nr zza su ca mel Yisu
leil sixrxizljiaxl ddei leil diexr zil gger a. ²⁴ Yijie gga lei Yisu leil zzux gex
du lei nr xie. Yel Arbosobo yar leil halmaex gga goxr sol nr doxr dae lol,
yar leil gol du xixl lei lol a. ²⁵ Daxlweixl Sipi Sul hal ber leil Yisu leil biar
dae a bbeix:

‘Ngo arddolcar lei Seirpor ngo dax hher dax dae ggje mia;
yar ngo yo piar a gga hher dae a,
ngo dder gexrddu lei nr zza.

²⁶⁻²⁷ Ni ngo ddei xiu ddei leil Yijie gga piar dol gger doxr dae nr var,
ni ngo ddei seirceix-seirmaer ggecir ddei xiaxr lol nr var.

Yel ngo nixmox zzar yarzisael ggese,
ngo meir ddei ni leil bbeix zae gger.

^e2:21 Yue'aer Sul 2:28-32 leil vaexr dae.

Ngo, ni ngo ggecir ddei leil gol du xixl leil lol loxia dae.

²⁸ Ngo gol du xixl lei nia mel, ni ngo leil bbeix gger ho a;
ngo ni dax cirgo a hher dae a,
ni ngo leil yarzi ggesse lol nia.^f

²⁹ Arzzi-nimar, ngo nia leil yarzi bbeix gger: niul porpor Daxlweixl si a,
giexlhex a; eilni ci a lei, yar lixrbbaex ddei niul dax eilmaex zza dae seir.

³⁰ Daxlweixl mel xiezi ar ddei a. Arbosobo yar giedae ca ar ddei tiur a,
yar sael a zzirmar bei lol var yar saexl. Eil ddei mel dder Arbosobo yar
dax bbeix har zaxr goxr ddei nga a. ³¹ Daxlweixl arddolcar a arsae nga
var saexl zaxr dae ho a, yar dder Zidu gol du xixl lei ddei leil biar a bbeix:
yar ddei xiu ddei leil Yijie gga piar dol gger doxr dae nr var, yar ggecir
ddei xiaxr lol nr var. ³² Arbosobo Yisu leil gol du xixl lei lol ho a; ngua lei
mia a. ³³ Arbosobo Yisu leil yarzi quexrlixl zza lol a yar yo piar a gga
hher dae lol. Merhhexr Arbbor yoxl yar bbeix har zaxr goxr mel sael a,
yar ddei Xiu ddei lei Yisu leil gger ho a. Yisu yoxl Arbosobo ddei Xiu ddei
ngua dax hher ji dae lol, hherdder eilni nia mia, nia bbejjiur mel nga a.

³⁴ Daxlweixl mel merhhexr gga nr ddeix, nael yar bbeix:

‘Seirpor Arbosobo ngo ddei Seirpor leil bbeix:

“Ni ngo yo piar a gga cux dae,

³⁵ ngo leil xia dae a,

ngo ni leil vuxryixr su mel leil deil leixl gger,

ni qihher woxrke jjiux ji dae sael a nga lol hane zzezze ci.”^g

³⁶ Yel Yirsaexllixl su ca mel, nia maelmaerjjia yarzi saexl nia: nia

^f2:28 Sipi Sul 16:8-11 leil vaexr dae.

^g2:35 Sipi Sul 110:1 leil vaexr dae.

sixrzixljiaxl ddei leil diexr zil gger Yisu eil ddei mel, Arbosobo yar leil ca ddei Seirpor nei Arbosobo tiur har dae ca leil jiuxlsu Zidu ddei loxr lol ho a.”

³⁷ Ca mel ddar eil mel noni ho a yarzi nixmox no, yel yaa dder Birdaexr nei kebal Yisu miardal dae ca mel leil bbeix: “Arzzi-nimar, ngua arsae bei nia?”

³⁸ Birdaexr yaa leil bbeix: “Nia ca cirddeir-hanga lei huixrsoxr nia, halae Yisu Zidu ddei mi ddei leil koxl dae a, sexlsir nia. Yel Arbosobo nia ddei zuixl ssoxrsuxl var, yar ddei Xiu ddei leil nia nixmox zzar hher ji dae lol var. ³⁹ Arbosobo yar ddei Xiu ddei nia nei nia giedae ca mel leil halae vimirmir hher dae ca maelmaerjjia leil lei gger nia bbeix har zaxr goxr a. Ca eil mel hherdder niul ddei Seirpor Arbosobo tiur har dae ca mel nga a.”

⁴⁰ Birdaexr halae ddar cirke bbeix a arsae lerler nga goxr a, yaa leil zabbar seilseir a biar gger. Yoxl yaa leil quex a bbeix: “Nia yarzisael nr seir ca eil zeix sael a bei nr ddo! Yel Arbosobo dder nia leil ser nr var a!”

⁴¹ Birdaexr ddar bbeix dae mel leil ddarzzi su ca mel dder sexlsir a. Hal cir ni mel, Yisu leil ddarzzi su ca sodu sael miur dax a.

Yisu Leil Ddarzzi Su Mel Cirgo A Hher Dae

⁴² Yaa zabbar seilseir arla Yisu miardal dae ca mel yaa leil mul gger ggie noni, zoxlzoxl a cirgo a hher dae a, cirgo a zzo zzor,^h halae Arbosobo dax ddar biar. ⁴³ Yisu miardal dae ca mel yoxl ddoddomo murgurgurmo hal mel cirsax bei a, ca maelmaerjjia lei Arbosobo leil yarzi gexr, yarzi i du. ⁴⁴ Yisu leil ddarzzi su ca mel dder maelmaerjjia lei cirgo a hher dae a, cirza-hanga zzaegu lei maelmaerjjia cirgo a sser;

^h**2:42** zzo zzor Yaa cirgo a zzo zzor car, Seirpor ddei aba zzor, yar ddei beizi dda.

⁴⁵ yoxl armael ddei mi nei ake ddei zzaegu lei vur pixl gger a, arseir zzirbae hormo sser nia mel arseir leil hormo bbe gger. ⁴⁶ Yaa cirni-cirni cirgo a Arbosobo ddei xi zzaexggu gga hher dae, yaa yoxl armael ake gga Seirpor ddei aba zzor, Seirpor ddei beizi dda. Yaa nixmox zzar nr col, ggegge-sese arla, cirgo a zzo zzor. ⁴⁷ Yaa Arbosobo leil bbeix zae gger, ca cirddeir-hanga dax lei toltor a bei. Seirpor Yisu mel jiuxl wo ca mel leil cirni-cirni miur dax lol.

3

Birdaexr Pirdael Dae Ca Ddei Leil Kor Lol

¹ Eine ar ni a, eilnirggu 3:00 Arbosobo dax ddar biar zi ci a, Birdaexr nei Yuehal Arbosobo ddei xi zzaexggu ddei gga Arbosobo dax ddar biar ssi. ² Halcar a xiu teixl lei a dder pirdael dae ca ar ddei leil mel, Arbosobo ddei xi alddur zaelzae mi hal peixl ggucirmi bil mal lei. Yar mel bbecir-bbeni halmaex cux dae a ca mel dax azo lerler meixl. ³ Yar Birdaexr nei Yuehal leil Arbosobo ddei xi gga ddir lei dae mia a dder yaa dax azo lerler meixl. ⁴ Birdaexr nei Yuehal yaa nnel dder meix lei nr cix yar leil i dae. Birdaexr yar leil bbeix: “Ni ngua leil i dae!” ⁵ Yel yar dder zabbar seirseir a arla yaa leil i dae a, azo lerler li wo loxia.

⁶ Birdaexr bbeix: “Ngo piu sae lei nr zza, nael ngo zza dae mel dder ni leil gger. Ngo, Naxrsalexl kax gga su ca Yisu Zidu ddei mi ddei leil koxl dae a, ni leil miardal ha du la a ssi!” ⁷ Birdaexr dder yar leixrhher yo bbor leil gga dae a, yar leil ngier du lei lol a, cirleixr dder yar ddei qihher nei loxrsiguir ddei dder worni du lei a. ⁸ Yar tiuxl du lei a, ngier zzar a qie ssi dae a. Yar ho ssi ho tiuxl dae a, Arbosobo leil bbeix zae gger dae a, yaa dax cirgo a Arbosobo ddei xi zzaexggu ddei gga ddir a. ⁹ Ca maelmaerjia lei yar ho ssi ho Arbosobo leil bbeix zae gger ggie mia a.

¹⁰ Yar mel hherdder zoxlzoxl a Arbosobo ddei xi alddur zaelzae mi hal

peixl ggucirmi cux dae a, azo lerler meixl su ddei nga a i teixl lei a. Yar kor gaxzi a, yaa dder xiar lei xiar nr ci, yarzi murgur.

Birdaexr Arbosobo Ddei Xi Gga Ca Leil Arbosobo Ddei Ddar Biar Gger

¹¹ Giedae ca hal ddei mel Birdaexr nei Yuehal leil gga gex dae a, Sorloaxmexr mi gieyi gga hher dae a, ca mel yoxl yarzi murgur a, yaa dax beix mal a. ¹² Birdaexr ca mel leil mia a dder yaa leil bbeix: “Yirsaexllixl su ca mel, nia arsaenga a einezeixl murgur? Arsaenga a ngua leil meix lei nr cix i doxr dae leir? Nia zzir dae a ngua mel armael bbesur ddei leil koxl dae bbeixsael ngua Arbosobo dax seilseir a bei mae dae a ca eil ddei leil ssi var lol a ngo? ¹³ Yalboxrlahar, Yirsar, Yargel yaa ddei Arbosobo hherdder niul porpor mel ddei Arbosobo mel yar leil visser su Yisu leil middux lol ho a. Nael nia mel Yisu leil Birlado vaervaerpor leil jia gger. Birlado yar leil piur niazzir dae lei, nia Birlado meixsaer qier leil yar leil nr li. ¹⁴ Nia nixmox cirtaex-lorbba seir gaxzi seirceix-seirmaer ca hal ddei leil nr li, doxgoxleixr Birlado leil qiuxr a caseixlsu hal ddei leil nia leil piur gger lol. ¹⁵ Nia niul leil cirse-cirsil Arbosobo dax goxr dae lol var Seirpor ddei leil seixl zil gger a; nael Arbosobo zzael yar leil gol du xixl lei lol. Eil mel mel niul cirddeir-hanga lei mia goxr a. ¹⁶ Ngua Yisu ddei mi ddei leil koxl dae a, ca eil ddei worni du lei a. Ngua Yisu leil ddarzzi a, yel yar qihher pirdael dae lei kor gaxzi a. Ca eil ddei leil mel nia saexl, yar arsae lerler nga mel nia maelmaerjia lei mia a.

¹⁷ Arzzi-nimar ngo saexl, nia nei nia ddei vaervaerpor mel Yisu leil nr seir bei a mel, nia nr saexl a nga arddeir a. ¹⁸ Nael Arbosobo xiezi maelmaerjia leil bbeix gger zaxr goxr a bbeix ca mel Zidu leil bei no gger nia. Eil ddei yarzi loxr a. ¹⁹ Yel nia huixrsoxr nia, za xixl lei a, Arbosobo dax mae dae nia. Yar dder nia leil zuixl mel ssoxrsuxl var. ²⁰ Eine nga a mel, Seirpor Arbosobo dder nia leil nixmox zzaso lol var halae Yisu Zidu

leil nia dax lei lol var. ²¹ Yisu Zidu mel arsaebeilei merlabbor hher dae nia, hherdder Arbosobo hazza-hamaer lei yarsixl loxr lol halcar a ci zzezze. Eil mel mel halcar a Arbosobo tiur teixl lei xiezi mel bbeix har zaxr goxr a. ²² Moxrxi bbeix goxr a: ‘Seirpor nia ddei Arbosobo nia cir mermi su ca mel gga ngo sael a xiezi ar ddei ddux lei lol nia. Yar nia dax ha bbeix dae mel nia dder noni nia. ²³ Xiezi hal ddei ddei ddar nr no su hazza mel, Arbosobo dder yaa leil cassor-worssor mel dax cirgo a nr hher lol, si lol.’ⁱ

²⁴ Xiezi Sarmur'aer cirdae a, yar giedae ddux lei xiezi maelmaerjia lei eilleix arsae lerler nga dae eil mel bbeix har zaxr goxr a. ²⁵ Arbosobo Yalboxrlahar leil bbeix goxr a bbeix: ‘Ni giedae ca mel gga ca ar ddei a middurbbor cirmaex-hanga ca mel leil goxr seir lol nia.’^j Arbosobo bbeix dae eil mel nei nia ddei porpor xiezi mel bbeix har zaxr dae eil mel mel, nia dax lei guaxrzoxr. ²⁶ Arbosobo yar leil visser su ddei leil tiur teixl lei a, hoba nia dax lei lol a, nia cirddeir-hanga leil nr seir nr bei lol, nia leil seir lol.”

4

Yoxrtaexl Su Ddei Vaervaerpor Mel Birdaexr Nei Yuehal Leil Ser

¹ Birdaexr nei Yuehal ca mel dax ddar biar dae car a, Arbosobo leil zi su mel nei Sardugie ca mel yaa dax lei a. Arbosobo ddei xi zzir leil su su vaervaerpor ddei lei lei a. ² Birdaexr nei Yuehal yaa ca mel leil Yisu si a, Arbosobo yar leil gol du xixl lei lol, yel ca mel si a lei gol du xixl lei var eil mel mul gger doxr dae a, Yoxrtaexl su vaervaerpor eil mel yarzisael

ⁱ3:23 Semixljil Sul 18:15-19 leil vaexr dae.

^j3:25 ‘Ni giedae ca mel gga ca ar ddei a middurbbor cirmaex-hanga ca mel leil goxr seir lol nia’ Cuaxlsixljil Sul 22:18 nei 26:4 leil vaexr dae.

sirzzi. ³ Yel dder Birdaexr nei Yuehal leil ssu gex du lei a. Halcar mel neixmar ho a, yaa leil dder ge du lei a, giedae cir ni ge ci a. ⁴ Nael Birdaexr nei Yuehal biar dae mel leil noni a ddarzzi su ca mel cirke zza, capor lillil lei ngordu sael zza.

⁵ Giedae cir ni, Yoxrtaexl su ca ddei vaervaerpor mel nei ca leil guaxr su camar, halae Arbosobo ddei sulsaxlsu mel Yiluxlsaler zzi gga lei a, cirgo a hher dae a. ⁶ Arbosobo leil zi su vaer zzir Yalnaxl mi hal ddei nei yar cirssor Arbosobo leil zi su ar mel hher dae. Yaa mel dder Gieyalfar, Yuehal, Yallixlsadaxl yaa nga a; halae kebal cirssor lei ar mel zza seir. ⁷ Yaa Yisu miardal dae ca hal nnel leil yaa xilmeir ngier dae lol a, yaa leil biex a bbeix: “Arseir nia leil ddoddomo eine bei lol? Nia arseir ddei mi ddei leil koxl dae a, eil mel bei?”

⁸ Halcar malmal Arbosobo ddei Xiu ddei Birdaexr nixmox zzar hher ji dae a yar dder yaa leil ddarkoxl a bbeix: “Vaervaerpor nei ca leil guaxr su camar mel, ⁹ eilni nia ngua leil ngua pirdael dae ca eil ddei leil arsae kor lol, arsae eine seirseir ar jji bei biex arddeirnga a, ¹⁰ nia nei Yirsaexllixl su ca maelmaerjjia lei saexl nia, nia meixsaer qier leil ngier dae ca eil ddei no ddei kor gaxzi a mel, Naxrsalexl kax gga su Yisu Zidu ddei mi ddei leil koxl dae a nga arddeir a. Nia yar leil sixrzixljiaxl ddei leil diexr zil gger a; nael Arbosobo yoxl yar leil gol du xixl lei lol ho a.

¹¹ Yisu leil bbeix ci a mel, Arbosobo Ddei Sul ber leil vaexr goxr a bbeix, yar mel

‘nia sixrjiuxr xiax su mel piar pixl gger legelbbe hal taex nga a; yar xi giexrluxl gga zoxlyoxl zzir legelbbe taex loxr ho a.’^k

¹² Yisu nr nga a mel, mer woxrke zeixleixr lei arseir ddei mi ddei leil koxl

^k4:11 Sipi Sul 118:22 leil vaexr dae.

dae a jiuxl wo ddo eine nr zza!”

¹³ Nael vaervaerpor eil mel Birdaexr nei Yuehal mel sul lei hormolsael zza nr goxr, ngol bbe su lar nga saexl, nael yaa nnel leil yarzi nixmox vaer i teixl lei a dder hazzi murgur. Yaa lei Birdaexr nei Yuehal Yisu dax mae goxr a saexl. ¹⁴ Yoxl Birdaexr nei Yuehal ggukor gger ho ca hal ddei yaa dax cirgo a ngier dax dae ggie mia a dder azo lei ddarkoxl ddu nr zza a. ¹⁵ Yel yaa dder Birdaexr nei Yuehal leil miardal a, Yoxrtaexl su ca ddei vaervaerpor mel dax nr hher, ddux lol a, yaa dder zzicarzzi dax zzibbe a bbeix: ¹⁶ “Niul ca eil nnel leil arsae bei nia neil? Yaa mel ddoddomo ar jji bei a, ha Yiluxlsaler zzi gga hher dae ca mel lei saexl, yel niul lei yaa bei dae mel nga-nr-zi bbeix nr cexr. ¹⁷ Nael niul yaa bei dae eil mel cirmaex-hanga lei biar ci lol nia-nr-zzir a mel dder yaa leil zux nia. Yel yaa leil zeixleixr lei Yisu ddei mi ddei leil koxl dae a ca mel leil azo lerler biar gger ssi lol nr ddo a.”

¹⁸ Yel dder yaa leil ae si lei a, yaa leil zeixleixr lei Yisu ddei mi ddei leil koxl dae a ca mel leil azo lerler biar nr gger lol, azo lerler lei mul nr gger lol. ¹⁹ Nael Birdaexr nei Yuehal yaa leil ddarkoxl a bbeix: “Nia zzir dae a Arbosobo meixddurga gga mel, yar ddei ddar no a hoxr bbeixsael nia ddei ddar no a hoxr? Nia arleixr xiar ssi! ²⁰ Ngua ha mia wo, bbejjiur wo mel ca leil bbeix nr gger goxr nr ddo.”

²¹ Vaervaerpor mel Birdaexr nei Yuehal zuixl zza zo teixl lei nr xie. Birdaexr nei Yuehal bei dae mel ddoddomo nga a, ca mel Arbosobo leil bbeix zae gger. Yel yaa ca mel leil gexr a, Birdaexr nei Yuehal leil ar pu zux gger a, yaa leil piur lalnga a. ²² Yaa ddoddomo bei a ggukor gger pirdael dae ca hal ddei mel, licei koxl nr ci loxr a.

Yisu Leil Ddarzzi Su Ca Mel Arbosobo Dax Ddar Biar

²³ Birdaexr nei Yuehal leil piur teixl lei a qie yaa dder yaa carbeix mel dax jjixr ci a, Arbosobo leil zi su vaervaerpor mel nei ca leil guaxr su

camar mel arsae lerler bbeix a maelmaerjia yaa leil bbeix gger a. ²⁴ Yaa noni ho a dder cirter a nixmox zzar ciryoxr a xiar dae a, worcixl-worni Arbosobo dax ddar biar a bbeix: “Merlo-milo, neixvi nei cirza-hanga bei teixl lei su Seirpor, ²⁵ ni, ni ddei Xiu ddei leil ni leil visser su, hherdder ngua ddei porpor Daxlweixl leil bbeix lol a bbeix:

‘Arsaenga a Yoxrtaexl su nr nga ca mel

Arbosobo dax einezeixl sirzzi?

Arsaenga a cassor-worssor mel

Arbosobo leil nr seir bei niazzir?

Nael yaa eine bei a mel, baexr a xiar lalnga.

²⁶ Middurbbor zzirmar bei su mel

Arbosobo dax zaxlddaexr lei ho a;

halae vaervaerpor mel lei cirgo a lei a,

Seirpor Arbosobo leil nei yar tiur har dae ca leil jiuxlsu ddei leil dir lei.’¹

²⁷ Eilboxl yarzi eine nga a bbe! Silixl zzirmar nei Berdiu-Birlado vaervaerpor halae Yoxrtaexl su nr nga ca mel nei Yirsaexllixl goxrjia su ca mel cirgo a Yiluxlsaler zzi gga hher dae a, ni tiur teixl lei a ni leil visser su seirceix-seirmaer Yisu leil dir. ²⁸ Ni yarzi ddo a, yaa bei dae mel halleix ni bbeix zaxr goxr mel sael a nga. ²⁹ Seirpor, ngua mel ni leil visser su a. Ni arleixr i, yaa ngua leil zux, nael ni ngua leil nixmox vaervaermo bei lol a, ni ddei ddar mel ca leil biar gger ssi lol la. ³⁰ Ngua ni leil qiuxr, ni leixrhher ddei cei teixl la a no su mel leil kor lol, yoxl ngua leil ni leil visser su seirceix-seirmaer Yisu ddei mi ddei leil koxl dae a, ddoddomo murgurmo hal mel bei lol la.”

¹4:26 Sipi Sul 2:1-2 leil vaexr dae.

³¹ Yaa Arbosobo dax ddar biar teixl ho a qie, yaa hher ggie halmaex le du lei a. Arbosobo ddei Xiu ddei yaa cirddeir-hanga ddei nixmox zzar hher ji dae a, yel yaa dder nixmox vaervaermo Arbosobo ddei ddar mel ca leil biar gger du lei a.

Yisu Leil Ddarzzi Su Ca Mel Zzi Dax Cirgo A Zzaegu Sser

³² Yisu leil ddarzzi su ca eil mel cirddeir-hanga lei nixmox zzar ciryoxr a xiar dae. Arseir lei zzaegu eil yox armael ddei a bbeix su nr zza, maelmaerjia lei cirgo a sser. ³³ Arbosobo Yisu miardal dae ca mel leil yarzi ddo lol a, yaa dder Yisu si a yoxl gol du xixl lei eil mel yaa mia wo a bbaexl ca mel leil biar gger ssi. Arbosobo yaa maelmaerjia leil cirza-hanga seirseir meixl gger. ³⁴⁻³⁵ Mi nei xi zza su mel cirdaedae a yaa armael ddei ar mel vur pixl a, zzirbae vur wo mel Yisu miardal dae ca mel leil jia gger a, yaa leil ca mel arseir hormo sser zoxr, hormo bbe gger lol. Yel yaa ca mel gga zzaegu sserddu nr zza ca lei ar ddei nr zza.

³⁶ Lixlweixl giedae ca ar ddei zza. Yar leil Yuesaexl mi. Yar Saexlpurluxlsi dal hal taex leil lei. Yisu miardal dae ca mel yar leil Banaxrba ae. Banaxrba ddei yilsi mel dder nixmox dder vaer su. ³⁷ Yar lei armael ddei mi ar bbae vur pixl a, zzirbae vur wo mel vei si lei a, Yisu miardal dae ca mel leil jia gger.

5

Yalnaxrnixryal Nei Sarfeila Leil Biar

¹ Yoxl capor maerssor ar zze zza; capor ddei leil nael, Yalnaxrnixryal mi; ssormaer ddei leil nael, Sarfeila mi. Yaa nrnel lei armael ddei mi ar bbae vur pixl gger a. ² Capor ddei arjiuljjiu a zzirbae ar mel dol dae a, nirzzei dae mel saelnei Yisu miardal dae ca mel leil jia gger. Yar eine bei a, yar maerssor lei saexl.

³ Birdaexr dder yar leil bbeix: “Yalnaxrnixryal, ni arsaenga a neir zzirmar Sardaxl te leil ni ddei nixmox ddei leil guaxr lol leir? Ni mi vur teixl lei zzirbae ar mel dol dae a mel Arbosobo ddei Xiu ddei leil fur arddeir a!” ⁴ Mi bbae nr vur seir lei ni ddei a; vur ho a vur teixl lei zzirbae mel lei ni ddei a zzarmar? Arsaenga a ni nixmox zzar eine nr seir xiar ji dae neil? Ni mel ca leil fur nr nga a nei, Arbosobo leil fur arddeir a.

⁵ Yalnaxrnixryal ddar eil mel noni ho a qie dder de ze i a si a. Bbejjiur su ca mel lei gexr zildu a. ⁶ Giedae caleixlssor ar mel a ha du lei a, yar leil ba du lei a, bil teixl a, giexlhex ssi.

⁷ Arcixl loxr ho a, yar maerssor ddei ddir lei a, yar halae arsae nga a nr saexl seir. ⁸ Birdaexr yar leil biex a bbeix: “Ngo leil bbeix gger la, nia mi vur teixl lei zzirbae mel maelmaerjgia lei eil mel nga nga?”

Yar ddarkoxl a bbeix: “Nga a mar, maelmaerjgia lei eil mel nga a.”

⁹ Birdaexr yoxl yar leil bbeix: “Ni arsaenga a ni capor dax cirgo a Seirpor ddei Xiu ddei leil sixr i leir? Ni arleixr i, ni capor leil giexlhex su ca mel alddur ggucirmi hher dae a; yaa lei ni leil bil teixl nia.”

¹⁰ Yar bbeix teixl a qie, ssormaer hal ddei dder Birdaexr qihher dax de ze i a, si a. Caleixlssor hal mel ddir jjixr lei a, ssormaer hal ddei lei si ho a mia a dder bil teixl a, yar capor dax halmaex giexlhex gger a.

¹¹ Jiaxlhuixl gga ca maelmaerjgia nei kebal bbejjiur wo su ca mel lei gexr zildu a.

Yisu Miardal Dae Ca Mel Murgurgurmo Ddoddomo Hal Mel Bei

¹² Yisu miardal dae ca mel ca mel dax ddoddomo murgurgurmo cirke bei a. Yisu leil ddarzzi su maelmaerjgia lei zoxlzoxl a Sorloxmexr mi gieyi hal zex gga cirgo a hher dae. ¹³ Yisu leil ddar-nr-zzi su ca mel yaa leil yarzi i du bbeixarnar, nael cir ddei lei yaa dax naer nr bel. ¹⁴ Yisu leil ddarzzi su ca mel ho bei ho miur dax a; capor ssormaer lei yarzi miur.

¹⁵ Halae ca cirmemel a canosu mel leil bil mal lei a, yixrgguci ddei leil bbeixsael goxrzeix ddei leil yixr dae lol a, Birdaexr yaa dax halmaex ssi gel ggur a yar ddei avix ddei canosu ar mel leil arleixr jiul gex dae lol a, yaa leil kor lol loxia. ¹⁶ Yoxl ca cirke a Yiluxlsaler zzi dax naer dae zzi mel gga canosu nei neir xiex dae ca mel leil Yiluxlsaler zzi gga hier mal lei a; yaa maelmaerjjia lei kor a.

Yisu Miardal Dae Ca Mel Leil Bixr

¹⁷ Arbosobo leil zi su vaer zzir ddei nei yar carbeix hherdder Sardugie su ca mel lei Yisu miardal dae ca mel leil nixnox zildu a dder ¹⁸ yaa leil ssu du lei a, ge ji dae a. ¹⁹ Nael hal cir xixlmei Seirpor ddei tisir ar ddei a cageggie alddur ddei ggapu a, yaa leil hier teixl lei a, yaa leil bbeix:

²⁰ “Nia Arbosobo ddei xi gga zzaexggu gga ssi a, halmaex gga ngier dae a, ca mel leil arsae bei a saelnei Arbosobo dax goxr dae var, eine biar gger ssi.”

²¹ Yaa ddar eil mel noni ho a, merteir jiur a qie, Arbosobo ddei xi zzaexggu gga ddir a, ca mel leil mul gger ssi. Nael Arbosobo leil zi su vaer zzir ddei nei yar carbeix mel zzael Birdaexr nei Yuehal yaa ddux jixr ho a nr saexl a, Yoxrtaexl su ca ddei vaervaerpor mel, hherdder Yirsaexllixl su ca leil guaxr su camar maelmaerjjia leil ae si lei a zzubbe. Yaa halae ca mel leil miardal a Yisu miardal dae ca mel leil ge ggie hier teixl lei lol. ²² Nael yaa cageggie ssi ci a, Yisu miardal dae ca mel leil hher ggie nr mia a dder Yoxrtaexl su ca ddei vaervaerpor mel leil bbeix gger jjixr lei a bbeix: ²³ “Nguua cageggie alddur ddei lei zabbar seilseir a zzux gex dae mia a; alddur su su mel lei alddur ggucirmi ngier dae, nael alddur ggapu a, ca cir ddei lei hher nr ji dae.” ²⁴ Arbosobo ddei xi ddei leil su su vaervaerpor nei Arbosobo leil zi su vaervaerpor mel ddar eil mel noni ho a dder murgur zildu a, arsae bei nia nr saexl.

²⁵ Ca ar ddei a yaa leil bbeix gger lei a bbeix: “Nia ge ji dae ca mel

Arbosobo ddei xi gga ngier dae a ca leil mul gger dae a!”²⁶ Yel Arbosobo ddei xi ddei leil su su vaervaerpor nei yar woxrke ca mel ssi a, Yisu miardal dae ca mel leil hier ssi. Nael ca mel yaa leil legelbbe zax leilei a gexr a yaa dder Yisu miardal dae ca mel leil ssu xixl si nr nga, seilseir arla hier xixl si a.

²⁷ Yaa leil Yoxrtaexl su ca ddei vaervaerpor dax hier mal a, yaa xilmeir ngier dae lol a, Arbosobo leil zi su vaer zzir ddei dder yaa leil biex a bbeix:²⁸ “Nguia nia leil zeixleixr lei Yisu ddei mi ddei leil koxl dae a, ca mel leil azo lerler mul gger nr ddo zabbar seilseir a miardal goxr a zzarmar? Nia halae Yiluxlsaler zzi gga ca maelmaerjjia leil mul gger, yoxl Yisu si a mel, nguia zzi a eine bbeix!”

²⁹ Nael Birdaexr nei kebal Yisu miardal dae ca mel ddarkoxl a bbeix: “Nguia ca mel ddei ddar noni nr nga a nei, Arbosobo ddei ddar noni nia.

³⁰ Nia sixrzixljiaxl ddei leil diexr zil gger Yisu ddei mel niul porpor mel ddei Arbosobo yar leil gol du xixl lei lol ho a.³¹ Arbosobo Yisu leil yarzi quexrlixl zza lol a yar yo piar a gga hher dae lol, yar leil ca mel leil guaxr su nei jiuxlsu bei lol a mel, Yirsaexllixl su ca mel leil huixrsoxr lol a, yaa ddei zuixl mel ssoxrsuxl niazzir a nga arddeir a.³² Nguia nei yar ddei Xiu ddei mel dder eil mel leil mia su nei bbejjiur su mel nga a. Arbosobo mel yar ddei Xiu ddei yar leil noni su mel nixmox zzar hher ji dae lol.”

³³ Yoxrtaexl su ca ddei vaervaerpor mel ddar eil mel noni ho a dder sirzzi zildu a, Yisu miardal dae ca mel leil seixl zil gger niazzir.³⁴ Nael Yoxrtaexl su ca ddei vaervaerpor mel gga mel Farlixlsaexl ca ar ddei zza, yar leil Jiamarlixl mi. Yar mel Moxrxi vaexr dae Lixlfaxr saexl su ar ddei a. Ca maelmaerjjia lei yar leil i du. Yar ngier du lei a ca mel leil miardal a, Yisu miardal dae ca mel leil zalbbaer arleixr hier teixl lol a.³⁵ Yar Yoxrtaexl su ca ddei vaervaerpor mel dax bbeix: “Yirsaexllixl su ca mel, nia ca eil mel leil arsae bei zzorbbeixlei, nia fadae nia!”³⁶ Halleix, Diudaxl

mi ca ar ddei zza. Yar armael ddei armael yarzi kuarddo, yar dax mae dae su ca mel lixiu sael zza. Giedae yar leil seixl zil gger ho a, yar dax mae dae ca mel leil cirmaex-hanga ggaxr mal jjia gger a dder azo lei nr bei a. ³⁷ Eine goxr ho a, Loxrmar goxrjia gga cirmaex-hanga ca mel armael mermi jjixr a vaervaerpor mel leil yaa ddei mi mel sul ber leil vaexr deix lol halcar, Jialixllixl mermi su Yoxrdaxl mi ca ar ddei zza. Yar ca armel hier dae a Loxrmar goxrjia leil dir. Nael yar leil lei seixl zil gger a. Yar dax mae dae su ca mel leil cirmaex-hanga ggaxr mal jjia gger a. ³⁸ Eilcar a, ngo nia leil quex, ca eil mel leil guaxr nr ssa, yaa azo bei mel yaa leil bei ssi lol. Yaa nixmox zzar xiar ji dae nei bei dae eil mel yaa armael lar bei arddeirnga a, yaa bei cexr nr var. ³⁹ Nael yaa nixmox zzar xiar ji dae nei bei dae eil mel Arbosobo bei lol arddeirnga a, nia dder yaa leil bei leixl nr ddo. Nia yaa leil dir a mel dder Arbosobo leil dir!”

⁴⁰ Yoxrtaexl su ca ddei vaervaerpor mel yar ddei ddar no a, yel yaa Yisu miardal dae ca mel leil ae si lei a ar pu deil gger a. Yoxl yaa leil bbeix zeixleixr lei Yisu ddei mi ddei leil koxl dae a ca mel leil azo lerler biar gger nr ddo. Giedae dder yaa leil piur teixl lei a.

⁴¹ Yaa mel Yisu leil weix a goxr sol wo ddo a, ggegge-sese arla Yoxrtaexl su ca ddei vaervaerpor mel dax ddux lei a. ⁴² Yaa cirni-cirni Arbosobo ddei xi zzaexggu gga nei ca mel ddei ake hher dae a, cirleixr nr nor Yisu mel dder Zidu nga a ca leil biar gger, ca leil mul gger.

6

Ca Sirlar Tiur

¹ Giedae mel, Yisu dax mae dae su ca mel cir ni bir cir ni leil miur dax, Xilaxl goxrjia ddei ddar bbeix su Yoxrtaexl su ca mel Xiboxrlaexr ddar bbeix su Yoxrtaexl su ca mel leil bota. Yaa bbeix “Ca mel bbecir-bbeni ngua ddei maermocir mel leil zzorddu gger hol-nr-cir.” ² Yisu miardal

dae ca hal ceinirmo dder kebal Yisu dax mae dae su ca maelmaerjia leil ae si lei a, yaa leil bbeix: “Ngua zzorddu mel leil guaxr nr nga a nei, Arbosobo ddei ddar ca leil biar gger nia. ³ Arzzi-nimar, nia ca mel gga ca sirlar tiur teixl lei nia. Ca eil mel mel si yaa leil i du, Arbosobo ddei Xiu ddei yaa dax hher ji dae a yaa leil olnolddu lol nia. Ngua yaa leil zzorddu mel leil guaxr lei lol nia. ⁴ Ngua nael, zabbar seirseir arla Arbosobo dax ddar biar nei ca mel leil Arbosobo ddei ddar biar gger ssi nia.”

⁵ Ca maelmaerjia lei ddar eil mel noni ho a, yaa zzir dae a yarzi seir. Yel dder Sitixrfaxr mi ca hal ddei leil tiur. Yar mel Arbosobo leil yarzisael ddarzzi a, Arbosobo ddei Xiu ddei yar nixmox zzar hher ji dae. Halae Feilixl, Boxrloxr, Nixrjianoxr, Tixrmexr, Bamirnaxr nei Nixrgela yaa leil tiur. Nixrgela mel Atixr'a zzi gga su a. Halleix yar Yoxrtaexl su nr nga, nael giedae yar Yoxrtaexl su ca loxr ho a. ⁶ Yisu leil ddarzzi su mel yaa leil Yisu miardal dae ca mel xilmeir ngier dae lol a. Yisu miardal dae ca mel dder leixrhher ddei yaa leil ta gex dae a, Arbosobo dax ddar biar gger a.

⁷ Arbosobo ddei ddar mel cirmaex-hanga lei biar ci a. Yiluxlsaler zzi gga mel Yisu dax mae dae su ca mel yarzisael miur dax a; halae Arbosobo leil zi su cirke a lei Yisu leil ddarzzi a.

Sitixrfaxr Leil Ssu Gex Du Lei

⁸ Arbosobo Sitixrfaxr leil cirza-hanga seirseir meixl gger a, yar leil yarzisael ddo lol a, yar ca mel dax ddoddomo murgurgurmo hal mel bei a.

⁹ Halcar a malmal, Yoxrtaexl su mel Arbosobo ddei sulzzaggie gga ca nneltsael a, Sitixrfaxr dax zex lei. Yoxrtaexl su ddei Arbosobo ddei sulzzaggie eil ddei leil mel “armael lozza su” eine mi. Ca eil nneltsael mel Gurlixlnaexl zzi nei Yallixlsadaxl zzi, halae Jilixljia mermi nei Yalxilyal mermi su a. ¹⁰ Nael Arbosobo ddei Xiu ddei Sitixrfaxr leil olnolddu lol a, yaa yar leil zex leixl nr xie.

¹¹ Yel ca hal mel dder kebal ca ar mel leil zzirbae gger a, si dax bbeix ssi lol a bbeix: “Nguā, Sitixrfaxr te Moxrxi nei Arbosobo leil bbeix vuxryixr ggīe bbejjiur a.”

¹² Yaa eine bei a mel, Yoxrtaexl su mel leil nei ca leil guaxr su camar mel leil halae Arbosobo ddei sulsaxsu mel leil co a, yel ca eil mel dder Sitixrfaxr leil ssu gex du lei a, Yoxrtaexl su ca ddei vaervaerpor mel xilmeir hier mal. ¹³ Zzirbae li wo su hal mel mel ca mel meixsaer qier leil nrbbā nrbbā bbeix a bbeix: “Ca eil ddei cirleixr nr nor Moxrxi vaexr dae Lixlfxaxr nei Arbosobo ddei xi leil bbeix vuxryixr.” ¹⁴ “Nguā halae yar eine bbeix ggīe bbejjiur a bbeix: ‘Naxrsalexl kax gga su ca Yisu mel Arbosobo ddei xi ddei bei xiāxr gger nīa, halae Moxrxi niul leil mul gger a bei lol mel gierbox gger nīa,’ ” eine bbeix a.

¹⁵ Yoxrtaexl su ca ddei vaervaerpor mel cirddeir-hanga lei meix lei nr cix Sitixrfaxr qīaxrmeix ddei leil i dae a, tisir mel sael a bbobbolbbo nga mia a.

7

Sitixrfaxr Yoxrtaexl Su Vaervaerpor Mel Dax Ddar Biar

¹ Arbosobo leil zi su vaer zzir ddei bbeix: “Yaa bbeix dae eil mel yarzi nga nga?”

² Sitixrfaxr ddarkoxl a bbeix: “Ngo ddei pormo nei arzzi-nimar mel, nīa cirddeir-hanga noni dae la! Halleix niul ddei porpor Yalboxrlahar Meirsorbuxldaxrmiryal mermi halmaex hher dae a, yar Halaxr zzi gga ba nr mal seir car a, bbobbolbbo Arbosobo ddei yar leil mia lol a, ³ yar leil bbeix: ‘Ni armael ddei mermi, armael cirssor mel dax bbe kae a, ngo ni leil ssi lol ggīe ssi nīa.’

⁴ Yel yar dder Jialexldir mermi^m su ca mel dax nr hher, Halaxr zzi gga hher ssi a. Yarbbor si ho a, Arbosobo yoxl yar leil eilleix nia hher ggie eilmaex ba mal lei lol. ⁵ Yar eilmaex hher dae car a, Arbosobo yar leil mi lei nr gger, qihher toxl gex ggie lei ar maex nr gger. Arbosobo mi ddei eil ddei yar nei yar ddei giedae ca mel leil gger nia bbeix har zaxr car a mel, yar halae ssor lei nr zza seir. ⁶ Arbosobo yar leil bbeix: ‘Ni ddei giedae ca mel kebal goxrjia su ca mel dax ngol hher ssi nia, yaa halmaex gga ca mel ddei zebol bei nia, yaa leil lixiu koxl sulku lol nia. ⁷ Nael ngo yaa leil zebol bei lol goxrjia hal ddei leil faxr nia. Arddolcar a yaa goxrjia hal ddei gga ddux lei a, eilmaex gga ngo leil visser lei nia.’ ⁸ Arbosobo yoxl Yalboxrlahar leil gelir bei lol. Eil ddei mel hherdder Arbosobo yar dax bbeix har zaxr dae hoxltexr ddei nga a. Yel Yalboxrlahar yar ssor Yirsar leil xiu teixl lei heixl ni loxr a dder yar leil gelir bei gger a. Yirsar Yargel leil xiu, Yargel yoxl niul porpor ceinirmo leil xiu.

⁹ Niul ddei porpor mel yaa ddei nimar Yuesaexl leil nixnox a, yel dder yar leil Aezixr goxrjia su ca mel dax vur mal gger a. Arbosobo yar dax cirgo a hher dax doxr dae a, ¹⁰ yar leil cirza-hanga nr seir mel gga jiuxl teixl lei a. Yoxl Aezixr goxrjia Faxrlar zzirmar meixsaer qier leil yar leil cirza-hanga seirseir meixl gger a olnolddu lol a, yel yar dder Yuesaexl leil yar woxrke vaervaerpor vaer zzir ddei bei lol, halae yar leil yar armael ddei ake ddei guaxr lol.

¹¹ Giedae Aezixr goxrjia gga nei niul porpor hher ggie Jianaxr mermi lei loxlmoxr dae teixl lei nr ddo a, yarzi larhor, goxr sol zildu a, yel niul ddei porpor mel dder zzorddu cirdoxr lei nr zza a. ¹² Nael Yargel Aezixr goxrjia gga loxlmoxr zza bbejjiur a dder yar ssor, hherdder niul ddei porpor mel leil miardal a Aezixr goxrjia gga loxlmoxr vae ssi beil lol.

^m7:4 *Jialexldir mermi* Jialexldir mermi ddei mel Meirsorbuxldaxrmiryal mermi gga hher ji dae.

¹³ Giedae nr boxl ddei ssi a, Yuesaexl yar ddei arzzi-nimar mel leil yar mel yaa nimar a bbeix gger a. Faxrlar zzirmar dder Yuesaexl ddei cirssor mel leil saexl a. ¹⁴ Yuesaexl dder yar arzzi-nimar mel leil miardal a, yarbbor Yargel nei yar cirssor maelmaerjjia leil yar dax ba mal lei lol. Cirssor mel jiujiu a mel sircei ngorler zza. ¹⁵ Yel Yargel dder Aezixr goxrjia gga ssi a, giedae yar nei yar ssor ceinirmo lei halmaex marle a. ¹⁶ Yargel ddei giedae ca mel Aezixr goxrjia gga ddux car a, Yargel nei yar ssor ceinirmo ddei hherggar mel Sixljiel zzi gga bil mal a, halleix Yalboxrlahar Hamor mi ca hal ddei ssormine mel dax vae si lei lixrbbae mi bbae gga giexlhex gger a.

¹⁷ Arbosobo yar bbeix har zaxr dae mel bei niazzir dae car, Yargel ddei giedae ca mel Aezixr goxrjia hher dae a ca cirke miur dax a. ¹⁸ Giedae Yuesaexl leil cirdoxr lei nr saexl ca ar ddei a, Aezixr goxrjia ddei zzirmar bei a. ¹⁹ Yar nrbbba nrbbba bei a niul porpor mel leil ci, yaa leil goxr sol lol, yaa leil ddoddo-nrddo armael anix bexlelte mel leil piar pixl gger a, nr gol lol.

²⁰ Halcar malmal, Moxrxi leil xiu teixl lei a. Yar yarzi igax zae. Yar leil ake gga so xiubbo hier a. ²¹ Yar leil piar pixl gger halcar a, zzirmar Faxrlar ddei ssormaer ddei yar leil ggux wo a, yel dder yar armael ddei ssor bei lol a. ²² Yar Aezixr goxrjia su ca mel zza goxr sul hazza lei zzawo a, yar ddar bbeix nei azo lerler bei a lei yarzi ddo.

²³ Yar licei koxl loxr a, yar dax cir mermi su Yirsaexllixl su ca mel arsaesael nga dae i ssi niazzir. ²⁴ Yar i ssi car a, Aezixr goxrjia su ca ar ddei a Yirsaexllixl su ca ar ddei leil ci ggie mia a. Yel yar dder Yirsaexllixl su ca hal ddei leil beijjiu a, Aezixr goxrjia su ca hal ddei leil bei koxl xixl a, yar leil seixl zil gger a. ²⁵ Moxrxi zzir dae a yar dax cir mermi su ca mel Arbosobo yar leil sser dae a, yaa leil jiuxl lol saexl, nael yaa nr saexl. ²⁶ Giedae cir ni, yar yoxl Yirsaexllixl su ca nnel a zzideil

ggie mia a dder yaa leil tor xixl nia quex a bbeix: ‘Nia mel arzzi-nimar a; arsaenga a zzicarzzi leil deil?’

²⁷ Yar carbeix leil ci su ddei Moxrxi leil dder pixl gger a bbeix: ‘Arseir ni leil miardal a ngua ddei vaervaerpor bei nei ngua leil hoxr hoxr nr hoxr bbeix gger lei lol a leir?’ ²⁸ Holbbaexl ni arni Aezixr goxrjia su ca hal ddei leil seixl zil gger mel sael a, ngo leil seixl zil gger niazzir dae a ngo?’

²⁹ Moxrxi ddar eil mel noni ho a dder pa du si a, Mirdixl mermi ngol hher dae a, halmaex gga ssor nrnel xiu wo a.

³⁰ Yar halmaex gga licei koxl hher ho a, Xinaer worga hal ga dax mipaerbbae gga tisir ar ddei a adoxl bbiu dae alcur cili gga hher dae a, adoxlle gga yar leil mia lol. ³¹ Yar mia a dder yarzi murgur. Yar ssi naer a arleixr i ssi niazzir dae a qie, Seirpor ddei qiurte ddei leil bbejjiur a bbeix: ³² ‘Ngo mel ni porpor hherdder Yalboxrlahar, Yirsar, Yargel yaa ddei Arbosobo ddei nga a.’ Moxrxi dder lixlix-laexlaexmo ar ddei gexr mal a, i nr bel a.

³³ Seirpor yoxl bbeix: ‘Ngo mel seirceix-seirmaer a; ni eilmaex ngier dae a, qixnex zze lixr teixl nia. ³⁴ Ngo ddei cassor-worssor mel Aezixr goxrjia gga goxr sol dae a ngo mia a; yaa goxr sol a ae dae a lei ngo bbejjiur a. Ngo zei lei a mel, yaa leil jiuxl lei arddeir a. Ni gger lei a, ngo ni leil miardal, ni Aezixr goxrjia gga ssi nia.’ ”

³⁵ Sitixrfaxr yoxl bbeix: “Yirsaexllixl su ca mel Moxrxi leil nr li a yaa bbeix: ‘Arseir ni leil miardal a ngua ddei vaervaerpor bei lol a, ngua leil hoxr hoxr nr hoxr bbeix gger lei lol a leir?’ Nael Arbosobo mel alcur cili gga Moxrxi leil tisir leil mia lol halcar a, yar leil miardal a, Yirsaexllixl su ca mel ddei vaervaerpor bei, yaa leil jiuxlsu bei lol. ³⁶ Yar Yirsaexllixl su ca mel leil Aezixr goxrjia gga hier teixl lei a. Yar Aezixr goxrjia gga, neixvi nilni mi hal bbe gga nei mipaerbbae gga hher dae hal licei koxl gga mel, ddoddomo murgurmo cirke bei a.

³⁷ Moxrxi Yirsaexllixl su ca mel leil bbeix gger a bbeix: ‘Arbosobo nia cir mermi su mel gga ngo sael a xiezi ar ddei ddux lei lol nia.’ ³⁸ Moxrxi mel niul porpor dax cirgo a mipaerbbae gga hher dae a. Yar Xinaer worga ga leil hher dae car, tisir yar dax ddar biar a. Yar ddar eil mel niul leil bbeix gger a, niul leil arsae bei a saelnei cirse-cirsil lei Arbosobo dax goxr dae cexr saexl lol.

³⁹ Nael niul ddei porpor mel yar ddei ddar no nr nga a nei yar leil dir, zeixleixr Aezixr goxrjia gga jjixr niazzir dae. ⁴⁰ Moxrxi halae Xinaer worga ga leil hher dae seir car a, yaa dder Moxrxi yargo Yalluixr leil bbeix: ‘Niul leil Aezixr goxrjia gga hier teixl lei su Moxrxi ddei mel azo lerler pex dae a nr saexl; ni ngua leil bbex ar mel bei gger la, ngua leil jjiumo hier lol.’ ⁴¹ Yel yaa dder niurssor bbex ar ddei bei a, hal ddei leil zzeir seixl zi; yaa armael ddei armael bbex ar ddei bei teixl lei a, yaa dder yarzi ggese. ⁴² Arbosobo sirzzi a dder yaa leil i lei i meixl nr gger, guaxr lei guaxr meixl nr gger a. Yaa merlabbor bbo dae mel leil oldde texl niazzir a dder yaa leil texl lol. Hherdder xiezi ddei sul ber leil vaexr dae a Arbosobo ddar bbeix goxr a mel sael a nga:

‘Yirsaexllixl su ca mel,

nia mipaerbbae gga licei koxl hher a mel,

nia ngo leil azo lei ardoxr gger nr seix, azo lei seixl zi nr seix!

⁴³ Nia arddol ssi a mel dder

nia armael bei teixl lei Moxrloxl bbex hher ggie ddei

nei Lirfa ddei bbex leil bil dae a,

eil mel leil zi.

Yel ngo nia leil Babirluixr goxrjia maelleil ggaxr mal gger nia.’ⁿ

ⁿ7:43 Amoxrsi Sul 5:25-27 leil vaexr dae.

⁴⁴ Niul porpor mel mipaerbbae gga Sexlmuxl^o ar giex zza. Hal giex mel Arbosobo Moxrxi leil miardal a yar mia goxr mel dax zox dae a zi ar giex a. Yaa hal giex ba dae a mel, Arbosobo yaa dax hher dax dae yaa saexl.

⁴⁵ Sexlmuxl eil ddei mel niul porpor mel yaa giedae ca mel leil gger a. Arbosobo Jianaxr mermi su ca leil ggaxr teixl gger car, Yuesuyal yaa leil hier dae a Sexlmuxl ddei halmaex ba dil a. Zzirmar Daxlweixl dax hal zeix zzeze ci a lei sser dae seir. ⁴⁶ Arbosobo Daxlweixl leil yarzi ggesse. Yel yar dder Arbosobo dax: ‘Ngo leil ni leil hher ggie ar giex zi gger lol la,’ eine qiuxr. Arbosobo mel dder Yargel ddei Arbosobo ddei nga a.

⁴⁷ Nael giedae Arbosobo leil hher ggie zi gger su ddei zzael, Daxlweixl ddei ssor Sorloxmexr a.

⁴⁸ Nael nga zzael, mu zzir ggie hher dae Arbosobo mel ca zi teixl lei xi mel gga nr hher dae. Hherdder xiezi mel bbeix goxr mel sael a nga:

⁴⁹ Seirpor bbeix:

‘Merlabbor ddei mel ngo cux ggie,
middurbbor ddei mel ngo qihher toxl gex ggie.

Nia ngo leil hher ggie arsae ar giex zi gger niazzir dae neil?

Arddolmaex saelnei ngo wornol ggie nga neil?

⁵⁰ Hazza-hamaer lei ngo bei teixl lei a zzarmar?’ ”p

⁵¹ Sitixrfaxr yoxl Yoxrtaexl su ca ddei vaervaerpor mel leil bbeix: “Nael nia nixmox gex a, Arbosobo leil nr saexl su ca mel dax ciryoxr a nga! Nia mel nia porpor mel sael a arddolcar lei Arbosobo ddei Xiu ddei leil dir.

⁵² Xiezi arddol ddei leil nia porpor mel bixr nr goxr bbeixleir? Halleix yaa nixmox cirtaex-lorbba seir gaxzi ca hal ddei lei nia eine bbeix har zaxr a,

^o7:44 *Sexlmuxl*/Cu'aezixr Sul 26 leil biar dae.

^p7:50 Yirsaexlyal Sul 66:1-2 leil vaexr dae.

nia porpor mel dder yaa leil seixl zil gger. Eilleix nia yoxl nixmox cirtaex-lorbba seir gaxzi ca hal ddei leil vurler a seixl zil gger.

⁵³ Arbosobo tisir mel leil yar ddei Lixlfaxr mel nia leil bbeix gger lol a, nael nia zzael no-nr-ni.”

Sitixrfaxr Leil Legelbbe Zax Zil Gger

⁵⁴ Yoxrtaexl su ca ddei vaervaerpor mel noni ho a sirzzi zildu a, ser ddei lei giexrgiexlgiexr kexl gex dae a. ⁵⁵ Nael Arbosobo ddei Xiu ddei mel Sitixrfaxr nixmox zzar hher ji dae a, yar merlabbor i dae a, Arbosobo ddei bbobbolbbo mel leil mia a; yoxl Yisu Arbosobo yo piar a gga ngier dae ggie mia a. ⁵⁶ Yar bbeix: “Nia i ddo a! Merlabbor ddei ggapu a, Ca Ddei Ssor ddei Arbosobo yo piar a gga ngier dae a ngo mia a.”

⁵⁷ Ca mel dder nolba ddei ddaexrcir du lei a, worcixl-worni ae dae a, zzirzzir-ggergger beix mal a, Sitixrfaxr leil ssu gex dae a, ⁵⁸ yar leil zzi maelleil ggaxr teixl gger a, legelbbe sser a zax zil gger a. Yar leil goxl su ca mel pia teixlsibbor xiux lixr teixl lei a, Sarloxr mi caleixlssor ar ddei leil guaxr dae lol.

⁵⁹ Ca mel Sitixrfaxr leil legelbbe zax dae car a, yar Arbosobo leil ae dae a bbeix: “Seirpor Yisu, ngo ni leil qiuxr, ngo ddei xiu ddei leil ni dax cirgo a hher dae lol la!” ⁶⁰ Yar dder cizixl gger dae a, worcixl-worni ae dae a bbeix: “Arbosobo, ni yaa ddei zuixl eil mel yaa oldde leil tor nr ddeix lol!” Yar ddar eil mel bbeix jjia a dder si a.

8

¹ Ca mel Sitixrfaxr leil bei zil gger a Sarloxr zzir dae a bei ma a.

Sarloxr Yisu Leil Ddarzzi Su Ca Mel Leil Bixr

Hane cirdae, ca mel dder Yisu leil ddarzzi su ca mel leil bixr a, yel yaa

Yoxrtaexl mermi nei Sarmarlixlyal mermi cirmaex-hanga pa mal. Yisu miardal dae ca mel larnai Yiluxlsaler zzi gga hher dae. ² Arbosobo dax bei mae dae su ar mel a Sitixrfaxr leil giexlhex gger a, bbialil-bbialor aenge gger. ³ Sarloxr mel Yisu leil ddarzzi su mel leil bixr a, cirhhexr-hanga ake ddir a, ssormaer-ssorne leil lei ssu si a ge du lei a.

Yisu Leil Biar Dae Ddar Seirseir Mel Sarmarlixlyal Zzi Gga Biar Ci A

⁴ Cirmaex-hanga pa mal su ca hal mel nael, zzarvul-zzarmae ssi a, Arbosobo ddei ddar mel ca leil biar gger ssi. ⁵ Feilixl mi ca hal ddei nael, Sarmarlixlyal mermi zzi ar ddei gga ssi a, Arbosobo tiur har dae ca leil jiuksu ddei arseir a ca leil biar gger ssi. ⁶ Zzi gga ca mel Arbosobo Feilixl leil ddoddomo cirke bei lol ggie mia a dder zabbar seirseir a yar ddei ddar no. ⁷ Feilixl mel neir xiex dae ca cirke leil neir ggaxr gger a, neir zzu dder worcixl-worni ae dae a, ddux lei a; yar halae taba dae, pirdael dae ca cirke leil lei ggukor gger a. ⁸ Yel zzi gga su ca mel yarzi ggese.

⁹ Ximexr mi ca ar ddei zza. Yar zzir dae a armael yarzi ddo. Ca eil ddei mel zoxlzoxl a Sarmarlixlyal zzi gga ca mel leil neir bei gger a, yel ca mel yarzi murgur. ¹⁰⁻¹¹ Yar ca mel leil neir seirseil argielggur bei gger ho a, zzi gga ca mel dder yarzi murgur a, vaervaer-yeye lei Ximexr ddei ddar noni meixr, halae bbeix: “Ca eil ddei mel Arbosobo yar leil ddo lol arddeir a.” ¹² Nael ca mel Feilixl biar dae mel leil ddarzzi a dder capor ssormaer lei sexlsir a. Yar biar dae mel hherdder Arbosobo ddei goxr nei Yisu Zidu ddei ddar seirseir mel nga a. ¹³ Ximexr lei ddarzzi a, sexlsir a. Yar zoxlzoxl a Feilixl dax cirgo a hher dax dae. Yar Arbosobo Feilixl leil ddoddomo bei lol ggie mia a dder yarzisael murgur.

¹⁴ Yiluxlsaler zzi gga hher dae Yisu miardal dae ca mel Sarmarlixlyal mermi ca mel lei Arbosobo ddei ddar mel leil ddarzzi a bbejiur a dder Birdaexr nei Yuehal leil Sarmarlixlyal zzi gga ssi lol. ¹⁵⁻¹⁶ Halmaex gga Yisu leil ddarzzi su ca mel Seirpor Yisu ddei mi ddei leil koxl dae a sexlsir

ho a; nael Arbosobo ddei Xiu ddei halae yaa nixmox zzar hher nr ji dae seir. Yel, yaa nnel halmaex ssi ci a dder yaa leil Arbosobo dax ddar biar gger a, Arbosobo leil qie a, yar ddei Xiu ddei zei lei lol a, yaa nixmox zzar hher ji dae lol. ¹⁷ Giedae Birdaexr nei Yuehal dder leixrhher ddei yaa leil ta gex dae a, Arbosobo ddei Xiu ddei dder yaa nixmox zzar hher ji dae a.

¹⁸ Ximexr mel Yisu miardal dae ca mel leixrhher ddei ca mel leil ta gex dae a, Arbosobo ddei Xiu ddei dder yaa dax hher ji dae mia a yar dder yaa leil zzirbae vei gger a bbeix: ¹⁹ “Ngo leil lei nia sael a quexrlxl zza lol la. Ngo arseir leil ta gex dae mel, Arbosobo ddei Xiu ddei dder arseir nixmox zzar hher ji dae var.”

²⁰ Birdaexr yar leil ddarkoxl a bbeix: “Ni zzirbae sser a Arbosobo ddei Xiu ddei leil vae wo ddo eine zzir bel! Ni, ni ddei zzirbae ddei vei dae a dixlyuxl gga ssi ddo a! ²¹ Arbosobo i dae a ni mel nixmox neix, yel ni ngua dax cirgo a miar bei dax mi-nr-bbe. ²²⁻²³ Ngo i teixl lei a; ni nixmox zzar ngua leil nixnox dae halae zuixl bei meixr.” Ni eine nr seir xiar ji dae a, yel ni huixrsoxr nia; Arbosobo leil qiuxr a, ni leil ssoxrsuxl lol nia.

²⁴ Ximexr bbeix: “Ngo nia leil qiuxr, ngo leil Seirpor dax qiuxr gger la, nia bbeix dae cirza-hanga nr seir mel ngo oldde leil tor nr ddeix lol.”

²⁵ Birdaexr nei Yuehal yaa Seirpor Yisu leil ddarzzi ho a, arsae lerler nga goxr mel, ca leil zabbar seirseir a biar gger, halae Yisu ddei ddar mel ca leil biar gger a, giedae yaa Yiluxlsaler zzi gga jjixr a. Yaa jjiumo car gga, kebal Sarmarlixlyal su ca ddei kax gga ssi gel a, Yisu ddei ddar seirseir mel biar gger.

Feilixl Nei Aesaexl'exrbiryal Goxrjia Su Ca Ar Ddei Leil Biar

²⁶ Seirpor ddei Tisir ar ddei a Feilixl leil bbeix: “Ni naxrfa piar a gga ssi ddo a; hherdder Yiluxlsaler zzi gga cirdae a Jiasar zzi gga ssi ggje jjiumo zex leil ssi.” Jjiumo eil zex mel mipaerbbae gga ssi, ca ssi su nr zza.

²⁷ Feilixl dder nialngasael ssi a. Yar Aesaexl'exrbiryal goxrjia su ca ar ddei dax zzi a. Ca eil ddei mel taexlji ar ddei a.⁹ Yar mel ssormaer zzirmar Gadaxlji mi ddei leil zzirbae ji ggie guaxr gger su vaervaerpor ar ddei a. Yar Yiluxlsaler zzi gga Arbosobo leil zi ssi a, jjixr lei. ²⁸ Yar jjixr lei car a, marcae jiaxl leil cux dae a, xiezi Yirsaexlyal vaexr teixl lei sul ber leil zza dae. ²⁹ Arbosobo ddei Xiu ddei Feilixl leil bbeix: “Ni marcae jiaxl dax ssi naer ssi.”

³⁰ Feilixl dder taexlji hal ddei dax beix mal a, yar xiezi Yirsaexlyal vaexr teixl lei sul ber zza ggie bbejjiur a. Yel dder yar leil biex a bbeix: “Ni zza dae mel arddolyox yilsi a, ni saexl saexl?”

³¹ Yar ddarkoxl a bbeix: “Ngo leil mulggersu nr zza mel, ngo arsae saexl var bbeixleir?” Yel yar dder Feilixl leil qie a yar dax cirgo a cux dax dae lol.

³² Yar zza dae Arbosobo ddei ddar hal qier mel bbeix:

“Yar mel ya ar ddei leil gga si a, seixl zil sael a nga;
yar yoxl yassor leil me ddaex dae car a, arjjiuljjiu arla hher dae,
meir ddei mix gex dae sael a nga.

³³ Si yar leil bei vuxryixr car a,
ca mel yar leil bbaehhexhhex a nr ser;
yel yar ssormine lei nr zza dder si a.”⁵

³⁴ Taexlji hal ddei Feilixl leil biex a bbeix: “Xiezi mel bbeix dae ddar eil mel mel arseir leil bbeix arddeir a leir? Armael leil bbeix bbeixsael si leil bbeix arddeir a?” ³⁵ Feilixl dder xiezi mel bbeix dae ddar eil qier leil biar

⁹**8:27** *Ca eil ddei mel taexlji ar ddei a.* Yar ssormaer mel dax naer nr cexr.

⁵**8:33** Yirsaexlyal Sul 53:7-8 leil vaexr dae.

beil a, yar leil Yisu leil biar dae ddar seirseir mel biar gger.

³⁶ Yaa ajjix zza ggie ar maex ssi ci a, taexlji ddei bbeix: “Ni arleixr i, eilmaex gga ajjix zza. Ngo sexlsir cexr cexr?” ³⁷ [Feilixl bbeix: “Ni nixmox zzar ddarzzi gaxzi arddeirnga a dder sexlsir cexr.” Yar ddarkoxl a bbeix: “Ngo, Yisu Zidu mel Arbosobo ddei Ssor a ddarzzi.”]^t ³⁸ Yel dder marcae jiaxl leil nor dae lol a, Feilixl yar dax cirgo a ajjix gga ze i a, yar leil sexlsir gger. ³⁹ Yaa ajjix gga ddeix lei a qie, Feilixl leil mel Arbosobo ddei Xiu ddei hier si a. Yar Feilixl leil nr mia a. Yar dder ggegge-sese a ssi a. ⁴⁰ Feilixl mel Yalsordu zzi gga ssi ci a, ca mel yar leil mia a. Yar halae zzi cirddeir-hanga gga ssi gel a Yisu leil biar dae ddar seirseir mel ca leil biar gger, Kaersarlixlyal zzi gga zzeze lei ssi ci a.

9

Sarloxr Yisu Leil Ddarzzi

¹ Sarloxr zzael ddar yarzi gexrddo te a, Yisu dax mae dae su ca mel leil seixl zil gger nia zux doxr dae. Yar Arbosobo leil zi su vaer zzir ddei dax ssi a, ² yar leil qie a, Daxlmarsixlgexr zzi gga Yoxrtaexl su mel Arbosobo ddei sulzzaggie vaervaerpor mel leil xil vaexr gger lol. Yel Sarloxr dder xil fo vei dae a, halmaex ssi a, Yisu leil ddarzzi su ca mel leil ssu ssi cexr. Capor ssormaer lei nr guaxr, ha zo wo a dder Yiluxlsaler zzi gga ssu mal. ³ Sarloxr Daxlmarsixlgexr zzi gga ssi ci ddo jiur car a, neixleixrsael merlabbor bbobbolbbo bbo ze i lei a, yar leil zaza-lili zoxl gex dae a. ⁴ Yar dder middur ddei leil puxr gex dae a, qiurte ar ddei bbejjiur a yar leil bbeix: “Sarloxr, Sarloxr, ni arsaenga a ngo leil bixr?”

^t8:37 [Feilixl bbeix: “Ni nixmox zzar ddarzzi gaxzi arddeirnga a dder sexlsir cexr.” Yar ddarkoxl a bbeix: “Ngo, Yisu Zidu mel Arbosobo ddei Ssor a ddarzzi.”] Arbosobo Ddei Sul cirberber a ddar eil qier nr zza.

⁵ Yar dder biex a bbeix: “Seirpor, ni arseir a leir?”

Qirte hal ddei ddarkoxl a bbeix: “Ngo mel dder ni bixr dae Yisu ddei nga a. ⁶ Ha du la! Zzi gga ddir, ni azo lerler bei nia mel ca ni leil bbeix gger su zza.”

⁷ Yar dax cirgo a ssi dae su ca mel qirte zzael bbejjiur, ca zzael nr mia a, yel ddar lei te teixl lei nr xie, halmaex ngier dae lalnga a. ⁸ Sarloxr dder middur ddei leil ha du lei a, meixddur ddei pu kae a, azo lei ar ddei mia nr xie. Yar dax cirgo a ssi su ca mel dder yar leixrhher leil gga dae a, Daxlmarsixlgexr zzi gga ddir a. ⁹ Yar mia nr xie so ni nga a. Eil so ni gga mel, zzor lei nr zzor, dda lei nr dda.

¹⁰ Daxlmarsixlgexr zzi gga mel Yisu dax mae dae su ca ar ddei zza, yar leil Yalnaxrnixryal mi. Seirpor yar leil meixcir mia lol a, yar leil bbeix: “Yalnaxrnixryal.”

Yar ddarkoxl a bbeix: “Seirpor, azo bbeix?”

¹¹ Seirpor yar leil bbeix: “Nialngasael Zzi ‘Zzalzzar’ ae hal jiul gga ssi! Yoxrdaxl hhexr ake gga Daxlsuxl zzi gga su ca Sarloxr mi hal ddei leil zo ssi. Eilcar a yar ngo dax ddar biar dae. ¹² Yar Yalnaxrnixryal mi ca ar ddei a ddir lei a, yar leil ta gex dae a, yar dder mia xie a; meixcir eine ar ddei mia a.”

¹³ Yalnaxrnixryal ddarkoxl a bbeix: “Seirpor, ca eil ddei Yiluxlsaler zzi gga hher dae car a, ni ddei cassor-worssor leil gexrddoddomo bixr mel ca seirseil a ar ke a lei ngo leil biar gger goxr a. ¹⁴ Eilcar a yar eilmaex lei a, Arbosobo leil zi su vaervaerpor mel yar leil vaexr gger xixl ddei vei dae a, yar leil quexrlixl gger a ni leil ddarzzi su ca maelmaerjgia leil ssu lei lol.”

¹⁵ Nael Seirpor Yalnaxrnixryal leil bbeix: “Ni ssi ddo a! Yar mel ngo tiur har dae ddei nga a. Yar Yoxrtaexl su nr nga ca mel leil nei zzirmar mel leil halae Yirsaexllixl su ca mel leil ngo arseir a biar gger ssi nia. ¹⁶ Yar

ngo leil weix a, hormo goxr sol nia, ngo yar leil saexl lol.”

¹⁷ Giedae Yalnaxrnixryal dder ssi a. Yar ca hal hhexr dax ddir a leixrhher ddei Sarloxr leil ta gex dae a bbeix: “Nimar Sarloxr, jjiuno car gga ni leil mia lol su Seirpor Yisu ddei mel ngo leil miardal a ni leil mia xie lol, halae Arbosobo ddei Xiu ddei ni nixmox zzar hher ji dae lol.”

¹⁸ Sarloxr meixddur ddei leil mel cirleixr dder ngol qiux sael a ar mel de zei lei a, yar dder mia xie a. Giedae yar ha du lei a sexlsir a. ¹⁹ Yar almeixr zzor ji a dder worni du lei a.

Sarloxr Ca Leil Arbosobo Ddei Ddar Biar Gger

Yar mel Daxlmarsixlgexr zzi gga Yisu dax mae dae su ca mel dax nr ni sael hher dax a. ²⁰ Yar dder nialngasael Yoxrtaexl su mel Arbosobo ddei sulzzaggie gga ssi a, Yisu mel Arbosobo ddei Ssor a ca leil biar gger.

²¹ Ha bbejjiur ca mel dder murgur a bbeix: “Armor! Ca eil ddei doxl nr nga Yiluxlsaler zzi gga hher dae a, Yisu leil ddarzzi su mel leil bixr su ddei nga a zzarmar? Yar eilmaex lei a yaa leil ssu lei a, Arbosobo leil zi su vaervaerpor mel dax hier mal gger arddeir a zzarmar?” ²² Nael Sarloxr mel, ho bbeix ho meir yarzi ddo, yar ca leil Yisu mel dder Arbosobo tiur har dae ca leil jiuxlsu ddei ngazi a biar gger.

Daxlmarsixlgexr zzi gga hher dae Yoxrtaexl su ca mel lei bbeixddu lei nr zza.

²³ Argielggur goxr ho a, Yoxrtaexl su ca mel Sarloxr leil seixl zil gger nia zzubbe. ²⁴ Yaa mel Sarloxr leil seixl zil gger niazzir dae a, yel

merxixl-merni zzi ddei gielmi ggu qier halmaex su doxr dae. Nael yaa zzubbe dae ddar mel, ca mel Sarloxr leil bbeix gger a. ²⁵ Eine ar xixl a, Sarloxr dax mae dae su ca mel yar leil beller ar taex gga hher ji dae lol a, zzi weixrqiaxr ddei leil diux zei gger a.

²⁶ Giedae Sarloxr Yiluxlsaler zzi gga lei ci a, yar Yisu dax mae dae su ca mel dax cirgo a hher niazzir. Nael yaa Sarloxr yarzi Yisu dax mae dae su

ca ar ddei a ddar-nr-zzi. Yaa maelmaerjjia lei yar leil gexr. ²⁷ Banaxrba larnei yar leil hexl, yar leil hier dae a, Yisu miardal dae ca mel dax ssi. Banaxrba Sarloxr jjiumo car gga Seirpor leil arsae mia, Seirpor yoxl yar dax arsae ddar bbeix, halae yar Daxlmarsixlgexr zzi gga hher dae a, nixmox vaervaermo Yisu ddei mi ddei leil koxl dae a, Arbosobo ca leil arsae jiuxl biar eil mel yaa leil biar gger a. ²⁸ Yel Sarloxr dder Yiluxlsaler zzi gga hher dae Yisu leil ddarzzi su ca mel dax ssissi-leilei yarzi seir. Yar nixmox vaervaermo, Seirpor Yisu ddei mi ddei leil koxl dae a, halmaex gga ca mel leil Arbosobo ca leil arsae jiuxl biar gger. ²⁹ Yar halae Xilaxl goxrjia ddei ddar te var Yoxrtaexl su ca mel dax ddar biar, yaa dax zex doxr. Yaa zrael yar leil seixl zil gger niazzir dae. ³⁰ Yisu leil ddarzzi su mel si Sarloxr leil seixl niazzir dae saexl a dder yar leil Kaersarlixlyal zzi gga ho mal a, Daxlsuxl zzi gga ssi lol.

³¹ Halcar a mel, Yoxrtaexl mermi, Jialixllixl mermi nei Sarmarlixlyal mermi cirmaex-hanga jiaxlhuixl gga ca mel zzasoso arla argielggur zza a. Yaa Seirpor leil i du a yar leil gexr, Arbosobo ddei Xiu ddei yaa leil nixmox ddei hhel du lei lol, yel Yisu leil ddarzzi su ca cirke miur dax a.

Birdaexr Liurdal Kax Nei Yuepal Zzi Gga Hher Dae

³² Eine goxr ho a, Birdaexr cirmaex-hanga ssi a, Liurdal zzi gga goxr dae Arbosobo ddei cassor-worssor mel dax lei ssi ci a. ³³ Yar halmaex gga Yirnixyar mi ca ar ddei pex dae a. Ca eil ddei mel taba a, yixrgguci leil heixl koxl yixr a. ³⁴ Birdaexr yar leil bbeix: “Yirnixyar, Yisu Zidu ni leil ggukor gger a. Ni ha du la a, ni kar dae zul arleixr se.” Yel Yirnixyar cirleixr dder ha du lei a. ³⁵ Liurdal zzi nei Saluixr mermi goxr dae ca mel Yirnixyar leil ggukor gger ggie mia a dder Seirpor Yisu leil ddarzzi a.

³⁶ Yuepal zzi gga Yisu dax mae dae ca ssormaer ar ddei zza,

Daxlbirdaxl mi. Xilaxl goxrjia ddei ddar bbeix a mel yar leil Dojia^u mi. Yar zoxlzoxl a seirseir bei, casolssor leil beijjiu.³⁷ Cir ni a yar no a si a. Ca ar mel a yar leil cir seibeix gger ho a, lebbor xi ar giex gga dol dae a, halae giexl-nr-hex ssi seir.³⁸ Liurdal zzi ddei mel Yuepal zzi dax naer dae. Yisu dax mae dae ca mel Birdaexr Liurdal zzi gga hher dae bbejjiur a dder ca nnel leil zi a, Birdaexr leil qiuxr ssi lol a bbeix: “Nialngasael ngua Yuepal zzi gga ssi, tor da-nr-wo hor.”

³⁹ Yel Birdaexr dder ha du lei a yaa dax cirgo a ssi a. Ssi ci a, yaa yar leil lebbor hier deix a. Maermocir maelmaerjgia lei Birdaexr dax ngier dae a nge, halae Dojia gol dae seir car a, yaa leil naexr gger pia mel, Birdaexr leil i lol.

⁴⁰ Birdaexr dder yaa maelmaerjgia leil ddux lol a cizixl gger dae a, Arbosobo dax ddar biar. Giedae yar ca sima ddei dax za xixl a bbeix: “Daxlbirdaxl, ha du la!” Dojia dder meixddur ddei pu kae a Birdaexr leil mia a, cux du lei a.⁴¹ Birdaexr yar leil gga a ngier du lei lol, yel maermocir mel leil nei kebal Arbosobo ddei cassor-worssor mel leil ddir jjixr lei lol a, Dojia gol du xixl lei ho a yaa leil i lol.⁴² Birdaexr bei dae eil mel mel Yuepal zzi gga biar jiax a; yel ca cirke a lei Seirpor Yisu leil ddarzzi a.⁴³ Eine goxr ho a, Birdaexr Yuepal zzi gga sur zzi niux su Ximexr mi ca ar ddei dax zae nr ni sael hher a.

10

Genixrliuxr Birdaexr Leil Qie Si Lei

¹ Kaersarlixlyal zzi gga mel Genixrliuxr mi ca ar ddei zza. Yar mel meixr cirxiu guaxr su ca ar ddei a. Yar guaxr dae meixr hal cir a mel Yixldaxllixl su ca.² Yar mel Arbosobo dax bei mae dae su ca ar ddei a.

^u9:36 *Dojia* Dojia mi eil ddei ddei yilsu ddei mel dder ci.

Yaa cirhhexr-lorbba lei Arbosobo leil i du yar leil gexr. Halae Yoxrtaexl su casolssor mel leil cirza-hanga gger, yoxl zoxlzoxl a Arbosobo dax ddar biar doxr. ³ Eine ar ni a, 3:00 sael ci a, Genixrliuxr meixcir mia a. Yar seicircirmo Arbosobo ddei tisir ar ddei a yar dax ddir lei ggie mia a bbeix: “Genixrliuxr!”

⁴ Genixrliuxr dder meix lei nr cix yar leil i dae a, gexr zildu a bbeix: “Seirpor, arddolyox bbeix?”

Tisir ddei bbeix: “Ni Arbosobo dax ddar biar a, yar bbejjiur a. Ni casolssor leil cirza-hanga gger a lei Arbosobo mia a. Yar yarzi ggese.

⁵ Eilcar a, ni ca leil zi a Yuepal zzi gga ssi lol a, Ximexr Birdaexr mi ca hal ddei leil ni ake qie si lei lol. ⁶ Yar neixvi qier leil goxr dae sur zzi niux su Ximexr mi ca hal ddei ake hher dae.”

⁷ Genixrliuxr dax ddar biar dae tisir ddei ssi jixr ho a, yar dder yar ake gga yar leil visser su ca nnel leil nei Arbosobo dax bei mae dae su meixr ar ddei leil ae si lei a. Meixr eil ddei zoxlzoxl a yar leil beijjiu. ⁸ Yar dder yar pex dae mel yaa leil biar gger a, yaa leil zi a, Yuepal zzi gga ssi lol.

Birdaexr Meixcir Mia

⁹ Giedae cir ni 12:00 sael ci a, yaa zzi hal ddei dax ssi ci jiur a, Birdaexr xipaebbor ddeix a, Arbosobo dax ddar biar ssi. ¹⁰ Yar almeixr meixr a, almeixr zzor niazzir. Ca hal hhexr zzo bei dae car a, Birdaexr meixcir mia a. ¹¹ Merlabbor ddei alddur sael a ggapu si a, yar maeco lesel ar co zei lei ggie mia a. Maeco hal co mel giexrluxl liller leil neixl gex dae a middur ddei leil diux zei lei dae. ¹² Maeco co gga qihher li bbor niar dae cirza-hanga zzeir nei cinil halae yirvu-nilhax nei bbiu dae ngaxssor-ngaxne hher ji dae. ¹³ Yoxl qiurte ar ddei a yar leil bbeix: “Birdaexr, ha du lei a, seixl zil gger a, zzor ji!”

¹⁴ Nael Birdaexr bbeix: “Seirpor, ngo eine bei nr ddo. Ngo Moxrxi vaexr dae Lixlfaxr dax bei mae dae a, zeixleixr lei yar bbeix dae sei-nr-beix

zzorddu mel zzor nr seix.”

¹⁵ Giedae qiurte ddei yoxl nr boxl ddei yar leil bbeix: “Arbosobo seibeixbeix arla loxr lol zzaegu mel, ni sei-nr-beix i mal gger nr ddo.”

¹⁶ Eil mel sael a eine so boxl bbeix a, mae hal co dder merlabbor se deix xixl si a.

¹⁷ Birdaexr yar mia mel azo yilsi zza xiar ji doxr dae seir, Genixrliuxr miardal si lei a yar leil i lei su ca mel dder Ximexr hhexr ake biex wo a, alddur ggucirmi ngier dae a. ¹⁸ Yaa ae dae a biex a bbeix: “Eilmaex gga Ximexr Birdaexr mi ca ar ddei hher hher dae?”

¹⁹ Birdaexr halae yar mia mel azo yilsi a xiar doxr dae seir, Arbosobo ddei Xiu ddei yar leil bbeix: “Ca soler a ni leil zo lei a. ²⁰ Ni ha du la a, zeijjixr. Ni yaa dax cirgo a ssi nia. Ni cirza lei xiar nr ssa. Yaa leil mel ngo miardal si lei arddeir a.”

²¹ Yel Birdaexr dder zeijjixr a yaa leil bbeix: “Ngo mel dder nia zo dae ca ddei nga a. Nia azo bei lei arddeir a?”

²² Yaa bbeix: “Meixr cirxiu guaxr su Genixrliuxr ngua leil miardal si lei. Yar mel nixmox seir su ar ddei a; Arbosobo leil i du, yar leil gexr, halae Yoxrtaexl su ca maelmaerjjia lei yar leil i du. Seirceix-seirmaer tisir ar ddei a yar leil bbeix gger a ni leil qie a, yar ake ssi a, yar leil mul gger lol.” ²³ Birdaexr dder yaa leil ake qie dil a, yaa yar dax cirgo a ar xixl xixl a. Giedae cir ni ha du lei a, yar dder yaa dax cirgo a ssi; halae Yuepal zzi gga Yisu leil ddarzzi su nrnelsael a lei yar dax cirgo a ssi a.

²⁴ Yoxl ar ni goxr a yaa Kaersarlixlyal zzi gga ssi ci a. Genixrliuxr yar ddei circir-ssorssor nei yar ddei gaxggor carbeix mel leil qie har ho a, yaa leil xia dae a. ²⁵ Birdaexr ddir a qie, Genixrliuxr dder yar leil zi lei a, yar qihher ddei dax cizixl gger. ²⁶ Nael Birdaexr yar leil gga du lei a bbeix: “Ha du la; ngo lei ca lar nga.”

²⁷ Birdaexr dder yar dax ddar ho biar ho ake gga ddir a, ca cirke hher

ggie mia a ²⁸ dder yaa leil bbeix: “Nia lei saexl, ngua leiddur ddei dax zox a mel, Yoxrtaexl su ca nei Yoxrtaexl su nr nga ca mel zzi dax toltor a, ssissi-leilei ssi nr ddo. Nael Arbosobo ngo leil bbeix arseir leil lei sei-nr-beix, yarzi naex i mal gger nr ddo. ²⁹ Yel nia ngo leil qie lei a, ngo dder lei yuex. Eilcar a ngo nia leil biex, nia arsaenga a ngo leil qie si lei?”

³⁰ Genixrliuxr bbeix: “Li ni xilmeir leil 3:00 sael ci a, ngo ake Arbosobo dax ddar biar dae car a, neixleixrsael pia bbobbolbbo veixr su ar ddei a ngo xilmeir ngier dae a ³¹ bbeix: ‘Genixrliuxr, ni Arbosobo dax ddar biar dae mel Arbosobo bbejjiur a; ni ca leil cirza-hanga gger a lei Arbosobo mia a. ³² Eilcar a, ni ca leil zi a, Yuepal zzi gga ssi lol a, Ximexr Birdaexr mi ca hal ddei leil qie si lei lol. Yar neixvi qier leil goxr dae a, sur zzi niux su Ximexr mi ca hal ddei ddei ake hher dae.’ ³³ Yel ngo dder nialngasael ca leil miardal a ni leil qie ssi lol. Ni ngua dax lei yuex a mel, yarzi seir. Eilcar a ngua Arbosobo meixsaer qier leil hher dae a, Seirpor ni leil miardal a bbeix lol ddar maelmaerjgia leil noni nia.”

Yisu Leil Biar Dae Ddar Seirseir Mel Birdaexr Ca Leil Biar Gger

³⁴ Birdaexr bbeix: “Arbosobo mel ca cirddeir-hanga leil lei ciryoxr a nga ngo i teixl lei a. ³⁵ Ha seirseir bei a, Arbosobo leil i du yar leil gexr su ca mel, arddol cuxr nga zzorbbeixlei, Arbosobo yaa leil ggese. ³⁶ Arbosobo mel Yirsaexllixl su ca mel leil arsae bei a saelnei yar dax toltor a nga xixl cexr saexl lol a. Hherdder yaa mel Yisu Zidu leil koxl dae a saelnei yar dax toltor a nga xixl cexr. Eil ddei mel dder ddar seirseir ddei nga a.

³⁷ Yuehal ca leil sexlsir gger ho a, yoxl Jialixllixl mermi cirdae a Yoxrtaexl mermi cirmaex-hanga arsae lerler bei hal mel mel nia lei saexl.

³⁸ Arbosobo Naxrsalexl su ca Yisu leil yar ddei Xiu ddei gger nei yar leil ddoddomo bei lol eil mel mel nia lei saexl. Arbosobo yar dax hher dax dae a, yar cirmaex-hanga ssi a, yarzi seir bei, ha neir xiex dae ca maelmaerjgia leil lei ggukor gger.

³⁹ Yar Yiluxlsaler zzi gga nei Yoxrtaexl mermi bei dae cirza-hanga lei ngua mia goxr a. Ca mel yar leil sixrzixljiaxl ddei leil diexr zil gger a, ⁴⁰ giedae so ni cir ni ci a, Arbosobo yoxl yar leil gol du xixl lei lol a, ca leil mia lol a. ⁴¹ Nael ca maelmaerjgia leil mia lol nr nga, ngua leil lar mia lol. Ngua mel hherdder Arbosobo tiur har dae Yisu si a yoxl gol du xixl lei a yar dax cirgo a zzorzzor-ddadda su ca mel nga a. ⁴² Yisu ngua leil miardal a ca maelmaerjgia leil yar ddei ddar mel biar gger ssi lol, halae yar mel dder Arbosobo tiur har dae a, ca gol dae nei ca si ho mel leil ser su ddei nga a biar gger ssi lol. ⁴³ Xiezi maelmaerjgia lei biar goxr a: ha yar leil ddarzzi su ca mel yar ddei mi ddei leil koxl dae a, Arbosobo dder yaa ddei zuixl ssoxrsuxl.”

Arbosobo Ddei Xiu Ddei Yoxrtaexl Su Nr Nga Ca Mel Dax Hher Dax Dae

⁴⁴ Birdaexr halae ddar eil mel biar dae seir, Arbosobo ddei Xiu ddei dder zei lei a, yar leil noni su ca cirddeir-hanga nixmox zzar hher ji dae a. ⁴⁵⁻⁴⁶ Birdaexr dax cirgo a lei, Yisu leil ddarzzi su Yoxrtaexl su ca mel Arbosobo ddei Xiu ddei Yoxrtaexl su nr nga ca mel nixmox zzar lei hher ji dae mia nei Yoxrtaexl su nr nga ca eil mel kebal ddar te a, Arbosobo leil bbeix zae gger ggje bbejjiur a dder murgur zildu a.

Birdaexr bbeix: ⁴⁷ “Arbosobo ddei Xiu ddei ca eil mel nixmox zzar hher ji dae a, yaa lei niul dax ciryoxr a nga, arseir lei yaa leil sexl-nr-sir lol bbiur gex dae nr cexr.” ⁴⁸ Yel Birdaexr dder yaa leil miardal a, Yisu Zidu ddei mi ddei leil koxl dae a, yaa leil sexlsir lol. Yaa yoxl Birdaexr leil qie a yaa dax nr ni sael hher dax lol.

11

Birdaexr Arsae Lerler Nga Mel Yisu Leil Ddarzzi Yoxrtaexl Su Ca Mel Leil Biar Gger

¹ Eine goxr ho a, Yisu miardal dae ca mel nei Yoxrtaexl mermi cirmaex-hanga Yisu leil ddarzzi su ca mel Yoxrtaexl su nr nga ca mel lei Arbosobo ddei ddar mel leil ddarzzi a bbejiur a. ² Birdaexr Yiluxlsaler zzi gga lei ci ho a, Yisu leil ddarzzi su Yoxrtaexl su armel a yar leil bota a bbeix: ³ “Ni gelir bei nr goxr su ca mel ake ddir nr ddo arddeir a lei, nael ni halae yaa dax cirgo a almeixr zzor!”

⁴ Birdaexr dder zabbar seilseir arla xilmeir arsae nga, giedae arsae nga, cir yoxr cir yoxr yaa leil biar gger a bbeix: ⁵ “Ngo Yuepal zzi gga hher dae a, Arbosobo dax ddar biar dae car a, ngo meixcir mia a, mae lesel ar co a giexrluxl liller leil neixl gex dae a, merlabbor diux zei lei a, ngo xilmeir diux dol dae a. ⁶ Ngo meix lei nr cix i dae a, mae co gga mel qihher li bbor niar dae zzeir nei cinil, halae yirvu-nilhax nei bbiu dae ngaxssor-ngaxne hher ji dae ggie mia a. ⁷ Ngo halae qiurte ar ddei bbejiur a ngo leil bbeix: ‘Birdaexr, ha du lei a, seixl zil gger a zzor ji!’ eine bbeix a.

⁸ Nael ngo bbeix: ‘Seirpor, ngo eine bei nr ddo. Ngo Moxrxi vaexr dae Lixlfaxr ddei dax bei mae dae a, zeixleixr lei yar bbeix dae sei-nr-beix zzorddu mel zzor nr seix.’

⁹ Giedae qiurte ddei yoxl nr boxl ddei ngo leil bbeix: ‘Arbosobo seibeixbeix arla loxr lol zzaegu mel, ni sei-nr-beix i mal gger nr ddo.’

¹⁰ Eil mel sael a eine so boxl bbeix a, mae co dder merlabbor se deix xixl si a.

¹¹ Halcar malmal, Kaersarlixlyal zzi gga miardal teixl lei ca soler a, ngo leil i lei a, ngo hher dae ca hal hhexr ggucirmi lei ci a. ¹² Arbosobo ddei Xiu ddei ngo leil bbeix, yaa dax cirgo a ssi nia, cirza lei xiar nr ssa. Arzzi-nimar eil qiuxller lei ngo dax cirgo a ssi a. Ngua ssi ci a dder Genixrliuxr mi ca hal ddei ddei ake gga ddir a. ¹³ Genixrliuxr dder yar arsae tisir ar ddei leil yar ake ngier dae ggie mia a ngua leil bbeix gger.

Yar halae tisir ddei yar leil ‘Ni ca leil zi a Yuepal zzi gga ssi lol a, Ximexr Birdaexr mi ca hal ddei leil ni ake qie si lei. ¹⁴ Yar ni leil ddar biar gger ddu ar mel zza. Nia ddarzzi a mel, ni nei ni ake ca cirhexr-lorbba leil lei jiuxl wo var,’ bbaexl eine bbeix a.

¹⁵ Yel ngo biar du lei a qie, Arbosobo ddei Xiu ddei dder zei lei a, yaa nixmox zzar hher ji dae a; niul dax hher dax beil boxl sael a nga. ¹⁶ Yel ngo dder Seirpor ddar bbeix goxr a mel leil holcir du xixl lei a; yar bbeix goxr a bbeix: ‘Yuehal mel ajjix sser a ca leil sexlsir gger, nael Arbosobo mel yar ddei Xiu ddei sser a, nia leil sexlsir gger nia.’ ¹⁷ Arbosobo yaa leil seir lol a, yar ddei Xiu ddei yaa dax hher ji dae lol a, hherdder halleix niul Seirpor Yisu Zidu leil ddarzzi car a niul leil seir lol mel sael a nga. Ngo arsae Arbosobo leil bbiur gex dae cexr bbeixleir?”

¹⁸ Ca mel noni ho a dder zeixleixr Birdaexr leil bo-nr-ta a. Yaa Arbosobo leil bbeix zae gger a bbeix: “Arbosobo mel Yoxrtaexl su nr nga ca mel leil lei huixrsoxr lol, cirse-cirsil yar dax goxr dae lol.”

Atixr'a Zzi Gga Jiaxluixl Leil Biar

¹⁹ Sitixrfaxr leil seixl zil gger car a, ca mel Yisu leil ddarzzi su ca mel leil bixr a, yaa dder cirmaex-hanga bbe mal a. Yaa Feinixrzi mermi nei Saexlpurluxlsi dal halae Atixr'a zzi gga ssi a. Yaa Yoxrtaexl su nr nga ca mel leil Arbosobo ddei ddar biar nr gger, Yoxrtaexl su ca mel leil lar biar gger. ²⁰ Nael kebal Saexlpurluxlsi dal nei Gurlixlnaexl zzi gga su ca mel Atixr'a zzi gga ssi ci a, Xilaxl su ca mel leil lei Seirpor Yisu leil biar dae ddar seirseir mel biar gger a. ²¹ Seirpor yaa leil yarzi ddo lol a, yel Seirpor leil ddarzzi a yar dax mae lei su ca mel cirke miur dax.

²² Yiluxlsaler zzi gga jiaxluixl gga ca mel cirza-hanga eil mel bbejjiur a dder Banaxrba leil miardal teixl a Atixr'a zzi gga ssi lol. ²³ Yar halmaex gga ssi ci a, Arbosobo ca mel leil cirza-hanga seirseir meixl gger ggie mia a dder yarzi ggese. Yar ca mel leil quex a nixmox cirtaex-lorbba

Seirpor leil ddarzzi doxr dae nia. ²⁴ Banaxrba mel ca seir ar ddei a. Arbosobo ddei Xiu ddei yar nixmox zzar bbilbbi hher ji dae, yar Arbosobo leil yarzisael ddarzzi a, yel ca cirke a lei Seirpor leil ddarzzi a.

²⁵ Giedae yar dder Daxlsuxl zzi gga ssi a, Sarloxr leil zo ssi. ²⁶ Yar zo wo a dder Sarloxr leil hier dae a Atixr'a zzi gga ssi. Yaa nnel halmaex jiaxlhuixl gga ca mel dax cir koxl hher a, ca cirke leil mul gger a. Yisu dax mae dae su mel leil “Zidu leil ddarzzi su” ae a mel, Atixr'a zzi gga ae du lei beil arddeir a.

²⁷ Halgielggur, xiezi nnelael a Yiluxlsaler zzi gga cirdae a Atixr'a zzi gga zei lei a. ²⁸ Yaa ca mel gga mel, Yaljiabul mi ca ar ddei zza. Arbosobo ddei Xiu ddei yar leil ca leil bbeix gger lol: arddolcar a, mer woxrke ca mel yarzi larhor zzorddu nr zza nixixl goxr nia. Giedae Gexrlardiu mi ca hal ddei Loxrmar goxrjia ddei zzirmar bei dae halleix, yarzi zzorddu nr zza a. ²⁹ Yel Yisu dax mae dae su ca mel dder cirddeir-hanga lei zzirbae dux du lei a Yoxrtaexl mermi Yisu leil ddarzzi su ca mel leil gger. Yaa miur zza a nael, miur gger; nganiul zza a nael, nganiul gger. ³⁰ Yaa eine bei a, yel Banaxrba nei Sarloxr leil qie a, zzirbae dux du lei mel Yoxrtaexl mermi Yisu leil ddarzzi su ca leil guaxr su camar mel dax ho mal gger lol a, ca mel leil bbe gger lol.

12

Yisu Leil Ddarzzi Su Ca Mel Leil Yarzi Larhor Bixr

¹⁻³ Miljiazi ji nr goxr aba zzor jiax goxr dae halcar a malmal, zzirmar Silixl ddei mel yar woxrke ca leil miardal a Yiluxlsaler zzi gga jiaxlhuixl gga ca ar mel leil ke ssi lol. Yaa altor sser a, Yuehal yargo Yargel leil seixl zil gger a. Yar eine bei a, Yoxrtaexl su ca ddei vaervaerpor mel yarzi ggese yar mia a, yar dder yar woxrke ca mel leil miardal a Birdaexr leil ssu ssi lol. ⁴ Yel yaa Birdaexr leil ssu wo a dder cageggie ge ji dae a,

meixr li cir leil jia gger a guaxr dae lol. Arddol cir lei meixr lil ler zza. Yuelyuel jiax goxr jjia ho a, yar ca mel meixsaer qier leil Birdaexr leil ser niazzir dae. ⁵ Birdaexr leil ge ji dae car a, jiaxlhuixl gga ca mel zabbar seilseir arla yar leil Arbosobo dax ddar biar gger.

Tisir Birdaexr Leil Loxrgier Ggie Hier Teixl Lei

⁶ Birdaexr leil ser du xilmeir hal cir xixlmei mel, Birdaexr meixr nnel agala gga yixr dae, yar leil hexsox nr zex neixl gex dae, halae alddur su su mel lei alddur ddei dax ngier dae a su doxr dae. ⁷ Neixleixrsael tisir ar ddei a yar dax ngier dae a, bbelelemo ar zex a cageggie xi giex gga zoxl dil lei a. Tisir ddei Birdaexr leixrzixlpaee ddei leil ta ssi a, yar leil ta zucur gger a bbeix: “Nialngasael ha du la.” Yel hexsox hal zex lei yar leixrhher ddei leil hox teixl si a.

⁸ Tisir ddei yar leil bbeix: “Nialngasael, maelsael neixl gex, qixnex ddexr dae.” Yel yar dder eine bei a. Tisir ddei yoxl bbeix: “Pia teixlsibbor xiux wol dae a, ngo dax mae lei.” ⁹ Birdaexr dder yar dax mae dae a ddux a. Nael yar tisir ddei bei dae mel yarzi a nr saexl, yar zzir dae a yar meixcir mia arnar. ¹⁰ Yaa cageggie xi lavul do nei lamae do gga ddux lei ho a lei alddur su su mel yaa leil i nr saexl, yel yaa dder he gielmi peixl dax ssi ci a, alddur hal peixl yar ddei yar ggapu si a. Yaa ddux lei a zzi gga ddir a, zzijiul ar zex leil ssi gel a qie, tisir ddei dder Birdaexr dax nr hher a, ssi du si a.

¹¹ Birdaexr xiar du lei a bbeix: “Eilcar ngo yarzi a saexl, Arbosobo mel tisir ar ddei leil miardal a, ngo leil Silixl zzirmar leixrga gga nei Yoxrtaexl su ca ddei vaervaerpor mel nr seir bei niazzir dae mel gga jiuxl teixl lei a.”

¹² Yar arsae nga a arleixr xiar a dder Yuehal Marker mi ca hal ddei yarma Marlixlyal hhexr ake ssi a. Ca cirke a mel halmaex hher dae a, Arbosobo dax ddar biar dae. ¹³ Birdaexr dder alddur ggucirmi hher dae a

alddur deil. Loxrdaxl mi ssormaer hal ddox ddux lei a, alddur ggapu lei. Yar mel ca leil visser su a. ¹⁴ Yar Birdaexr ddei qiurte a noni teixl lei a dder ggese zildu a, yel alddur lei gga-nr-pu, beix xixl a ca maelmaerjia leil bbeix gger jjixr a bbeix: “Birdaexr alddur ggucirmi ngier dae!”

¹⁵ Yaa bbeix: “Ni tae a boxllor!” Nael ssormaer ddox bbeix doxr dae a bbeix: “Yarzi Birdaexr a!” Yaa dder bbeix: “Yar ddei tisir ddei nga a!”

¹⁶ Birdaexr mel cirleixr nr nor alddur deil doxr dae. Yaa dder alddur ggapu a, yar leil mia a, murgur zildu a. ¹⁷ Birdaexr mel leixrhher ddei bir a, yaa leil arjjiuljjiu arla hher dae lol a, yaa leil Seirpor yar leil cageggie arsae hier teixl lei a biar gger. Birdaexr yoxl bbeix: “Nia ddar eil mel Yargel nei kebal arzzi-nimar mel leil bbeix gger nia.” Giedae Birdaexr dder ddux a, kebal mermi ssi a.

¹⁸ Giedae merteir a, meixr mel Birdaexr arddol ssi jixr a nr saexl, yaa yarzisael luaxl. ¹⁹ Silixl zzirmar ddei Birdaexr leil zo lei a zo nr wo, yel dder alddur su su mel leil ser a, ca mel leil miardal a yaa leil gga teixl si a, seixl zil gger lol.

Silixl Zzirmar Si A

Eine goxr ho a, Silixl lei Yoxrtaexl mermi nr hher, Kaersarlixlyal zzi gga ssi a halmaex argielggur goxr ssi a. ²⁰ Halcar malmal, Silixl zzirmar te Tuiloxr nei Siduixl zzi gga su ca mel leil sirzzi. Nael halmaex gga ca mel zzor dae loxlmoxr mel mel Silixl zzirmar ddei dax hal bbaer lei. Yel yaa yar dax toltor a bei niazzir. Yaa dder yar woxrke vaervaerpor Boxrlasidu ddei leil qie a yaa leil beijjiu a Silixl zzirmar dax ssi lol.

²¹ Nael yaa Silixl zzirmar dax lei hal cir ni, Silixl dder yar ddei zzirmar pia xiux veixr dae a, yar ddei zzirmar baxrde taex leil cux dae a, ca mel dax ddar cirke biar. ²² Ca mel ae dae a bbeix: “Eil ddei mel ca ddei qiurte nr nga. Arbosobo ddei qiurte a!” ²³ Silixl zzirmar mel Arbosobo leil middux lol nia-nr-zzir a, tisir mel dder yar leil faxr a, yar leil xilbe zzar

bberzzi kexl lol a kexl zil gger a.

²⁴ Arbosobo ddei ddar mel cir ni bir cir ni leil biar kae a, cirmaex-hanga lei biar ci a.

²⁵ Banaxrba nei Sarloxr mel yaa bei dae miar mel bei jjia a dder Yiluxlsaler zzi gga nr hher, Atixr'a zzi gga jjixr a. Yaa Yuehal Marker leil hier dax si lei a.

13

Sarloxr Nei Banaxrba Atixr'a Jiaxlhuixl Gga Hher Dae

¹ Atixr'a zzi gga jiaxlhuixl gga mel xiezi nei sulmulstu nnnelsael zza. Yaa mel dder: Banaxrba, Simixl, Gurlixlnaexl zzi gga su ca Lulqiuxr, zzirmar Silixl ddei dax cirgo a hier vaer Marnixl, nei Sarloxr nga a. Simixl leil mel Nixjier lei ae. ² Yaa Seirpor leil visser a almeixr lei nr zzor car a, Arbosobo ddei Xiu ddei yaa leil bbeix: “Nia Banaxrba nei Sarloxr leil tiur a ngo yaa leil bei lol miar mel bei ssi lol.” ³ Yaa dder almeixr lei nr zzor, leixrhher ddei Banaxrba nei Sarloxr leil ta gex dae a, Arbosobo dax ddar biar gger a, yaa leil ssi lol.

Sarloxr Nei Banaxrba Saexlpurluxlsi Dal Hher Dae

⁴ Arbosobo ddei Xiu ddei yaa leil miardal a, yaa dder Xiliurji zzi gga ssi a, halmaex gga cuaxr zzi a, Saexlpurluxlsi dal taex dax ssi. ⁵ Yaa Saexlpurluxlsi dal taex leil Salamir zzi gga ssi ci a dder, Yoxrtaexl su mel Arbosobo ddei sulzzaggie gga ssi a, ca mel leil Arbosobo ddei ddar biar gger. Yuehal Marker lei yaa dax ca dae a yaa leil beijjiu dae. map of Paul's 1st journey|Paul1-BW YCL.tif|span|Acts 13:1-14:28|SIL||

⁶ Yaa Saexlpurluxlsi dal cirmaex-hanga ssi jjia a Palfur zzi gga lei ci a. Yaa halmaex gga neirisu Yoxrtaexl su ca ar ddei dax zzi a. Yar mel xiezi yarjjar ar ddei a. Yar leil Bayisu mi. ⁷ Yar halleix Saexlpurluxlsi dal guaxr

su vaervaerpor Silqiur-Barloxr dax ggozar tur a. Silqiur-Barloxr mel yarzi olnolddu ca ar ddei a. Yar Banaxrba nei Sarloxr leil qie si lei a, Arbosobo ddei ddar mel yar leil biar gger lol. ⁸ Nael neirisu Yirliurmar hherdder Bayisu Banaxrba nei Sarloxr leil dir.^v Yar vaervaerpor eil ddei leil bbiur gex dae a, yar leil Arbosobo ddei ddar mel leil ddarzzi lol nia-nr-zzir. ⁹ Eilcar a malmal, Arbosobo ddei Xiu ddei Sarloxr hherdder Barloxr^w nixmox zzar hher ji dae a. Yar meix lei nr cix neirisu ddei leil i dae a ¹⁰ bbeix: “Neir zzirmar Sardaxl ddei ssor eil ddei ni! Ni seirseir maelmaerjia leil dir! Ni cafur-calel, cirza-hanga nrbba nrbba bei. Ni halae Arbosobo ddei ddarzi mel leil bei luaxl jjia gger! ¹¹ Eilboxl Arbosobo ni leil faxr du a mia nr xie lol. Ni bbelele mia nr xie argielggur nga var.”

Yel yar meixddur ddei cirleixr dder neixmarmarmo, mia nr xie a. Yar zaza-lili ca mel leil qiuxr a yar leixrhher ddei leil gga dae a yar leil jjiumo hier gger lol. ¹² Vaervaerpor Silqiur-Barloxr Seirpor leil biar dae mel leil bbejjiur nei eil mel leil mia a dder ddarzzi a. Yar zzir dae a Barloxr nei Banaxrba mul gger dae mel yarzi a.

Sarloxr Hherdder Barloxr Birxidir Mermi Atixr'a Zzi Gga Hher Dae

¹³ Barloxr nei yar carbeix mel Palfur zzi gga cuaxr zzi dae a, Paxrfeililyal mermi Bierjia zzi gga ssi ci a. Halmaex gga Yuehal Marker dder yaa dax cirgo a nr hher a, Yiluxlsaler zzi gga jjixr a. ¹⁴ Yaa Bierjia zzi gga nr hher a, yoxl Birxidir mermi Atixr'a zzi ddei gga lei ci a. Wornol nixixl cir ni ci a, yaa dder Yoxrtaexl su mel Arbosobo ddei sulzzaggie ddir a, cux dae a. ¹⁵ Halmaex gga ddei vaervaerpor mel

^v**13:8** Xilaxl ddar gga Yirliurmar ddei yilsi mel dder neirisu.

^w**13:9** *Sarloxr hherdder Barloxr* Ca eil ddei mi nr nel zza. Halleix yar leil Sarloxr mi. Giedae Yisu leil saexl ho a, yar leil dder Barloxr mi.

Lixlfaxr vaexr dae sul ber nei xiezi vaexr dae sul ber zza jjia ho a, ca leil miardal a yaa nnel leil bbeix gger ssi lol a bbeix: “Arzzi-nimar, nia ca leil arddolyox quex ddu zza arddeirnga a, biar gger ddo a.”

¹⁶ Barloxr dder ngier du lei a leixrhher ddei bil dae a bbeix: “Yirsaexllixl su ca nei Arbosobo leil i du yar leil gexr su ca maelmaerjjia lei noni dae la. ¹⁷ Yirsaexllixl su ca ddei Arbosobo mel niul ddei porpor mel leil tiur a. Yaa halae Aezixr goxrjia gga hher dae seir car a dder yaa leil ca yarzisael miur ar cir loxr lol. Yar yoxl leixrhher ddei ddoddomo bei a, yaa leil Aezixr goxrjia gga hier teixl lei. ¹⁸ Yaa mipaerbbae gga hher dae hal licei koxl gga, Arbosobo yaa dax sser gex doxr dae. ¹⁹ Yar Jianaxr mermi su ca sir cuxr leil deil leixl gger, halmaex ddei mi mel yar ddei cassor-worssor leil bbe gger a, yaa leil hher lol. ²⁰ Eine lixiu ngorcei koxl sael goxr gel lei a.

Arbosobo yoxl vaervaerpor mel leil yaa leil guaxr lol, hherdder xiezi Sarmur'aer mi ca hal ddei gol dae seir zzeze ci. ²¹ Giedae yaa Sarmur'aer leil yaa leil zzirmar ar ddei gger la qiuxr. Arbosobo dder Bixlyarmir ddei cuxr gga ca Jisixl ddei ssor Sarloxr leil yaa ddei zzirmar licei koxl bei lol a. ²² Giedae Sarloxr leil nr bei lol a, yoxl Daxlweixl leil yaa ddei zzirmar bei lol. Arbosobo Daxlweixl leil biar a bbeix: ‘Yixi ddei ssor Daxlweixl mel cirza-hanga lei ngo miardal dae mel dax bei mae dae, yel ngo yar leil yarzi nixloxdda.’

²³ Arbosobo yar bbeix har zaxr goxr mel dax zox dae a Daxlweixl ddei giedae ca mel gga ca ar ddei tiur teixl lei a, Yirsaexllixl su ca mel leil jiuxlsu seirpor bei lol. Ca eil ddei mel dder Yisu nga a. ²⁴ Yisu halae yar ddei miar mel nr bei seir, Yuehal dder Yirsaexllixl su ca maelmaerjjia leil huixrsoxr nia, sexlsir nia, biar gger goxr ho a. ²⁵ Yuehal yar bei dae miar mel bei jjia jiur a ca leil bbeix: ‘Nia zzir dae a ngo arseir a? Ngo mel Arbosobo tiur har dae ca leil jiuxlsu hal ddei nr nga. Nael ngo giedae leil

lei ca hal ddei mel, ngo yar leil qixnexsael lei pe gger nr piar.’

²⁶Arzzi-nimar, Yalboxrlahar ddei giedae ca mel nei Arbosobo leil i du yar leil gexr su ca mel, Arbosobo ca leil arsae jiuxl ddar eil mel mel niul leil biar gger arddeir a. ²⁷Nael Yiluxlsaler zzi gga goxr dae ca mel nei yaa ddei vaervaerpor mel Yisu mel Arbosobo tiur har dae ca leil jiuxlsu ddei nga a nr saexl. Xiezi vaexr dae sul ber wornol nixixl cir ni yaa zza dae a lei, nael Yisu leil biar dae arddeir a yaa nr saexl. Yel yaa dder Yisu leil si nia bbeix a, halleix xiezi bbeix goxr ddar mel yarzi loxr lol. ²⁸Yaa Yisu leil azo si nia zuixl zo wo nr xie bbeixarnar, nael yaa halae Birlado leil qiuxr a, yar leil seixl zil gger lol. ²⁹Yaa xiezi vaexr dae sul ber leil Yisu arsae nga nia vaexr dae mel bei jjia ho a dder, Yisu leil sixrxixljiaxl ddei leil vei zei lei a, lixrbaex gga dol ji dae a. ³⁰Nael Arbosobo yoxl yar leil gol du xixl lei lol a. ³¹Giedae Yisu halleix yar dax cirter a Jialixllixl mermi cirdae a, Yiluxlsaler zzi gga ssi su ca mel leil zae nr boxl sael mia lol a. Yel ca eil mel dder yaa mia goxr eil mel Yirsaexllixl su ca mel leil biar gger a.

³²Ngua eilcar a Yisu leil biar dae ddar seirseir mel nia leil biar gger, hherdder Arbosobo niul porpor mel dax azo bei nia bbeix har zaxr goxr mel sael a nga. ³³Arbosobo yaa dax Yisu si a lei gol du xixl lei nia bbeix har zaxr goxr mel, eilboxl niul eil coxr dax ci a, yarzi loxr a. Hherdder Arbosobo Ddei Sul ber gga Sipi Sul hal ber leil nr zul ddei gga vaexr dae sael a nga:

‘Ni mel ngo ssor a;
eilni ngo niabbor bei a.’^x

³⁴Yisu Zidu si a, Arbosobo yar leil gol du xixl lei lol, yar ddei ggecir

^x**13:33** Sipi Sul 2:7 leil vaexr dae.

ddei nr xiaxr lol. Eil mel leil bbeix ci a mel, Arbosobo eine bbeix har zaxr goxr a bbeix:

‘Ngo Daxlweixl leil gger nia bbeix har zaxr goxr yarzi koxlsseiddo
seirceix-seirmaer hal mel,
nia leil gger nia.’^y

³⁵ Arbosobo Ddei Sul ber gga Sipi Sul hal ber leil mel kebal ar zul gga yoxl bbeix:

‘Ni mel seirceix-seirmaer hal ddei ddei ggecir ddei leil xiaxr lol nr
var.’^z

³⁶ Daxlweixl gol dae seir car a, yar Arbosobo ddei ddar no, yar marle ho a dder yar porpor mel dax giexlhex dae a, ggecir ddei dder xiaxr a.

³⁷ Nael si ho a yoxl Arbosobo yar leil gol du xixl lei lol ca hal ddei mel, ggecir ddei nr xiaxr.

³⁸ Yel arzzi-nimar, nia saexl nia, Yisu nia leil si gger a, Arbosobo dder nia ddei zuixl ddei ssoxrsuxl var. ³⁹ Nia Moxrxi vaexr dae Lixlfxaxr mel leil koxl dae a mel, Arbosobo nia leil zuixl nr zza ca i mal gger nr var. Nael nia Yisu leil ddarzzi a mel, Arbosobo nia cirddeir-hanga leil zuixl nr zza ca i mal gger ho a. ⁴⁰ Yel nia fadae nia. Nr nga a, xiezi vaexr dae sul ber gga bbeix dae mel, nia oldde leil deix ci leilei. Hherdder bbeix:

⁴¹ ‘Ngo nia ca eil coxr dax arsae lerler bei dae mel,
nia leil biar gger su ca zza lei,
nia halae ngo leil ddar-nr-zzi.

^y**13:34** Yirsaexlyal Sul 55:3 leil vaexr dae.

^z**13:35** Sipi Sul 16:10 leil vaexr dae.

Yel nia ngo leil bbeix vuxryixr su ca mel,
nia i dae ddo a!

Nia zzir dae a yarzi murgur, nael nia si nia!’ ”^a

⁴² Barloxr nei Banaxrba biar teixl a, ssi niazzir dae car a, ca mel yaa leil qie a, zeixleixr wornol nixixl halboxl ci a lei, yaa leil ddar eil mel biar gger jjixr lei lol. ⁴³ Yaa ssi car a, Yoxrtaexl su ca nei Yoxrtaexl su ca loxr ho a Arbosobo leil ddarzzi su ca seirseil ar ke a Barloxr nei Banaxrba dax mae dae. Yaa nnel dder yaa leil Arbosobo ca mel leil cirza-hanga seirseir meixl gger a yaa leil ssoxrsuxl ddarzzi ze i nia quex.

⁴⁴ Yoxl wornol nixixl cir ni ci a, ca mel Seirpor ddei ddar biar ggie noni lei. Zzi gga ca maelmaerjjia lei lei jjia jjur a. ⁴⁵ Nael Yoxrtaexl su ca ddei vaervaerpor mel ca yarzi miur mia a dder nixnox zildu a, Barloxr dax zex, halae yar leil bbeix vuxryixr.

⁴⁶ Barloxr nei Banaxrba dder nixmox vaervaer arla bbeix: “Arbosobo ddei ddar mel nia leil xilmeir bbeix gger nia arddeir a. Nael nia noni nr yuex. Nia zzir dae a nia cirse-cirsil Arbosobo dax goxr dae nr piar. Yel ngua dder Yoxrtaexl su nr nga ca mel leil Arbosobo ddei ddar biar gger ssi du a. ⁴⁷ Seirpor ngua leil miardal goxr a bbeix:

‘Ngo ni leil de sael a neixmar ggie hher dae
Yoxrtaexl su nr nga ca leil bbele lol a mel,
ni leil cirmaex-hanga ca mel leil ngo
ca leil arsae jiuxl biar gger ssi lol arddeir a.’ ”^b

⁴⁸ Yoxrtaexl su nr nga ca mel ddar eil mel leil bbejjur a dder yarzi

^a**13:41** Habagur Sul 1:5 leil vaexr dae.

^b**13:47** Yirsaexlyal Sul 49:6 leil vaexr dae.

ggese a, Arbosobo leil bbeix zae gger. Ha Arbosobo tiur har dae a cirse-cirsil yar dax goxr dae lol ca mel dder ddarzzi a.

⁴⁹ Seirpor ddei ddar mel dder yaa hher dae ggie cirmaex-hanga lei biar jiax a. ⁵⁰ Nael Yoxrtaexl su ca ddei vaervaerpor hal mel zzi gga Arbosobo leil ddarzzi su arseir lei yaa leil i du ssormaer hal mel leil co, halae arseir lei yaa leil i du capor hal mel leil co a, Barloxr nei Banaxrba leil bixr a, yaa leil mermi hal ddei gga ggaxr teixl gger lol. ⁵¹ Yaa nnel dder ca mel meixsaer qier leil qixnex leil niaxl gex dae nilme mel to pixl a. Yaa eine bei a mel ca eil mel leil Arbosobo yaa leil faxr nia saexl lol. Giedae yaa Yirgenixl zzi gga ssi a. ⁵² Atixr'a zzi gga hher dae seir Yisu dax mae dae su ca mel Arbosobo ddei Xiu ddei yaa nixmox zzar hher ji dae a dder yarzi ggese.

14

Barloxr Nei Banaxrba Yirgenixl Zzi Gga Hher Dae

¹ Barloxr nei Banaxrba yaa cirter a Yirgenixl zzi gga Yoxrtaexl su mel Arbosobo ddei sulzzaggie ddei gga ddir a. Yaa halmaex gga ca mel leil Arbosobo ddei ddar biar gger a, Yoxrtaexl su ca nei Xilaxl su ca mel lei cirke ddarzzi a. ² Nael Yoxrtaexl su ddar-nr-zzi ca mel, Yoxrtaexl su nr nga ca mel leil co a, Yisu leil ddarzzi su mel leil vuxryixr lol. ³ Barloxr nei Banaxrba yaa nnel halmaex gga seirseil argielggur hher a. Yaa Seirpor leil koxl dae a, nixmox vaervaermo Arbosobo seirseir meixl gger dae mel ca leil biar gger. Seirpor yaa leil ddoddomo murgurgurmo cirke bei lol a, ca mel leil yaa biar dae mel hoxr saexl lol. ⁴ Zzi gga ca mel dder bbe kae a. Cirmelmel a nael, Yoxrtaexl su ca mel dax cir piar a bei; cirmelmel a nael, yaa nnel dax cir piar a bei. ⁵ Halcar malmal, Yoxrtaexl su nr nga ca mel halae Yoxrtaexl su ca mel nei yaa ddei vaervaerpor mel yaa nnel leil bei vuxryixr a, legelbbe sser a, yaa leil zax zil gger niazzir. ⁶ Yel yaa

saexl a dder Liurganixr mermi ddei gga Luxlsidaexr zzi nei Telbil zzi eil nnel gga nei zzi dax naer ggie hal mel gga pa mal a. ⁷ Yaa halmaex gga ca mel leil Yisu leil biar dae ddar seirseir mel biar gger.

Barloxr Nei Banaxrba Luxlsidaexr Zzi Gga Hher Dae

⁸ Luxlsidaexr zzi gga mel qihher nr bbor jjia lei wor cirdoxr lei nr niar ca ar ddei cux dae. Ca eil ddei mel xiu teixl lei a dder pirdael dae arddeir a. Yar zeixleixr lei jjiumo ssi nr goxr. ⁹ Yar Barloxr biar ggie noni dae. Barloxr yar leil meix lei nr cix i doxr dae a, yar Arbosobo yar leil no ddei kor lol var ddarzzi i teixl lei a. ¹⁰ Yel dder worcixl-worni bbeix: “Ni ha du la, qihher nr bbor jjia ngier zzar!” Yar dder tiuxl du lei a, jjiumo ssi beil a.

¹¹ Ca mel lei Barloxr bei dae mel leil mia a dder Liurganixr mermi ddei ddar te a worcixl-worni bbeix: “Seirpormar mel ca ggecir loxr a niul ca dax zei lei a!” ¹² Yaa yaa mermi seirpormar ddei mi mel sser a Banaxrba leil nael, Zexlsi mi gger. Zoxlzoxl a ca meixsaer qier leil ddar biar su Barloxr leil nael, Heimir mi gger. ¹³ Zzi maelleil mel, Zexlsi mi seirpormar te ddei seirpor xi ar giex zza. Halmaex gga Zexlsi leil zi su ca mel loxrbbexmar gga dae, vixlux vei dae a, Luxlsidaexr zzi ddei gielmi peixl dax lei a, Barloxr nei Banaxrba leil niur seixl zi lei a.

¹⁴ Yaa nnel yaa leil seixl zi lei du a bbejjiur a, armael ddei pia xiux si xiaxr gger a, ca cili gga beix dil a, worcixl-worni ae dae a bbeix: ¹⁵ “Nia arsaenga a eine bei leir? Ngua lei ca lar nga; nia dax ciryoxr a nga. Ngua nia leil Yisu leil biar dae ddar seirseir mel biar gger a mel dder nia leil cirza-hanga yarjjar eil mel dax bei mae dae lol nia-nr-zzir, nia leil merlo-milo, neixvi nei cirza-hanga bei teixl lei su cirse-cirsil lei gol dae Arbosobo dax bei mae dae lol niazzir. ¹⁶ Halleix Arbosobo circuxr-hanga leil arseir azo bei niazzir dder azo bei lol; ¹⁷ nael yar seirseir mel bei a, ca mel leil yar mel arddolcar lei hher dae saexl lol. Bir dae a bbeix, yar

nia leil almer lei gger, loxlmoxr se wo lol, zzorddu gger, nia leil nixmox zzar ggese lol.”¹⁸ Yaa nnel ddar eil mel bbeix a lei, zeixleixr nr nga a, yaa leil seixl-nr-zi lol bbiur gex nr wor a.

¹⁹ Nael Yoxrtaexl su ca ar mel a Atixr'a zzi gga nei Yirgenixl zzi gga lei a. Yaa eilmaex gga ca mel leil co a, legelbbe sser a, Barloxr leil zax. Yaa Barloxr si ho a zzir dae a dder yar leil zzi maelleil gga teixl gger a.

²⁰ Yisu dax mae dae su ca mel Barloxr leil pex gex dae car a, yar ha du lei a, zzi ddei gga ssi dil xixl a. Giedae cir ni, yar Banaxrba dax cirgo a Telbil zzi gga ssi a.

Barloxr Nei Banaxrba Atixr'a Zzi Gga Jjixr

²¹ Yaa halmaex gga ca mel leil Arbosobo ddei ddar biar gger a, ca cirke a lei Yisu dax bei mae dae yuex. Giedae yaa dder Luxlsidaexr zzi, Yirgenixl zzi, yoxl Birxidir mermi ddei Atixr'a zzi gga jjixr a,²² Yisu dax mae dae su ca mel leil nixmox ddei hhel du lei lol, velper a ddarzzi doxr dae nia quex. Yoxl bbeix: “Niul Arbosobo ddei goxr gga ddir a mel, hoba cirza-hanga yarzi goxr sol cirke goxr nia.”²³ Yaa nnel yoxl cirmaex-hanga jiaxlhuixl gga ca leil guaxr su camar mel leil tiur teixl lei a. Yaa almeixr lei nr zzor, Arbosobo dax ddar biar a, ca eil mel leil yaa ddarzzi dae Seirpor leil jia ji gger a, Seirpor yaa leil guaxr lol.²⁴ Barloxr nei Banaxrba Birxidir mermi ssi gel ho a, Paxrfeililyal mermi ssi ci a.

²⁵ Yaa Bierjia zzi gga ca mel leil Arbosobo ddei ddar biar gger ho a dder Yaldaxlxl zzi gga ssi a.

²⁶ Halmaex gga cuaxr zzi a, Atixr'a zzi gga jjixr. Atixr'a mel dder halleix ca mel Barloxr nei Banaxrba leil Yisu ddei ddar seirseir biar ssi lol, Arbosobo leil qiuxr a yaa leil guaxr lol, yaa leil seir lol ggie halmaex nga a. Eilboxl yaa miar eil ddei bei jjia a.²⁷ Yaa Atixr'a zzi gga jjixr ci a dder jiaxlhuixl gga ca mel leil ae si lei a cirgo a hher dae lol a, Arbosobo yaa leil sser dae a azo lerler bei nei Arbosobo Yoxrtaexl su nr nga ca mel

leil Yisu leil arsae ddarzzi lol eil mel yaa leil biar gger. ²⁸ Yaa nnel halmaex gga Yisu dax mae dae su ca mel dax seirseil argielggur hher a.

15

Yiluxlsaler Zzi Gga Miar Zzibbe

¹ Ca nnel sael a Yoxrtaexl mermi cirdae a Atixr'a zzi gga lei a, yaa Yisu leil ddarzzi su ca mel leil mul gger a bbeix: “Nia Moxrxi niul leil mul gger a, bei lol mel dax zox dae a gelir nr bei arddeirnga a, nia leil dder jiuxl wo nr ddo.” ² Yaa eine bbeix a, Barloxr nei Banaxrba yaa nnel dder yaa dax zex du lei a. Yel Yisu leil ddarzzi su ca mel dder Barloxr, Banaxrba halae kebal Yisu leil ddarzzi su ca nnel sael leil Yiluxlsaler zzi gga ssi lol a, Yisu miardal dae ca nei ca leil guaxr su camar mel dax zzibbe ssi lol.

³ Yel Jiaxlhuixl gga ca mel dder Barloxr nei Banaxrba leil ssi lol a. Yaa nnel Feinixrzi mermi nei Sarmarlixlyal mermi lal gel car a, halmaex gga Yisu leil ddarzzi su ca mel leil Yoxrtaexl su nr nga ca mel lei Yisu leil ddarzzi a biar gger a, ca maelmaerjjia dder yarzi ggese. ⁴ Yaa Yiluxlsaler zzi gga ssi ci a, jiaxlhuixl gga ca mel nei Yisu miardal dae ca mel halae ca leil guaxr su camar mel dder yaa leil hexl lei a. Yel Barloxr nei Banaxrba dder Arbosobo yaa leil sser dae a, azo lerler bei a yaa leil biar gger a. ⁵ Nael Yisu leil ddarzzi su Farlixsaexl ca ar mel a bbeix: “Yoxrtaexl su nr nga ca mel gelir bei nia halae Moxrxi ddei Lixlfaer dax bei mae dae nia.”

⁶ Yel Yisu miardal dae ca mel nei ca leil guaxr su camar mel dder zzi dax arleixr zzibbe. ⁷ Yaa zzicarzzi dax seirseil-arcixl zex ho a, Birdaexr dder ngier du lei a bbeix: “Arzzi-nimar, nia lei saexl, Arbosobo arddol-cirsil dder ngo leil tiur teixl lei a mel, Yoxrtaexl su nr nga ca mel leil Yisu leil biar dae ddar seirseir mel biar gger lol a, yaa leil Yisu leil ddarzzi lol arddeir a. ⁸ Arbosobo mel ca cirddeir-hanga ddei nixmox lei

saexl. Yar Yoxrtaexl su nr nga ca mel leil yar ddei Xiu ddei gger hherdder yar niul leil gger sael a nga. Arbosobo eine bei a mel, Yoxrtaexl su nr nga ca mel leil lei yar leil ddarzzi lol, kebal ca mel leil saexl lol arddeir a. ⁹ Yaa ddarzzi a, Arbosobo yaa nixmox ddei leil seibeix lol. Arbosobo niul leil nei yaa leil lei ciryoxr a i mal gger. ¹⁰ Eilcar a nia arsaе niul nei niul porpor lei bil du nr xie lorleix ddei yaa leil bil lol leir? Nia arsaenga a Arbosobo leil sixr i leir? ¹¹ Niul ddarzzi a, Seirpor Yisu niul leil jiuxl a mel, leiddur mel dax bei mae dae a jiuxl nr nga, yar niul leil seirseir meixl gger dae mel leil koxl dae a nga arddeir a. Yel niul leil dder yaa dax ciryoxr a jiuxl wo a.”

¹² Ca maelmaerjjia arjjuljjiu arla hher dae a, Arbosobo Barloxr nei Banaxrba leil sser dae a Yoxrtaexl su nr nga ca mel dax arsaе ddoddomo murgurgurmo hal mel bei a, biar gger ggie noni dae a. ¹³ Yaa biar jjia ho a, Yargel dder bbeix: “Arzzi-nimar, nia noni dae la! ¹⁴ Aرسال Ximexr Birdaexr biar goxr a, Arbosobo halleix Yoxrtaexl su nr nga ca mel leil arsaе perniar, yaa ca mel gga ar mel tiur teixl lei a, yar dax bei mae dae lol. ¹⁵ Hherdder xiezi vaexr dae sul ber leil vaexr dae mel sael a nga:

¹⁶ ‘Arddolcar a, ngo jjixr lei nia seir,
zzirmar Daxlweixl ddei goxrjia bei xiaxr ho hal ddei bei box jjixr lei,
naxrcixlcixl arla zi box nia.

¹⁷ Eine nga a mel, ngo kebal tiur teixl lei ca,
hherdder Yoxrtaexl su nr nga ca maelmaerjjia leil lei ngo leil zo wo
lol var.

¹⁸ Ddar eil mel mel halleix tortor dder Seirpor bbeix goxr ho a,
eine bbeix a.”

¹⁹ Yargel zeixleixr bbeix: “Ngo zzir dae a niul Arbosobo leil ddarzzi su Yoxrtaexl su nr nga ca hal mel leil bei sol lol nr ddo. ²⁰⁻²¹ Halleix cirdae

lei, wornol nixixl cir ni zzi cirddeir-hanga gga Yoxrtaexl su mel Arbosobo ddei sulzzaggie gga Moxrxi vaexr dae Lixlfaxr sul ber ca leil zza gger. Yel niul Yoxrtaexl su nr nga ca mel leil xil vaexr gger a yaa leil miardal: yaa azo lerler bbex leil zi goxr a, sei-nr-beix hal mel zzor nr ddo, capor maerssor nr loxr seir a zzi dax naer nr ddo, kerjia nr ddo; neixzil a sirnilni ddux nr goxr zzeir hal mel ddei hor zzor nr ddo; sirnilni zzor nr ddo.”

Yisu Leil Ddarzzi Su Yoxrtaexl Su Nr Nga Ca Mel Leil Xil Vaexr Gger

²² Yisu miardal dae ca mel nei ca leil guaxr su camar mel, halae jiaxlhuixl gga ca maelmaerjia dder Yoxrdaxl hherdder Basarba nei Xila yaa nnel leil tiur teixl lei a, Banaxrba nei Barloxr dax cirgo a Atixr'a zzi gga ssi lol. Yaa mel jiaxlhuixl gga ddei vaervaerpor a. ²³ Yoxl xil vaexr a yaa leil vei si lol. Xil gga vaexr dae a bbeix:

Atixr'a zzi gga nei Xuexllixlyal mermi, halae Jilixljia mermi gga hher dae Yisu leil ddarzzi su Yoxrtaexl su nr nga ca mel, ngua eil bbaer hher dae ca leil guaxr su camar nei Yisu miardal dae ca hherdder nia ddei arzzi-nimar mel, nia leil zzasoso dae biex.

²⁴ Ngua bbejjiur a bbeix, ngua dax eilmaex ddux ca nnelael a nia dax arleixr zex a, nia leil gge-nr-se lol zzor. Nael ngua yaa leil eine bei nia miardal nr goxr. ²⁵ Yel ngua maelmaerjia zzippe ho a, nixmox zzar xiar dae mel ciryoxr a nga a, ca nnelael tiur teixl lei a, yaa leil miardal a niul perniar dae arzzi-nimar Banaxrba nei Barloxr dax cirgo a nia dax halmaex gga lei lol. ²⁶ Ca eil nnel mel niul ddei Seirpor Yisu Zidu leil weix a, zeixleixr nr nga a, armael ddei olga ddei lei pixl a. ²⁷ Ngua dder Yoxrdaxl nei Xila yaa nnel

leil miardal a, ngua biar dae ddar eil mel nia leil biar gger lei lol.

²⁸ Arbosobo ddei Xiu nei ngua lei nia leil bei nr sol lol, nia jiasibbor bbeix dae mel dax lar bei mae dae ssa: ²⁹ hherdder bbex mel leil zi goxr zzorddu mel nei sirnilni mel zzor nr ddo, halae neixlzil a sirnilni ddux nr goxr zzeir hal mel ddei hor lei zzor nr ddo, capor maerssor nr loxr seir zzi dax naer nr ddo, kerjiar nr ddo. Nia eil nr jji sael nr bei a mel dder ddo a. Arbosobo nia leil seir lol nia,
eine bbeix a.

³⁰ Yaa leil miardal har ho a, yaa dder Atixr'a zzi gga ssi a, Yisu leil ddarzzi su ca maelmaerjjia leil ae pe a, xil fo yaa leil gger a. ³¹ Ca mel xil fo zza ho a, xil leil vaexr dae ddar mel yaa leil nixmox dder vaer a, yaa yarzi ggese a. ³² Yoxrdaxl nei Xila lei xiezi ar mel a. Yaa ddar cirke biar a, arzzi-nimar mel leil quex a, yaa leil nixmox ddei hhel du lei lol a. ³³ Yaa halmaex nr ni sael hher ho a, arzzi-nimar mel dder yaa nnel leil zzazza-soso arla yaa leil miardal teixl lei su ca mel dax jjixr lol. ³⁴ [Nael Xila mel Atixr'a zzi gga hher dae a.]^c ³⁵ Barloxr nei Banaxrba halae ca cirke a lei Atixr'a zzi gga hher dae a, Arbosobo ddei ddar mel ca mel leil biar gger nei mul gger.

Barloxr Nei Banaxrba Bbe Kae

³⁶ Argielggur loxr a, Barloxr Banaxrba dax bbeix: “Niul doxl halleix Arbosobo ddei ddar biar gger goxr zzi cirddeir-hanga gga jjixr a, niul ddei arzzi-nimar mel arsaesael nga bbe arleixr i jjixr yo.” ³⁷ Banaxrba mel Yuehal Marker leil lei yaa dax cirgo a ca dax ssi lol niazzir. ³⁸ Nael halleix Paxrfeililyal mermi halmaex hher dae car a, Yuehal Marker mel

^c**15:34** *Nael Xila mel Atixr'a zzi gga hher dae a.* Arbosobo Ddei Sul cirberber a leil ddar eil qier nr zza.

pa du si a, yaa dax cirgo a ca leil Arbosobo ddei ddar biar nr gger ssi. Yel Barloxr zzir dae a yar leil ssi dax lol nr ddo. ³⁹ Yel yaa nnel dder zziehie du lei a, zzi dax bbe kae a. Banaxrba dder Yuehal Marker leil hier dae a, cuaxr zzi a, Saexlpurluxlsi dal taex leil ssi a. ⁴⁰ Barloxr nael, Xila leil tiur teixl lei a, yar dax ca ssi lol. Yisu leil ddarzzi su mel Barloxr leil Seirpor leil jia ji gger a, Seirpor yar leil seirseir meixl gger lol, yel yar dder ssi a. ⁴¹ Yar Xuexllyal mermi nei Jilixljia mermi cirmaex-hanga ssi jiax a, jiaxlhuixl gga ca mel leil ho bei ho Yisu leil ddarzzi dax lol. map of Paul's 2nd journey|Paul2-BW YCL.tif|span|Acts 15:36-18:22|SIL||

16

Tixrmoxrtaexl Barloxr Nei Xila Dax Cirgo A Miar Bei

¹ Barloxr Telbil zzi gga nei Luxlsidaexr zzi gga ssi ci a. Luxlsidaexr zzi gga mel, Yisu dax mae dae su ca ar ddei zza, yar leil Tixrmoxrtaexl mi. Yarma mel Yisu leil ddarzzi su Yoxrtaexl su ca ar ddei a; yarbbor nael Xilaxl goxrjia su ca a. ² Luxlsidaexr zzi gga nei Yirgenixl zzi gga Yisu leil ddarzzi su ca mel lei yar leil yarzi i du. ³ Barloxr yar leil hier dax si niazzir, nael halmaex gga Yoxrtaexl su ca mel arseir lei saexl, yarbbor mel Xilaxl goxrjia su ca a. Yel Barloxr dder Tixrmoxrtaexl leil gelir bei gger a. ⁴ Yaa zzi mel gga ssi gel car a, Yiluxlsaler zzi gga hher dae Yisu miardal dae ca mel nei ca leil guaxr su camar mel xil gga bbeix goxr ddar mel ca mel leil mul gger, yaa leil bei mae dae lol. ⁵ Yel jiaxlhuixl gga ca mel leil ho bei ho Yisu leil ddarzzi dax lol. Halae Yisu leil ddarzzi su ca mel lei cirni-cirni miur du dax lei a.

Arbosobo Ddei Xiu Barloxr Leil Marcixrduixl Mermi Ssi Lol

⁶ Arbosobo ddei Xiu ddei Barloxr nei Tixrmoxrtaexl leil Yalxilyal mermi Yisu ddei ddar mel biar nr gger ssi lol, yel yaa dder Fuxrliurjia mermi nei

Jialataexl mermi ssi. ⁷ Yaa Meirxiyal mermi yarqier leil ssi ci a, Bixltuinixr mermi ssi niazzir, nael Yisu ddei Xiu ddei yoxl yaa leil nr ssi lol. ⁸ Yel yaa dder Meirxiyal mermi ssi gel a, Taelloxryal zzi gga ssi ci a. ⁹ Hal cir xixlmei Barloxr meixcir mia a, Marcixrduixl mermi su ca ar ddei a ngier dae a yar leil qiuxr a bbeix: “Ni leil qie, Marcixrduixl mermi lei a, ngua leil beijjiu lei.” ¹⁰ Barloxr eine mia a mel, ngua zzir dae a Arbosobo ngua leil halmaex gga ca mel leil Yisu leil biar dae ddar seirseir mel biar gger ssi lol arddeir a. Yel ngua dder nialngasael Marcixrduixl mermi ssi niazzir.

Liurdiryal Yisu Leil Ddarzzi

¹¹ Ngua dder Taelloxryal zzi gga cirdae cuaxr zzi dae a, zzalzzar a ssi gel a, Sarmoxrtaela dal ssor hal taex leil lei ci a. Giedae cir ni yoxl Nixryalbolil zzi gga lei ci a. ¹² Halmaex cirdae a Loxrmar goxrjia ddei Marcixrduixl mermi zzi vaer zzir Feilixlbir zzi gga lei ci a. Ngua dder halmaex gga nr ni sael hher a.

¹³ Wornol nixixl cir ni ci a, ngua dder zzi gga ddux a, lazzarmo ar zex qier leil ssi ci a. Ngua zzir dae a halmaex gga Arbosobo dax ddar biar ggje ar maex zza piar a. Ngua dder cux dae a, halmaex gga hher dae ssormaer mel dax ddar biar. ¹⁴ Jjiussi yixrsaexr mae vur su ssormaer ar ddei zza. Yar leil Liurdiryal mi. Yar Tuiyartuila zzi gga su a. Yar Arbosobo leil zi a, bbeix zae gger. Yar Barloxr yaa ddar biar ggje bbejjiur a, Arbosobo dder yar leil noni wo xie lol a, yar ddarzzi a. ¹⁵ Yar nei yar cirhhexr-lorbba lei sexlsir a; yar halae ngua leil qiuxr a bbeix: “Nia zzir dae a, ngo yarzi Arbosobo leil ddarzzi arddeirnga a, ngua ake xixl ssi yo.” Yel yar dder ddoddo-nrddo ngua leil hexl si a, yar ake hher dae lol a.

Barloxr Nei Xila Loxrgier Dae

¹⁶ Cir ni a, ngua yoxl Arbosobo dax ddar biar ggie halmaex ssi a, ssormaerssor zebol ar ddei a ngua dax duixlduix a ssi gel lei. Yar leil mel neir xiex dae. Yar si leil neir i gger a, yar seirpor ddei leil zzirbae cirke bei gger wo a. ¹⁷ Barloxr ngua mel cirgo a ssi dae. Yar ngua dax ae mae doxr dae a bbeix: “Ca eil mel mel mu zzir ggie hher dae Arbosobo leil visser su a. Yaa nia leil arsae saelnei jiuxl wo ddo biar gger nia.” ¹⁸ Yar hormo ni lei ngua dax eine ae mae doxr dae a, yel Barloxr dder yarzi vuxryixr a, pox xixl a neir hal te leil bbeix: “Ngo Yisu Zidu ddei mi ddei leil koxl dae a, ni leil miardal, ni yar ggecir ddei gga ddux lei!” Eine bbeix a, neir te halcar malmal dder ddux lei a.

¹⁹ Yar ddei seirpor mel yar zeixleixr lei yaa leil zzirbae bei gger wo nr ddo saexl a dder Barloxr nei Xila leil zox gex dae a, zzi agala gga vaervaerpor mel dax gga mal gger a. ²⁰ Yel vaervaerpor mel dax ssi ci a dder yaa nnel leil goxl a bbeix: “Ca eil mel mel Yoxrtaexl su ca a. Yaa niul zzi gga lei a, ca mel leil nrbba bei lol. ²¹ Yaa niul Loxrmar su ca mel nr bei lei nei bei nr ddo leiddur mel mul gger.”

²² Ca cirke a yaa dax cirgo a pex ngexl lei a, Barloxr nei Xila leil dir lei. Vaervaerpor mel ca leil miardal a yaa nr nel ddei pia mel lixr teixl gger a, zzargger sser a yaa leil deil lol. ²³ Yaa leil seirseil ar pu deil gger ho a dder cageggie ge ji dae a. Halae alddur su su ddei leil miardal a, zabbar seilseir a su dae lol. ²⁴ Yel alddur su su ddei ddar eil mel noni ho a dder yaa leil cageggie xi ollele giex gga ge ji gger a. Halae qihher leil niax gex ddu six jiaxjiax hal ddei niax gex gger.

²⁵ Merxixl-soxiu sael ci a, Barloxr nei Xila Arbosobo dax ddar biar, caxlgo caxl a, Arbosobo leil bbeix zae gger. Yaa dax cirgo a ge ji dae ca mel lei yaa leil noni dae. ²⁶ Neixleixrsael mi lei a, cageggie xi giex lei lelelle le du lei a. Cirleixr dder alddur maelmaerjjia lei ggapu si a, ca ge ji dae maelmaerjjia leil neixl gex dae hexsox mel lei yar ddei yar ddux si

a. ²⁷ Alddur su su ddei zucur a, alddur mel ggapu dae mia a, yar zzir dae a ge ji dae ca mel pa du si ho a; yel dder altor baxr gga teixl lei a, armael ddei armael seixl zil niazzir dae a. ²⁸ Nael Barloxr worcixl-worni ae du lei a bbeix: “Ni armael leil tor nr ke, ngua maelmaerjia lei eilmaex hher dae seir.”

²⁹ Alddur su su ddei dder ca leil ae a, de vei si lei lol a, beix dil a, yel lixlix-laexlaex mo Barloxr nei Xila yaa xilmeir puxr gex dae a. ³⁰ Yar yaa leil hier teixl lei a biex a bbeix: “Ggocar, ngo arsae bei a saelnei ngo armael leil jiuxl wo ddo?”

³¹ Yel yaa nnel dder bbeix: “Seirpor Yisu leil ddarzzi a mel, ni nei ni ake ca cirddeir-hanga leil lei jiuxl wo ddo.” ³² Yaa dder Seirpor Yisu ddei ddar mel yar nei yar ake ca cirddeir-hanga leil biar gger a. ³³ Hal cir xixlmei malmal, cageggie alddur su su ddei dder yaa leil hier si a, yaa no ggie cir gger, halae yar nei yar ake ca cirddeir-hanga lei hal cir xixlmei dder sexlsir a. ³⁴ Yel alddur su su ddei yoxl yaa leil yar ake hier mal a, almeixr ho zol. Yar nei yar ake ca cirddeir-hanga lei Arbosobo leil ddarzzi a, yarzi ggese.

³⁵ Giedae cirnehe merteir a, zzi hal ddei gga ddei vaervaerpor mel meixr mel leil miardal a, cageggie su su ddei leil bbeix gger lol a bbeix: “Ca hal nnel leil piur ddo a.” ³⁶ Alddur su su ddei Barloxr leil bbeix gger a bbeix: “Zzi gga ddei vaervaerpor mel nia leil piur ddo a miardal. Eilboxl nia ddux cexr a; zzasoso arla ssi ddo a.”

³⁷ Nael Barloxr meixr mel leil bbeix: “Ngua mel Loxrmar su ca a; nael yaa ngua azo bei cox a lei zo nr teixl lei seir dder ca mel meixsaer qier leil ngua leil deil, yoxl ngua leil ge du lei. Eilboxl zzael yoxl arjjiuljjiu arla ngua leil piur teixl gger niazzir dae? Eine mel arsae cexr bbeixleir? Yaa leil ae si lei a, ngua leil hier teixl lol nia!”

³⁸ Meixr mel ddar eil mel zzi gga ddei vaervaerpor mel leil bbeix gger

jjixr a. Yaa Barloxr nei Xila Loxrmar su ca a bbejjiur a dder gexr a. ³⁹ Yel yaa dder lei a, yaa leil hier teixl lei a, yaa dax saxfux; halae yaa leil qiuxr a, zzi ddei gga ddux lol. ⁴⁰ Yaa nnel ddux lei ho a dder Liurdiryal mi ssormaer hal hhexr ake ssi a. Yaa halmaex gga ddar biar a, Yisu leil ddarzzi su mel leil quex ho a dder ssi a.

17

Barloxr Nei Xila Tisarloxrnixrjia Zzi Gga Hher Dae

¹ Giedae Barloxr nei Xila yaa nnel Alfeibolir zzi gga nei Yalboloxrnixryal zzi gga ssi gel a, Tisarloxrnixrjia zzi gga ssi ci a. Halmaex gga mel Yoxrtaexl su mel Arbosobo ddei sulzzaggie zza.

² Barloxr dder zoxlzoxl sael a, halmaex gga ddir a, wornol nixixl so boxl jjia lei Arbosobo Ddei Sul ber gga azo lerler vaexr dae mel ca mel leil biar gger. ³ Yar mel yaa leil Arbosobo tiur har dae ca leil jiuxlsu ddei leil arsaenga a bei zil gger, yar yoxl arsae gol du xixl lei biar gger. Yar halae eil mel yarzi a ca leil saexl lol. Yoxl bbeix: “Ngo nia leil biar gger dae Yisu ddei mel dder Arbosobo tiur har dae ca leil jiuxlsu hal ddei nga a.”

⁴ Noni su ca mel gga yaa leil ddarzzi su ar mel zza; halae Arbosobo leil ddarzzi Xilaxl goxrjia su ca cirke nei zzi gga yarzi middux ssormaer cirke a lei ddarzzi a.

⁵ Nael Yoxrtaexl su ca ar mel a Barloxr nei Xila leil nixnox. Yel yaa ca yarzi gaxr ar cir ae si lei a, zzi gga ca mel leil co ssi, ca mel leil luaxl lol. Yaa Yisui ake mer dil a Barloxr nei Xila leil zo ssi a, ca mel dax hier mal gger niazzir. ⁶ Nael yaa nnel leil zo nr wo a, yaa dder Yisui nei kebal Yisu leil ddarzzi su arzzi-nimar nnel sael leil zzi gga vaervaerpor mel dax gga mal gger. Yaa ae dae a bbeix: “Cirmaex-hanga nrbba nrbba bei su ca hal mel lei eilmaex lei ci a. ⁷ Yisui halae yaa leil hexl a, yar ake hher dae lol. Yaa mel niul ddei zzirmar ddei lixfaxr mel dax bei nr mae, yaa

halae bbeix: ‘Kebal zzirmar ar ddei zza, yar leil Yisu mi,’ ” eine bbeix.

⁸Ca mel nei zzi gga ddei vaervaerpor mel ddar eil mel bbejiur a dder nixmox ddei zzilzzil-zzerzzermo zza du lei a. ⁹Yel Yisui nei kebal ca hal nnelael dder vaervaerpor mel leil zzirbae ar mel gger a, yaa leil dder piur a.

Barloxr Nei Xila Birliryal Zzi Gga Hher Dae

¹⁰Eilmerxixl ci a qie, Yisu leil ddarzzi su arzzi-nimar mel Barloxr nei Xila leil Birliryal zzi gga ssi lol. Yaa nnel halmaex ssi ci a dder Yoxrtaexl su mel Arbosobo ddei sulzzaggie gga ddir a. ¹¹Halmaex gga ca mel bir Tisarloxrnixrjia zzi gga ca mel leil noni yuex. Yaa zabbar seilseir arla Yisu leil biar dae ddar mel noni, cirni-cirni Arbosobo Ddei Sul ber zza doxr a, Barloxr bbeix dae ddar mel yarzi nga nga saexl niazzir. ¹²Yel Yoxrtaexl su ca cirke ddarzzi a; Xilaxl goxrjia su yarzi middux ssormaer cirke nei capor cirke a lei ddarzzi a.

¹³Nael Tisarloxrnixrjia zzi gga hher dae Yoxrtaexl su ca mel Barloxr yoxl Birliryal zzi gga ca mel leil Arbosobo ddei ddar biar gger dae saexl a dder halmaex ssi a, ca mel leil co ssi, ca mel leil luaxl lol. ¹⁴Yel Yisu leil ddarzzi su mel halcar a dder Barloxr leil neixvi qier leil ho mal. Xila nei Tixrmoxrtaexl nael Birliryal zzi gga hher dae seir. ¹⁵Barloxr leil ho su mel yar leil Yardir zzi gga ho mal ci a. Barloxr yoxl yaa leil miardal xixl lei a, Xila nei Tixrmoxrtaexl leil nialngasael yar dax halmaex lei bbeix gger lol. Yel ca mel dder jjixr a.

Barloxr Yardir Zzi Gga Hher Dae

¹⁶Barloxr Yardir zzi gga Xila nei Tixrmoxrtaexl leil xia dae car a, zzi cirddeir-lorbba lei bbex bbeix bbex a nga mia a dder, yar zzasol zildu a.

¹⁷Yar Yoxrtaexl su mel Arbosobo ddei sulzzaggie gga hher dae a, Yoxrtaexl su ca mel nei Arbosobo leil ddarzzi Yoxrtaexl su nr nga ca mel

leil Arbosobo ddei ddar biar gger. Halae cirni-cirni var vur bbae gga hher dae ca mel leil lei biar gger. ¹⁸ Barloxr Yisu si a yoxl gol du xixl lei a eine biar a Yibirjiuloxr nei Sidoyal dax cirpiar a bei su mel Barloxr dax zex lei. Ca eil mel mel sulsaxlsu ar mel a. Yaa ca cirmelmel a nael bbeix: “Yar nrbba nrbba biar dae, azo biar lei nr saexl!” Cirmelmel a nael bbeix: “Yar kebal goxrjia ddei neir leil biar boxllor.” ¹⁹ Yel yaa dder Barloxr leil vaervaerpor miar zzibbe ggie Yallilbagur halmaex hier mal a bbeix: “Ni biar dae ddar eil mel ngua leil saexl lol ddo ddo? ²⁰ Ni biar dae ddar mel ngua bbejjiur a, yarzi murgur; ngua ni ddar biar dae mel, arddolyox yilsi a saexl niazzir.” ²¹ Yardir zzi gga su ca mel nei halmaex gga hher dae kebal mermi su ca mel yaa bbejjiur nr seix hal mel noni meixr, biar meixr.

²² Yel Barloxr Yallilbagur halmaex ngier dae a bbeix: “Yardir zzi gga ca mel, nia noni dae la. Ngo i dae a, nia azo lerler bei a lei neir leil zi meixr. ²³ Ngo jjiumo ssi dae car a, nia zi ggie hal mel leil mia a. Nia halae zi ggie eine ar maex a mel ‘Ngua nr saexl Arbosobo hal ddei leil zi,’ eine vaexr deix dae mia a. Nia zi dae nia nr saexl Arbosobo hal ddei, eilcar ngo nia leil biar gger.

²⁴ Yar mel dder merlo-milo cirza-hanga bei teixl lei su Arbosobo ddei nga a. Yar mel merlo-milo ddei Seirpor. Yar ca bei teixl lei xi mel gga nr hher. ²⁵ Yar mel niul leil olga gger, niul leil seixlho lol nei cirza-hanga lei niul leil gger. Yar azo lei zza, niul ca mel yar leil visser ddu nr zza. ²⁶ Yar ca ar ddei bei beil a, hormo cuxr ca loxr lol, ca mel leil middurbbor cirmaex-hanga hher dae lol. Yaa leil hormo koxl gol nia nei arddolmaex goxr nia lei bei dol har ho a. ²⁷ Arbosobo eine bei a mel, ca mel leil yar leil zo lol, hherdder neixmar ggie mox dae a, Arbosobo leil zo wo lol sael a nga. Yar niul ca cirddeir-hanga dax lei giex vi-nr-mir dae. ²⁸ Niul nixixl goxr, azo lerler bei, niul olga ddei zza zza nr zza eil mel maelmaerjia lei

yar guaxr dae. Hherdder nia ddei sul vaexr su ca mel bbeix dae mel sael a nga, ‘Niul lei yar ddei aniu a.’

²⁹ Niul mel Arbosobo ddei aniu a, yel niul Arbosobo mel bbex mel dax ciryoaxr a nga zzir nr ddo. Bbex mel mel ca mel piu, sae, legelbbe mel sser a yaa xiar dae a, kaexl teixl lei lalnga. ³⁰ Halleix ca mel azo lei nr saexl seir car a, yaa bei nr sir bei a lei, Arbosobo yaa leil nr faxr, nael eilboxl Arbosobo cirmaex-hanga ca mel leil lei huixrsoxr nia miardal ho a.

³¹ Yar nixixl dixl har ho a mel, yar, yar tiur teixl lei ca hal ddei leil sser dae a, bbaehhexhhexmo middurbbor ca mel leil ser lei nia. Arbosobo mel yar tiur har dae ca eil ddei leil si a yoxl gol du xixl lei lol, yel ca maelmaerjia lei yar tiur teixl lei ca ddei arseir a saexl var.”

³² Ca mel, Barloxr ca si ho a lei gol du xixl lei biar gger ggie bbejjiur a, cirmelmel a nael, yar leil vaessi; cirmelmel a nael, yar dax bbeix: “Ngualeil ni biar dae eil mel zeixleixr biar gger la!” ³³ Yel Barloxr dder ca eil mel dax ssi teixl si a. ³⁴ Nael ca ar mel a Yisu leil ddarzzi a, yar dax beix mae dae a. Ca eil mel gga mel Yallilbagur halmaex ddei vaervaerpor Diunixrxiu mi capor hal ddei ca dae nei Daxlmarlir mi ssormaer hal ddei ca dae, halae kebal ca ar mel ca dae.

18

Barloxr Gelixrdo Zzi Gga Hher Dae

¹ Eine goxr ho a, Barloxr Yardir zzi gga nr hher a, Gelixrdo zzi gga ssi ci a. ² Yar halmaex gga Berdu mermi su Yoxrtaexl su ca ar ddei pex dae a. Ca eil ddei leil mel Yaljula mi. Yixldaxllixl goxrjia ddei zzirmar Gexrlardiu mel Yoxrtaexl su ca mel leil Yixldaxllixl goxrjia gga Loxrmar zzi gga nr hher lol a, Yaljula dder yar maerssor Baerzila leil hier dae a, jiajia Gelixrdo zzi gga lei ci a. Yel Barloxr dder yaa leil halmaex gga i ssi a. ³ Yaa mel zaxlpoxr bei vur a nixixl goxr. Barloxr lei miar eil yoxr bei su

ar ddei a, yel dder yaa dax hher dax dae a, cirgo a miar bei. ⁴ Wornol nixixl cirboxl-hanga lei Barloxr mel Yoxrtaexl su mel Arbosobo ddei sulzzaggie gga ssi a, ca mel leil Arbosobo ddei ddar biar gger ssi, Yoxrtaexl su nei Xilaxl goxrjia su ca mel leil Yisu leil ddarzzi nia quex.

⁵ Xila nei Tixrmoxrtaexl yaa nnel Marcixrduixl mermi nr hher a, yar dax lei ci ho a, Barloxr dder zaxlpoxr nr bei, cirni-cirni Yoxrtaexl su ca mel leil Arbosobo ddei ddar biar gger, yaa leil Yisu mel dder Arbosobo tiur har dae ca leil jiuxlsu ddei nga a saexl lol. ⁶ Nael yaa no-nr-ni yar leil dir, halae yar leil bbeix vuxryixr, yel Barloxr dder pia leil niaxl gex dae nilme mel to pixl a bbeix: “Nia zuixl bei a, Arbosobo nia leil faxr a lei ngo dax guaxr-nr-zoxr! Eilboxl zzezze ngo Yoxrtaexl su nr nga ca mel dax ssi a.”

⁷ Yel Barloxr halmaex nr hher a, Tirdo-Yoxrsixldu mi ca hal ddei ddei ake ssi a. Yar Arbosobo leil zi nei bbeix zae gger. Yar ake ddei lei Yoxrtaexl su mel Arbosobo ddei sulzzaggie dax naelnaer a nga.

⁸ Yoxrtaexl su mel Arbosobo ddei sulzzaggie guaxr su vaer zzir Zililsibuxl mi ca hal ddei nei yar ake ca cirddeir-hanga lei Seirpor leil ddarzzi, halae Gelixrdo zzi gga ca cirke a lei Barloxr biar dae ddar mel leil noni wo a dder ddarzzi a, yaa dder sexlsir a.

⁹ Eine ar xixl a, Seirpor mel Barloxr leil meixcir mia lol a bbeix: “Gexr nr ssa, biar lalssa, nr biar bei nr ddo. ¹⁰ Zzi eil ddei gga mel ngo leil ddarzzi su ca hormo zza, halae ngo ni dax cirgo a hher dax dae a mel, arseir lei ni leil bei no gger nr var.” ¹¹ Barloxr halmaex gga cir koxl nei qiuxl xiubbo hher a, Arbosobo ddei ddar mel ca leil mul gger.

¹² Nael Jialiur mi ca hal ddei Yalgieyal mermi ddei vaervaerpor bei halcar a, Yoxrtaexl su ca mel cir piar a bei a, Barloxr leil ssu du lei a, yar leil caserggie gga mal a ¹³ bbeix: “Ca eil ddei ca mel leil Arbosobo leil zi a, Moxrxi vaexr dae Lixlifaxr mel dax zox nr ssa mul gger a.”

¹⁴ Barloxr ddar bbeix niazzir dae a qie, Jialiur dder Yoxrtaexl su ca mel leil bbeix: “Yar nrbba nrbba pix nei azo lerler nr seir bei arddeirnga a, ngo nia leil noni gger dae nia. ¹⁵ Nael nia, nia Yoxrtaexl su armael ddei ddar, armael ddei mi nei armael ddei Lixlfaxr mel leil zex lalnga a mel, nia ddei nia bei ssi lalssa, ngo nr guaxr.” ¹⁶ Yel dder Yoxrtaexl su ca mel leil caserggie ggaxr teixl gger a. ¹⁷ Yel yaa Yoxrtaexl su mel Arbosobo ddei sulzzaggie guaxr su Sortixrnixr mi hal ddei leil ssu gex dae a, caserggie xilmeir leil yar leil deil. Eine nga a lei, Jialiur nr guaxr.

Barloxr Atixr'a Zzi Gga Jjixr

¹⁸ Barloxr yoxl Gelixrdo zzi gga Yisu leil ddarzzi su mel dax hormo nixixl hher a dder Baerzila nei Yaljula yaa nnel dax cirgo a cuaxr zzi a, Xuexllixlyal mermi gga ssi a. Barloxr halleix ddar bbeix har zaxr goxr mel sael a, yar Jiegexrlir kax gga hher dae seir dder olce ddei cox pixl jjia gger a. ¹⁹ Yaa Yirfuxrsor zzi gga ssi ci a, Barloxr dder Baerzila nei Yaljula dax bbe kae a. Yar cirmuzil a Yoxrtaexl su mel Arbosobo ddei sulzzaggie gga ddir a, Yoxrtaexl su ca mel leil Arbosobo ddei ddar biar gger. ²⁰ Halmaex gga ca mel yar leil qie a yaa dax zeixleixr nr ni sael hher lol, nael yar ddar-nr-koxl. ²¹ Yar ssi car a, yaa dax bbeix: “Arbosobo ngo leil zeixleixr jjixr lei lol arddeirnga a, ngo halae nia dax eilmaex jjixr lei nia seir.” Yel dder Yirfuxrsor zzi gga nr hher, cuaxr zzi dae a ssi a. ²² Yar Kaersarlixlyal zzi dax ssi ci a dder cuaxr leil zei a, Yiluxlsaler zzi gga ssi a, jiaxlhuixl gga ca mel leil zzasoso dae biex ssi a. Giedae yoxl Atixr'a zzi gga ssi a. ²³ Halmaex gga argielggur hher a sael ssi. Yar Jialataexl mermi nei Fuxrliurjia mermi cirmaex-hanga ssi gel a, Yisu dax bei mae dae su ca maelmaerjjia leil ho bei ho Yisu leil ddarzzi dax lol.
map of Paul's 3rd journey|Paul3-BW YCL.tif|span|Acts 18:23-21:17|SIL||

Yalboloxr Yirfuxrsor Zzi Gga Hher Dae

²⁴ Yoxrtaexl su ca ar ddei a Yirfuxrsor zzi gga lei ci a. Yar leil mel Yalboloxr mi. Yar Yallixlsadaxl zzi gga su. Yar meir yarzi ddo halae Arbosobo Ddei Sul ber leil lei yarzi saexl. ²⁵ Seirpor leil biar dae ddar mel si yar leil mul gger ho a, yel yar xiu ddei yarzisael Yisu mel arseir a ca leil biar gger ssi niazzir. Yar ca mel leil Yisu leil biar dae ddar mel biar gger a lei yarzi biar gger hoxr. Nael yar sexlsir gger su Yuehal ajjix sser a ca leil sexlsir gger goxr eil mel lar saexl. ²⁶ Yar nixmox vaervaermo Yoxrtaexl su mel Arbosobo ddei sulzzaggie gga ca leil Arbosobo ddei ddar mel biar gger dae. Baerzila nei Yaljala noni wo a, yar leil yaa ake qie si a, Arbosobo leil biar dae ddar mel yar leil zabbar seirseir a mul gger dax a, bir yar halleix saexl dae mel leil saexl miur dax lol.

²⁷ Giedae Yalboloxr mel Yalgieyal mermi ssi niazzir a, Yirfuxrsor zzi gga ddei arzzi-nimar mel yar leil beijjiu a, Yalgieyal mermi Yisu dax mae dae su mel leil xil vaexr gger, yaa leil qie a, Yalboloxr leil hexl lol. Yar halmaex ssi ci a mel, halmaex gga ca mel leil yarzisael beijjiu guaxrxoxr. Ca eil mel mel hherdder Arbosobo seirseir meixl gger dae Yisu leil ddarzzi su ca mel nga a. ²⁸ Yar ca mel meixsaer qier leil Yoxrtaexl su ca mel dax zex car a yarzi sexr, yaa leil zex leixl gger. Yar Arbosobo Ddei Sul ber leil zox dae a, ca mel leil Yisu mel dder Arbosobo tiur har dae ca leil jiuxlsu ddei nga a saexl lol.

19

Barloxr Yirfuxrsor Zzi Gga Hher Dae

¹ Yalboloxr Gelixrdo zzi gga hher dae car a, Barloxr mel Jialataexl mermi nei Fuxrliurjia mermi ssi gel lei a, Yirfuxrsor zzi gga ssi ci a. Yar halmaex gga Yisu dax bei mae dae su ca ar mel pex dae a. ² Yel yaa leil

biex a bbeix: “Nia Yisu leil ddarzzi car a, Arbosobo ddei Xiu ddei nia nixmox zzar hher ji ji dae?”

Yaa ddarkoxl a bbeix: “Hher nr ji dae; ngua zeixleixr lei Arbosobo Xiu ar ddei zza bbejjiur nr seix.”

³ Barloxr yoxl yaa leil biex a bbeix: “Halmel, nia arsae sexlsir?”

Yaa bbeix: “Yuehal ca leil sexlsir gger mel sael a sexlsir a.”

⁴ Barloxr zeixleixr bbeix: “Yuehal ca mel leil sexlsir gger a mel, yaa leil huixrsoxr lol. Yaa leil bbeix, yar giedae sael lei ca hal ddei leil ddarzzi nia. Ca hal ddei mel dder Yisu a.” ⁵ Yaa noni ho a dder Yisu ddei mi ddei bbeix dae a sexlsir a. ⁶ Barloxr leixrhher ddei yaa leil ta gex dae a, Arbosobo ddei Xiu ddei dder yaa nixmox zzar hher ji dae a, yaa leil kebal ddar te lol halae arddolcar a arsae lerler nga var bbeix zaxr lol. ⁷ Yaa capor maelmaerjgia mel ceinirmo sael zza.

⁸ Barloxr dder Yoxrtaexl su mel Arbosobo ddei sulzzaggie gga ddir a, nixmox vaervaermo Arbosobo ddei ddar mel ca leil biar gger ssi halae Arbosobo ddei goxr ddei ca mel leil biar gger, yaa leil ddarzzi nia quex. Yar eine so xiubbo sael bei a. ⁹ Nael ca cirmelmel a nixmox ddei yarzi gex, yar leil ddar-nr-zzi, halae ca mel meixsaer qier leil Seirpor ddei ddar mel leil bbeix vuxryixr, yel Barloxr dder Yisu dax bei mae dae su ca mel leil hier dae a, ca hal mel dax nr hher a. Yaa cirni-cirni Tuilanur mi ca hal ddei ddei sulmulggie xi gga hher dae a, Arbosobo ddei ddar biar. ¹⁰ Barloxr eine nr koxl bei a mel, Yalxilyal mermi hher dae Yoxrtaexl su ca nei Xilaxl goxrjia su ca maelmaerjgia lei Seirpor ddei ddar mel bbejjiur wo a.

Silziwar Ddei Ssor Mel

¹¹ Arbosobo Barloxr leil sser dae a ddoddomo cirke bei a. ¹² Ca cirmelmel a giel Barloxr ddei goxrdoxl nei haxlpa vei si a, ca no su mel ggecir ddei leil dol deix gger, yel no mel dder kor a; halae ca leil xiex dae

neir mel lei ddux lei a.

¹³ Yoxrtaexl su ca armel a cirmaex-hanga ssi za dae a neir ggaxr. Yaa ca ggecir gga hher ji dae neir mel leil bbeix: “Ngo, Barloxr biar dae Yisu ddei mi ddei leil koxl dae a, nia leil miardal, ddux lei!” ¹⁴ Yoxrtaexl su Arbosobo leil zi su vaervaerpor Silziwar mi ca hal ddei ddei ssor hal sirlar lei eil mel sael a bei. ¹⁵ Cir boxl a, neir te yaa leil ddarkoxl a bbeix: “Yisu leil ngo saexl, Barloxr arseir a lei ngo saexl, nael nia arseir a leir?” ¹⁶ Neir xiex dae ca hal ddei dder yaa ggecir ddei leil tiuxl gex dae a, yaa leil bei leixl gger a. Yaa cirddeir-hanga leil lei bei no gger a, pia zzu lei zix xiex jgia gger a. Yel yaa pia lei nr veixr, xi hal giex gga beix teixl si a. ¹⁷ Ha Yirfuxrsor zzi gga goxr dae Yoxrtaexl su ca mel nei Xilaxl goxrjia su ca mel lei eil mel bbejjiur wo a, yarzi gexr. Eine zzezze dder Seirpor Yisu ddei mi ddei dder middux a, ca mel lei yarzi i du. ¹⁸ Yisu leil ddarzzi su cirke a lei yaa halleix bei goxr cirza-hanga nr seir mel ca mel meixsaer qier leil ssexl teixl lei a. ¹⁹ Neirisu cirke a lei yaa ddei sul mel vei si lei a, cirgo a mar dae a, ca mel meixsaer qier leil cu pixl gger a. Yaa cu pixl gger sul eil mel maelmaerjgia hormo per arleixr suax a mel, piu ngor meixr pir sael per.^d ²⁰ Seirpor leil biar dae ddar mel cirmaex-hanga lei biar jiax a, Yisu leil ddarzzi su ca mel lei yarzisael miur du dax lei a.

Yirfuxrsor Zzi Gga Luaxl Du Lei A

²¹ Hane goxr ho a, Barloxr dder Marcixrduixl mermi nei Yalgieyal mermi ssi gel a Yiluxlsaler zzi gga ssi niazzir. Yar bbeix: “Ngo halmaex ssi ci ho a nael, ngo Loxrmar zzi gga arleixr i ssi nia.” ²² Yel dder yar leil beijjiu su ca mel gga Tixrmoxrtaexl nei Yirladu yaa nnel leil miardal a

^d**19:19** *piu ngor meixr pir sael per* Hherdder ngor meixr ni meirne ddei worper nga a.

Marcixrduixl mermi ssi zaxr lol. Yar nael Yalxilyal mermi arleixr hher dae.

²³ Halcar a malmal, Yirfuxrsor zzi gga Yisu leil ddarzzi su ca mel yarzi larhor nr seir ar mel pex dae a. ²⁴ Yirfuxrsor zzi gga piu ddaexr su ca ar ddei zza; yar leil Dirmirdiu mi. Yar Yaldirmir^e mi seirpormar ddei seirpor xi giex sael a xi yelye ddaexr vur a nixixl goxr. Yar dax cirgo a bei su ca cirke a lei hazzi zzirbae zo faxrceixr. ²⁵ Yar dder yar dax cirgo a bei su nei yar sael a miar eil yoxr bei su carbeix mel leil ae si lei a bbeix: “Nia cirddeir-hanga lei saexl, niul mel dder miar eil ddei leil koxl dae a goxr seir arddeir a. ²⁶ Nael Barloxr te azo bei mel nia mia dae, yar azo bbeix lei nia bbejjiur dae. Yar Yirfuxrsor zzi gga lar bbeix nr nga a nei, Yalxilyal mermi cirmaex-hanga ca mel dax lei bbeix: ‘Ca leixrhher gga bei teixl lei bbex mel Arbosobo nr nga.’ Eine bbeix a, ca maelmaerjjia leil ddarzzi lol. ²⁷ Eine nga a mel, si niul miar bei dae mel leil lar i ze i nr nga a nei, niul ddei seirpormar Yaldirmir leil zi ggie leil lei i ze i. Halae Yalxilyal mermi cirmaex-hanga nei mer woxrke ca maelmaerjjia zi dae seirpormar eil ddei leil lei mier lol a.”

²⁸ Ca mel noni ho a dder sirzzi zildu a, worcixl-worni ae dae a bbeix: “Yirfuxrsor zzi ddei seirpormar Yaldirmir mel yarzi sexr!” ²⁹ Yel zzi cirddeir-lorbba lei luaxl du lei a. Ca mel dder Barloxr dax ca dae Marcixrduixl mermi su ca Gieyoxr nei Yallirdaxrgur yaa nnel leil ssu du lei a, yaa leil jiuurjiur-maemae azo lerler zzubbe ggief gga mal a. ³⁰ Barloxr ca mel meixsaer qier leil ssi mal niazzir, nael Yisu dax mae dae su ca mel

^e**19:24** *Yaldirmir* Yaldirmir mel dder Yirfuxrsor zzi gga ddei seirpormar. Yar mel ssormaer ar ddeir a. Halleix Yirfuxrsor zzi gga mel Yaldirmir hher ggie xi vaervaermo ar giex zza. Yirfuxrsor zzi gga ca mel yar leil zi.

^f**19:29** *azo lerler zzubbe ggie* Halmaex mel yarzi vaer. Ca mel halmaex ssi a azo lerler zzubbe, gaxggor, igax.

yar leil nr ddir lol. ³¹ Halae Yalxilyal mermi su Barloxr ddei gaxggor carbeix vaervaerpor nrnelsael a lei ca leil miardal a, Barloxr leil halmaex ddir nr ddo quex lei lol.

³² Ca mel luaxl zildu a. Cirmel a zzael eine ae; cirmel a zzael hane ae. Ca cirke a zzael yaa arsaenga a cirgo hher dae arddeir a lei nr saexl.

³³ Yoxrtaexl su ca mel dder Yallixlsadaxl mi ca hal ddei leil ca mel xilmeir dder mal gger a, yar leil ddar biar lol niazzir. Yel yar mel leixrhher ddei arleixr bir a, ca mel leil Yoxrtaexl su ca mel azo bei nr hoxr mel bei nr goxr eine biar gger. ³⁴ Nael ca mel yar Yoxrtaexl su ca a i teixl lei a, yel ca maelmaerjgia dder cirter a ae dae a bbeix: “Yirfuxrsor zzi gga ddei seirpormar Yaldirmir mel yarzi sexr” eine seirseil a ar cixl ae doxr a.⁹

³⁵ Giedae zzi hal ddei gga vaervaerpor ar ddei a ca mel leil quex a arjjiuljjiu arla hher dae lol a bbeix: “Yirfuxrsor zzi gga ca mel, nia Yaldirmir seirpormar hal ddei leil zi ggie nei merlabbor de zei lei legelbbe bbex hal taex leil su dae mel, arseir nr saexl bbeixleir? ³⁶ Arseir lei eil mel yarzi nr nga bbeix su nr zza a mel, nia dder luaxl nr ddo, azo bei lei xiar lei xiar nr ver seir dder bei ssi nr ddo. ³⁷ Ca eil mel mel niul ddei neir leil zi ggie azo zzaegu nr ker, yaa lei niul ddei seirpormar Yaldirmir leil bbeix vuxr-nr-yixr. Nael nia halae yaa leil eilmaex gga hier si lei. ³⁸ Dirmirdiu nei yar sael a miar eil yox bei su carbeix mel arseir leil goxl arddeirnga a mel, yaa caserggie goxl ssi cexr. Vaervaerpor mel yaa leil hoxr hoxr nr hoxr noni gger var. ³⁹ Nia halae kebal azo miar zza seir arddeirnga a, lixfaxr zzibbe su ca cir leil zo ssi cexr. ⁴⁰ Eilni eil mel sael a luaxl a mel, Loxrmar su vaervaerpor niul leil ser var. Ca eil mel azo lei bei nr coxr mel, niul arsaenga a eine bei lei niul bbeix teixl lei nr xie.”

⁴¹ Zzi hal ddei gga vaervaerpor mel ddar eil mel bbeix ho a, yar dder ca mel leil ssi lol a.

⁹**19:34** *seirseil a ar cixl ae doxr a* Yaa liargoxl xiarsixr sael ae doxr.

Barloxr Marcixrduixl Mermi Nei Xilaxl Goxrjia Gga Jjixr

¹ Luaxl nor ho a, Barloxr yoxl Yisu dax mae dae su ca mel leil cirgo a ae si lei a, yaa leil ddar biar gger a, nixmox dder vaer. Yel dder yaa dax bbe kae a, Marcixrduixl mermi ssi a. ² Yar Marcixrduixl mermi cirmaex-hanga lei ssi jiax a, halmaex gga Yisu leil ddarzzi su ca mel leil ddar cirke quex a, nixmox dder vaer a. Giedae yar yoxl Xilaxl goxrjia ssi ci a, ³ halmaex gga so xiubbo hher a. Yar cuaxr zzi a, Xuexllixlyal mermi ssi niazzir dae car a, Yoxrtaexl su ca mel yar leil ke niazzir saexl a dder yoxl Marcixrduixl mermi za gel xixl a. ⁴ Yar dax cirgo a ssi dax su mel hherdder Birliryal zzi gga su ca Billoxrsi ddei ssor Sorbatael, Tisarloxrnixrjia zzi gga su ca Yallirdaxrgur nei Xigodu, Telbil zzi gga su ca Gieyoxr, halae Yalxilyal mermi su ca Tuizigur nei Texlloxrfeimoxr, halae yoxl Tixrmoxrtaexl yaa nga a. ⁵ Yaa mel xilmeir ssi zaxr dae a, ngua leil Taelloxryal zzi gga xia dae a. ⁶ Miljiazi ji nr goxr aba zzor jiax goxr ho a, ngua Feilixlber zzi gga cuaxr zzi dae a, ngor ni cir ni Taelloxryal zzi gga yaa dax ssi a, halmaex gga sir ni hher a.

Barloxr Caleixlssor Ar Ddei Leil Gol Du Xixl Lei Lol

⁷ Wornol nixixl cir xixlmei malmal, ngua cirgo a hher dae a Seirpor ddei aba zzor, yar ddei beizi dda. Barloxr mel giedae cir ni ssi du a, yel yar dder ca leil Arbosobo ddei ddar biar gger doxr a, merxixl soxiu biar ci a. ⁸ Ngua hher ggie lebbor hal ddei gga mel, de cirke doxl dae seir. ⁹ Yoxrtuigur mi caleixlssor hal ddei mel cuaho peixl ddei leil cux dae. Barloxr seirseil ar xixl biar a, yar dder yixrmeixldox mil si a, lebbor so cexr ddei leil de zei si a. Ca mel yar leil bbax du lei car a mel, yar si ho a. ¹⁰ Yel Barloxr dder lebbor zei lei a, yar ggecir ddei leil puxr gex dae a,

deix gex dae a bbeix: “Gexr nr ssa, yar yoxl gol du xixl lei a.” ¹¹ Barloxr yoxl ddeix jjixr a, aba ngaxl kae a zzor. Yar biar doxr dae a, merteir a sael ssi. ¹² Ca mel dder caleixlssor hal ddox leil yar ake ho xixl gger a. Yar zabbar seilseir arla zza dae a, yaa nixmox zzar lei yarzi ggese.

Barloxr Taelloxryal Zzi Gga Cirdae A Mirlildu Zzi Gga Ssi

¹³ Barloxr mel jjiumo ssi a, Yalsuxl zzi gga ssi niazzir. Yel yar ngua leil cuaxr zzi dae a xilmeir ssi zaxr lol, halmaex gga yar leil xia dae a, yar leil zi deix lei. ¹⁴ Ngua Yalsuxl zzi gga Barloxr leil mia ho a, yar dder ngua dax cuaxr jiaxl leil zzi deix a, cirgo a Mirtuililnir zzi gga ssi a. ¹⁵ Ngua yoxl halmaex cuaxr zzi dae a, ar ni goxr ho a Jiya dal ssor hal taex deixrgoxr ssi ci a. Giedae cir ni yoxl Sarmor dal ssor hal taex leil cuaxr nor. Giedae cir ni Mirlildu zzi gga ssi ci a. ¹⁶ Barloxr mel nialngasael ssi a Wurxuexr jiax goxr xilmeir leil Yiluxlsaler zzi gga ssi ci niazzir. Yar Yalxilyal mermi dawo dae leilei a gexr a, yel yar dder nialngasael Yirfuxrsor zzi gga ssi gel nia bbeix har ho a.

Barloxr Ssi Du A, Ca Leil Guaxr Su Camar Mel Leil Quex

¹⁷ Giedae Barloxr Mirlildu zzi gga ssi ci a dder halmaex gga ca mel leil miardal a Yirfuxrsor zzi gga ssi a, halmaex jiaxlhuixl gga ca leil guaxr su camar mel leil qie si lei lol. ¹⁸ Yaa lei ci a, Barloxr dder yaa leil bbeix: “Ngo Yalxilyal mermi lei ci beil cirdae a eilleix zzezze lei ngo ca eil ddei arsae ar ddei a mel, nia lei saexl. ¹⁹ Ngo zoxlzoxl a meixbbix ddux doxr, ollei-olvaer nr seix, Arbosobo leil visser. Yoxrtaexl su ca mel ngo leil ke niazzir a, ngo yarzi goxr sol. ²⁰ Nia halae saexl, nia dax cirza-hanga seirggiebbbaer zza mel ngo nia leil mul nr gger ar yoxr nr zza. Ca miur ggie nei ake gga lei ngo nia leil mul gger. ²¹ Ngo Yoxrtaexl su ca bbeixsael Yoxrtaexl su nr nga ca mel leil lei zabbar seilseir a huixrsoxr nia, niul ddei Seirpor Yisu leil ddarzzi nia quex goxr a.

²² Eilcar a, ngo Arbosobo ddei Xiu ddei dax bei mae dae a Yiluxlsaler zzi gga ssi du a. Halmaex gga, arddolyox pex dae var nr saexl. ²³ Ngo zzi arddol ddei gga ssi ci lei, Arbosobo ddei Xiu ddei ngo leil zabbar seirseir a bbeix gger, ngo loxrgier var halae yarzi goxr sol var ngo saexl. ²⁴ Nael ngo, ngo ddei olga ddei leil kor-nr-seil. Ngo, Seirpor Yisu ngo leil bei lol miar a mel bei jjia a dder ddo a. Hherdder Yisu leil biar dae ddar seirseir mel ca leil biar gger. Ddar seirseir eil ddei mel hherdder Arbosobo ca leil seirseir meixl gger dae ddei nga a.

²⁵ Ngo nia dax ssissi-leilei Arbosobo ddei goxr ddei nia leil biar gger. Eilboxl ngo saexl, arddolcar a, nia maelmaerjjia lei zeixleixr ngo leil mia wo nr ddo a. ²⁶⁻²⁷ Arbosobo xiar dae mel mel ngo cirdoxr lei ker-nr-zi, nia leil biar gger ho a. Yel eilni ngo nia leil bbeix gger, nia ca mel gga halae Yisu leil ddar-nr-zzi su zza arddeirnga a, ngo zzi nr nga. ²⁸ Nia armael ddei armael fadae nia. Arbosobo ddei Xiu ddei nia leil guaxr dae lol hal mel leil lei fa gger dae nia. Yisu mel yar ddei sirnilni sser a Arbosobo ddei jiaxlhuixl leil vae xixl lei a, yel nia dder zabbar seirseir a yaa leil fa gger dae nia, hherdder yaloxlsu mel ya mel leil fa gger sael a nga, nia yaa leil zabbar seirseir a fa gger dae nia. ²⁹ Nia mel Arbosobo ddei ya cir sael a nga. Ngo saexl, ngo ssi jixr ho a, yarzi gexrddo veimar sael a ca hal mel nia dax ddir lei a, nia leil bei no gger var. ³⁰ Nia ca mel gga lei hal mel sael a ar mel ddux lei var. Yaa mel ddar nga-nr-zi mel te a, Yisu dax mae dae su mel leil fur a, yaa dax mae lol. ³¹ Yel nia cirddeir-hanga lei fadae nia. Ngo eil so koxl gga merxixl-merni lei meixbbix ddux dae a, nia leil mul gger, nia leil quex eil mel leil holcir dae nia.

³² Eilboxl ngo nia leil Arbosobo ddei leixrga gga jia ji gger a. Arbosobo nia leil seirseir meixl gger mel ngo nia leil biar gger ho a. Yel nia leil nixmox ddei hhel du dax lei lol var halae nia leil cirse-cirsil olga zza lol var. Eil ddei mel dder Arbosobo yar ddei cassor-worssor mel leil gger

ddei nga a. ³³ Ngo zeixleixr lei arseir ddei piu, sae, nei pia mel leil tuxr nr seix. ³⁴ Nia lei saexl, ngo mel ngo ddei leixrhher zze sser a, ngo nei ngo dax miar bei carbeix mel sser zoxr mel sulku. ³⁵ Ngo cirza-hanga eil mel bei a mel dder nia leil armael leixrhher zze sser a sulku ssi a, si bei wo nr xie mel leil beijjiu ssi nia mul gger arddeir a. Seirpor Yisu ddei ddar mel leil holcir dae nia. Yar armael bbeix: ‘Niul si leil gger a mel, bir si niul leil gger leil seir.’ ”

³⁶ Barloxr ddar eil mel bbeix jjia a dder ca maelmaerjjia dax cirgo a cizixl gger dae a, Arbosobo dax ddar biar. ³⁷ Ca maelmaerjjia lei nge du lei a, Barloxr leil deix gex dae a, yar leil jiuxl. ³⁸ Barloxr bbeix yaa zeixleixr lei yar leil mia nr ddo a bbaexl bbeix a, yaa nixmox zzar yarzi zzasol, yarzi cix. Giedae yaa yar leil cuaxr leil ho deix a.

21

Barloxr Yiluxsaler Zzi Gga Ssi

¹ Ngua ca mel dax bbe kae ho a dder cuaxr zzi dae a, Gesixl dal hal taex dax ssi a. Giedae cir ni Loxrdir dal hal taex dax ssi ci a. Yoxl halmaex cirdae a, Paxldalla zzi gga ssi ci a. ² Ngua halmaex gga Feinixrzi mermi ssi cuaxr ar jiaxl zo wo a, yel ngua dder cuaxr jiaxl leil zzi dae a ssi a. ³ Saexlpurluxlsi dal hal taex leil mia ddo ggie ssi ci a dder, naxrfa piar a gga za gel a, Xuexllixlyal mermi ssi a. Cuaxr jiaxl mel Tuiloxr zzi gga zzaegu vei zei nia, yel ngua dder halmaex gga cuaxr jiaxl leil zei a. ⁴ Ngua halmaex Yisu dax mae dae su ca ar mel zo wo a, yel yaa dax sir ni hher a. Arbosobo ddei Xiu yaa leil Barloxr arsae nga var saexl zaxr lol ho a, yaa dder Barloxr leil bbeix: “Ni Yiluxsaler zzi gga ssi nr ddo,” eine bbeix. ⁵ Nr ni sael goxr ho a, ngua ssi du a. Yel Yisu dax mae dae ca mel yaa maerssor nei yaa aniux dax cirgo a ngua leil zzi maelleil ho teixl ci a. Ngua dder neixvi qier leil cizixl gger dae a, Arbosobo dax ddar biar.

⁶ Ngua zzicarzzi dax ddar arleixr biar a, ngua dder cuaxr jiaxl leil ddeix a, yaa lei ake jjixr a.

⁷ Ngua zeixleixr ssi a, Tuiloxr zzi gga cirdae a Dolixlmaer zzi gga lei ci a. Ngua halmaex gga Yisu leil ddarzzi su ca mel leil zzasoso dae biex ssi a, yel yaa dax ar ni hher a. ⁸ Giedae cir ni, ngua halmaex nr hher a, Kaersarlixlyal zzi gga ssi ci a. Ngua Feilixl hhexr dax cirgo a hher dae. Yar mel ca mel leil Yisu ca leil arsae jiuxl biar gger su. Yar Yiluxlsaler zzi gga Yisu miardal dae ca hal mel leil beijiu su tiur teixl lei ca hal sirler gga ar ddei a. ⁹ Yar ssormaer liller zza, cir ddei lei capor nr zza seir. Yaa mel arddolcar a arsae lerler nga var bbeix zaxr su ar mel a.

¹⁰ Ngua halmaex gga zae nr ni sael hher a, Yaljiabul mi xiezi hal ddei mel Yoxrtaexl mermi cirdae a halmaex lei ci a. ¹¹ Yar ngua dax lei ci a dder Barloxr ddei maelsael zex vei si lei a, armael ddei qihher leixrhher ddei leil neixl gex du lei a bbeix: “Arbosobo ddei Xiu ddei bbeix: Yoxrtaexl su ca mel Yiluxlsaler zzi gga maelsael eil zex ddei seirpor ddei leil eil mel sael a neixl gex du lei a, Yoxrtaexl su nr nga ca mel leil jia ji gger nia.”

¹² Ngua nei halmaex gga ca mel eil mel bbejjiur a dder Barloxr leil Yiluxlsaler zzi gga ssi nr ddo quex. ¹³ Nael Barloxr bbeix: “Nia arsaenga a eine nge doxr a, ngo nixmox ddei leil zzasol lol leir? Ngo mel Seirpor Yisu leil weix a ca ngo leil neixl gex du lei lol yuex, halae yar leil weix a Yiluxlsaler zzi gga si zzorbbeixlei si yuex.” ¹⁴ Ngua Barloxr leil quex zei nr xie a dder nr quex a: “Arbosobo leil yar xiar dae mel bei cexr lol nia,” eine ar qier bbeix lalnga a.

¹⁵ Nr ni sael goxr ho a ngua dder zzaegu arleixr geso a Yiluxlsaler zzi gga ssi a. ¹⁶ Kaersarlixlyal zzi gga Yisu dax mae dae su ca nnelael a ngua dax cirgo a ssi, yaa ngua leil Yisu leil hormo koxl nei ddarzzi ho ca ar ddei ddei ake hier mal, ngua leil yar dax cirgo a hher lol. Yar leil mel

Naxrsui mi. Yar mel Saexlpurluxlsi dal halmaex gga su a.

Barloxr Yargel Leil I Ssi

¹⁷ Ngua Yiluxlsaler zzi gga ssi ci a, halmaex gga Yisu leil ddarzzi su ca mel ggegge-sese a ngua leil hexl lei. ¹⁸ Giedae cir ni, Barloxr ngua dax cirgo a Yargel leil i ssi, Yisu leil ddarzzi su ca leil guaxr su camar mel lei yar dax hher dae a. ¹⁹ Barloxr yaa leil zzasoso dae biex ho a dder Arbosobo yar leil sser dae a, Yoxrtaexl su nr nga ca mel dax azo lerler bei lol, zabbar seirseir arla xilmeir arsaе nga, giedae arsaе nga, maelmaerjgia lei yaa leil biar gger.

²⁰ Yaa noni ho a dder Arbosobo leil bbeix zae gger. Yoxl Barloxr leil bbeix: “Nimar, ni arleixr i, Yoxrtaexl su ca mel gga lei Yisu leil ddarzzi su hormo du nei zza. Yaa cirddeir-hanga lei Moxrxi vaexr dae Lixlfaxr mel dax zabbar seirseir a bei mae dae. ²¹ Nael ni Yoxrtaexl su nr nga ca dax hher dae car a, Yoxrtaexl su ca mel leil Moxrxi vaexr dae Lixlfaxr mel dax bei mae dae nr ssa, anix mel leil gelir bei gger nr ssa, Yoxrtaexl su ca ddei leiddur dax lei bei mae dae nr ssa eine mul gger a, yaa ca dax bbejjiur wo a. ²² Yaa arsaеbeilei ni eilmaex lei ci a bbejjiur var, ngua arsaе bei bbeixleir? ²³ Eilboxl ni dder ngua bbeix dae mel sael a bei. Ngua eilmaex ca liller zza; yaa liller jjia lei Arbosobo dax yaa azo bei nia, bbeix har zaxr goxr a. ²⁴ Ni yaa leil hier dae a Arbosobo ddei xi gga ssi a, ni dax cirgo a ggecir nei nixmox seibeix lol leiddur ddei bei, yaa leil zzirbae ddux gger a oldde cox lol. Eine nga a mel, ca mel dder halleix yaa ni arsaе lerler bei a bbejjiur wo goxr mel yarzi nr nga, halae yaa ni lei Moxrxi vaexr dae Lixlfaxr mel dax bei mae dae saexl a. ²⁵ Yisu leil ddarzzi su Yoxrtaexl su nr nga ca mel nael, ngua xil vaexr a yaa leil miardal har ho a, yaa leil bbeix: bbex mel leil zi goxr zzorddu mel nei sirnilni zzor nr ddo; neixlzil a sirnilni ddux nr goxr zzeir mel ddei hor zzor nr ddo; halae kerjjar nr ddo, capor maerssor nr loxr seir a zzi dax

naer nr ddo,” eine bbeix a.

²⁶ Yel giedae cir ni, Barloxr dder ca hal liller leil hier dae a, yaa dax cirgo a ggecir nei nixmox seibeix lol leiddur ddei bei ssi. Yar yoxl Arbosobo ddei xi gga ddir a, yaa arddolcar a saelnei leiddur mel bei jjia Arbosobo leil zi su mel leil bbeix gger. Yaa ziddu mel vei si lei a, Arbosobo leil zi su mel leil qie a, yaa leil Arbosobo leil seixl zi gger lol.

Arbosobo Ddei Xi Gga Barloxr Leil Ssu Du Lei

²⁷ Sir ni cir ni ci niazzir dae a, Yalxilyal mermi lei Yoxrtaexl su ca mel Barloxr leil Arbosobo ddei xi gga hher ggie mia a dder ca mel leil co a, yar leil ssu du lei a, ²⁸ ae dae a bbeix: “Yirsaexllixl goxrjia su ca mel arleixr beijjiu la bbeixnaer! Ca eil ddei mel cirmaex-hanga ca mel leil mul gger a niul leil nei Moxrxi vaexr dae Lixlfaxr mel leil halae Arbosobo ddei xi giex leil dir lol. Eilboxl yar halae Xilaxl goxrjia su ca mel leil hier dae a, Arbosobo ddei xi gga ddir lei a, Arbosobo ddei xi ddei leil lei sei-nr-beix lol a,” eine bbeix. ²⁹ Yaa ddar eil mel bbeix a mel, Yirfuxrsor zzi gga su ca Texlloxrfeimoxr mi hal ddei Barloxr dax cirgo a zzi gga hher dae ggie mia goxr a nga arddeir a. Yel yaa zzir dae a Barloxr Yoxrtaexl su nr nga ca leil Arbosobo ddei xi gga hier dil lei a.

³⁰ Yel zzi gga ca maelmaerjjia luaxl du lei a, yaa beix mal lei a, Barloxr leil Arbosobo ddei xi gga ssu teixl gger a, alddur ddei cirleixr dder ggabil du lei a. ^{h 31} Yaa yar leil seixl zil gger niazzir dae car a, ca ar mel a Loxrmar goxrjia ddei meixr cirdu guaxr su ddei leil bbeix gger ssi a bbeix: “Yiluxlsaler zzi cirddeir-lorbba lei luaxl du lei a.” ³² Meixr cirdu guaxr su

^h**21:30** Arbosobo ddei xi ddei leil su su mel ca mel leil Arbosobo ddei xi gga nr luaxl lol, yel yaa Arbosobo ddei xi ddei alddur ggabil. Ca mel Arbosobo ddei xi zzaexggu lamaebbaer ddei gga Barloxr leil seixl zil gger niazzir.

hal ddei dder nialngasael meixr ar mel hier dae nei meixr cirxiu guaxr su nrrnelsael hier dae a, ca mel dax halmaex beix mal. Ca mel meixr cirdu guaxr su nei meixr mel lei ggje mia a dder Barloxr leil nr deil a.

³³ Yel meixr cirdu guaxr su ddei Barloxr dax ssi a, yar leil ssu gex dae a, meixr leil miardal a hexsox nr zex sser a, yar leil neixl gex du lei lol. Yoxl ca mel leil biex a bbeix: “Ca eil ddei arseir a? Yar azo bei a?”³⁴ Nael ca cirmelmel a zzael, eine ae; cirmelmel a zzael, hane ae. Yaa luaxl zildu a, meixr cirdu guaxr su ddei lei arddol mel sael yarzi a noni teixl lei nr xie a dder meixr mel leil miardal a, Barloxr leil yaa hher ggje hier mal lol a.

³⁵ Barloxr teixrzi ddei dax ssi ci a, ca mel yarzisael sirzzi, yarzisael bbex, yel meixr mel dder Barloxr leil bil dae lalnga a.³⁶ Ca mel halae giedaebbaer worcixl-worni ae dae a bbeix: “Yar leil seixl zil gger ssi!”

Barloxr Armael Leil Weix A Ca Mel Dax Ddar Biar

³⁷ Barloxr leil meixr hher ggje hier ci jiur a, yar meixr cirdu guaxr su ddei leil bbeix: “Ngo ni dax ddar ar qier biar ddo ddo?”

Yar ddarkoxl a bbeix: “Ni lei Xilaxl goxrjia ddei ddar te var zzar?”

³⁸ Holbbaexl ni mel dder halleix nrbba nrbba bei goxr caseixlsu lidu hier dae a, mipaerbbae gga pa mal Aezixr goxrjia su ca hal ddei nga a ngo?”

³⁹ Barloxr ddarkoxl a bbeix: “Ngo mel Yoxrtaexl su ca a. Ngo leil mel Jilixljia mermi, yarzi middux Daxlsuxl zzi gga xiu ar ddei a. Ngo ni leil qie, ngo leil ca mel dax ddar arleixr biar lol la.”

⁴⁰ Meixr cirdu guaxr su ddei yar leil ddarkoxl a. Yel Barloxr dder teixrzi ddei leil ngier dae a, ca mel dax leixrhher arleixr bir a. Ca mel arjjiuljjiu arla hher dae a, Barloxr dder yaa dax Xiboxrlaexr su ddei ddar te a, bbeix:

22

¹ “Pormo nei arzzi-nimar mel, nia ngo ddar biar ggje noni dae la. Eilcar

a ngo armael leil weix a nia dax ddar nr qier sael biar nia.”² Yaa Barloxr Xiboxrlaexr su ddei ddar biar ggie bbejjiur a gielgiel arjiuljjiu a hher dae a.

Barloxr dder biar ze i si a³ bbeix: “Ngo mel Yoxrtaexl su ca a. Ngo leil Jilixljia mermi Daxlsuxl zzi gga xiu teixl lei, nael ngo zzi eil ddei gga hher vaer. Jiamarlxl mel ngo ddei sulmulu; ngo niul porpor ddei Lixlfaxr lei zza goxr a. Ngo nia eilmaex hher dae ca mel dax ciryoxr a zabbar seilseir a Arbosobo leil visser.”⁴ Halleix, ngo lei Yisu leil ddarzzi su mel leil ke goxr, yaa leil bei zil gger. Halae capor ssormaer lei nr guaxr ssu si lei a, yaa leil ge ji dae.⁵ Eil mel mel Arbosobo leil zi su vaer zzir ddei nei Yoxrtaexl su ca ddei vaervaerpor mel lei saexl, yaa nia leil biar gger cexr. Ngo yaa leil qie a Daxlmarsixlgexr zzi gga Yoxrtaexl su mel Arbosobo ddei sulzzaggie gga arzzi-nimar mel leil xil vaexr gger lol. Yel ngo halmaex gga Yisu leil ddarzzi su ca mel leil ssu ssi, yaa leil neixl gex du lei a, Yiluxlsaler zzi gga hier xixl a, ser jjixr lei niazzir.”

Barloxr Armael Arsae Seirpor Leil Ddarzzi Biar

⁶ “Nael ngo jjiimo gga ssi dae a, Daxlmarsixlgexr zzi gga ssi ci ddo jjur a, hherdder zzocir zzor zi ci halcar saexl loci a qie merlabbor yarzisael bbo ar zex ze i lei a, ngo leil zaza-lili zoxl gex dae a.”⁷ Yel ngo dder middur ddei leil puxr gex dae a, qiurte ar ddei a ngo dax ddar te dae a bbeix: ‘Sarloxr! Sarloxr! Ni arsaenga a ngo leil bixr?’

⁸ Ngo ddarkoxl a bbeix: ‘Seirpor, ni arseir a leir?’

Yar bbeix: ‘Ngo mel hherdder ni bixr dae Naxrsalexl su ca Yisu ddei nga a.’⁹ Ngo dax cirgo a ca dae ca mel lei yarzi bbo hal zex leil mia a. Nael ngo dax ddar bbeix dae qiurte ddei leil, yaa bbejjiur arnar, yaa noni wo nr xie.

¹⁰ Ngo yoxl biex a bbeix: ‘Seirpor, ngo arsae bei nia?’

Seirpor ddarkoxl a bbeix: ‘Ha du la, Daxlmarsixlgexr zzi gga ssi dil.’

Arbosobo ni leil azo bei lol mel halmaex gga ca ni leil bbeix gger var.’

¹¹ Nael hal zex yarzisael bbo a, ngo meixddur zze meixgie a, mia nr xie a. Ngo dax ca dae ca mel dder ngo leixrhher ddei leil gga dae a, Daxlmarsixlgexr zzi gga ddir a.

¹² Halmaex gga Yalnaxrnixryal mi ca ar ddei zza. Yar mel Moxrxi vaexr dae Lixlfaxr mel dax bei mae dae a, Arbosobo leil lei yarzisael ddarzzi ca ar ddei a. Halmaex gga goxr dae Yoxrtaexl su ca mel lei yar leil yarzisael i du. ¹³ Yar ngo leil i lei a, ngo dax ngier dae a bbeix: ‘Nimar Sarloxr, ni mia xie ho a!’ eine bbeix a. Halcar malmal ngo dder mia xie a, yar leil mia a.

¹⁴ Yar yoxl bbeix: ‘Niul porpor ddei Arbosobo ni leil tiur teixl lei a, yar xiar dae mel saexl lol, halae ni leil nixmox cirtaex-lorbba seir gaxzi su ca hal ddei leil mia lol, yar ddei qiurte bbejjiur lol. ¹⁵ Yel ni ha mia, ha bbejjiur mel dder ca maelmaerjjia leil biar gger ssi nia. ¹⁶ Eilboxl ni tor da-nr-wo hor. Nialngasael ha du la a, sexlsir nia. Yisu ddei mi ddei leil koxl dae a, ni ddei zuixl mel cir xia gger lol.’ ”

Barloxr Yoxrtaexl Su Nr Nga Ca Mel Leil Arbosobo Ddei Ddar Biar Gger Nia

¹⁷ “Giedae ngo Yiluxlsaler zzi gga jjixr a, Arbosobo ddei xi gga Arbosobo dax ddar biar car a, Arbosobo ngo leil meixcir ar ddei mia lol a.

¹⁸ Ngo Seirpor leil mia a, yar ngo dax ddar biar a bbeix: ‘Eilmaex gga ca mel ngo arseir a ni yaa leil biar gger a, yaa noni nr var, ni Yiluxlsaler zzi gga hher nr ddo, nialngasael ssi nia.’

¹⁹ Ngo dder ddarkoxl a bbeix: ‘Seirpor, halleix ngo Yoxrtaexl su mel Arbosobo ddei sulzzaggie cirddeir-hanga gga ssi a, ni leil ddarzzi su ca mel leil ssu ssi a, yaa leil deil goxr. Eil mel mel ca mel lei saexl. ²⁰ Halae Sitixrfaxr ni arseir a ca mel leil biar gger a, ca mel yar leil deil zil gger car lei, ngo halmaex gga ngier dax dae, ngo nixmox zzar lei yaa bei dae

mel sael a xiar dae. Ngo halae yar leil deil zil gger su ca hal mel ddei pia teixlsibbor mel vei gger dae.’

²¹ Nael Seirpor ngo leil bbeix: ‘Ni ssi nia, ngo ni leil miardal a vimir ggie Yoxrtaexl su nr nga ca mel dax ssi lol nia.’ ”

²² Ca mel Barloxr ddar biar ggie noni doxr dae a, nael yaa ddar eil qier bbejjiur a dder worcixl-worni ae dae a bbeix: “Ca eil yox leil mel mer woxrke goxr dae lol nr ddo, yar si mibbe!”

²³ Yaa mel sirzzi zildu a, ho ae ho teixlsibbor pia xiux piar pixl gger a, nilme xiu, eine bei. ²⁴ Meixr cirdu guaxr su ddei dder meixr mel leil miardal a Barloxr leil meixr hher ggie hier dil lol a, yar leil deil. Arsaenga a ca mel worcixl-worni ae saexl niazzir. ²⁵ Yaa yar leil neixl gex du lei a deil niazzir dae car a, Barloxr dder yar dax ngier naer dae meixr cirxiu guaxr su hal ddei leil bbeix: “Ngo mel Loxrmar su a. Caserggie vaervaerpor mel lei ngo zuixl zza bbeix nr goxr mel, nia dder ngo leil deil a hoxr hoxr?”

²⁶ Yar ddar eil mel bbejjiur a dder meixr cirdu guaxr su ddei dax ssi a bbeix: “Ca eil ddei mel Loxrmar su a bbe. Ni yar leil arsaе bei niazzir dae?”

²⁷ Meixr cirdu guaxr su ddei dder Barloxr leil biex lei a bbeix: “Ni ngo leil bbeix gger la, ni Loxrmar su nga nga?”

Barloxr bbeix: “Nga a mar.”

²⁸ Meixr cirdu guaxr su ddei yoxl bbeix: “Ngo zzirbae cirke ddux a saelnei Loxrmar su ca loxr.”

Nael Barloxr bbeix: “Ngo xiu teixl lei a dder Loxrmar su a.”

²⁹ Barloxr leil biex niazzir su ca mel dder yar dax naelnaer a nr hher a. Meixr cirdu guaxr su ddei lei yar Loxrmar su a saexl a, yoxl yar leil neixl du lei goxr a, gexr a.

Barloxr Yoxrtaexl Su Ca Ddei Vaervaerpor Mel Meixsaer Qier Leil Ddar

Biar

³⁰ Giedae cir ni, meixr cirdu guaxr su ddei Yoxrtaexl su ca mel arsaenga a Barloxr leil goxl saexl niazzir, yar dder Arbosobo leil zi su vaervaerpor mel nei Yoxrtaexl su ca ddei vaervaerpor mel leil yar dax ae mal lei a. Yar yoxl Barloxr leil neixl gex dae ddei pe piur gger a, hier teixl lei a yaa meixsaer qier leil ngier dae lol.

23

¹ Barloxr Yoxrtaexl su ca ddei vaervaerpor mel leil meix lei nr cix i dae a bbeix: “Arzzi-nimar, eilni zzezze lei ngo Arbosobo meixsaer qier leil mel azo bei lei armael dax duixlzuxlddo.” ² Arbosobo leil zi su vaer zzir Yalnaxrnixryal Barloxr dax ngier dae ca mel leil miardal a, yar meir ddei leil deil lol. ³ Barloxr yar leil bbeix: “Ni mel dder labbu zaelzae suaxr dae mel sael a nga. Yarqierbbaer i zae arnar, yarnix ddei nr zae. Arbosobo ni leil deil nia! Ni leil i dae a zrael halmaex cux dae a Moxrxi vaexr dae Lixlfaxr dax zox dae a ngo leil ser, nael ni Lixlfaxr dax bei nr mae, ca leil miardal a ngo leil deil!”

⁴ Yar dax ngier dae ca mel bbeix: “Ni Arbosobo leil zi su vaer zzir ddei leil hie vuxryixr a ngo?”

⁵ Barloxr yoxl bbeix: “Arzzi-nimar, yar Arbosobo leil zi su vaer zzir ddei a ngo i nr teixl lei a nga arnar a. Arbosobo Ddei Sul ber leil bbeix: ‘Nia cassor-worssor ddei vaervaerpor mel leil hie vuxryixr nr ddo, eine bbeix dae mel ngo saexl.’ ”

⁶ Barloxr mel halmaex hher dae ca mel cir peix a nael, Sardugie hal cir ddei ca; cir peix a nael, Farlixlsaexl hal cir ddei ca i teixl lei a dder Yoxrtaexl su ca ddei vaervaerpor mel dax worcixl-worni bbeix: “Arzzi-nimar, ngo mel Farlixlsaexl su ca a; ngo lei Farlixlsaexl su ca ddei ssormine a. Eilni ngo leil eilmaex ser a mel, ngo ca si ho a gol du xixl lei

var ddarzzi a nga arddeir a.”⁷⁻⁸ Sardugie ca mel mel, tisir zza, xiu zza, halae ca mel si ho a lei gol du xixl lei var ddar-nr-zzi; nael Farlixlsaexl ca mel zzael ddarzzi. Yel Barloxr ddar eil mel bbeix teixl a qie, Farlixlsaexl ca nei Sardugie ca mel zzi dax zex du lei a, ca mel dder nr cir bbe mal a.

⁹Ca mel ho zex ho wor vaer a, yel Arbosobo ddei sulsaelxu Farlixlsaexl ddei piar a gga ca ar mel a ngier du lei a worcixl-worni bbeix: “Nguia ca eil ddei arddolmaex bei nr hoxr zo teixl lei nr xie. Yar bbeix dae mel mel, azo lerler xiu bbeixsael tisir yar leil bbeix gger a boxllor.”

¹⁰Halcar a mel, ca mel zzi dax yarzisael zex larhor a, meixr cirdu guaxr su ddei ca mel Barloxr leil zix me gger leilei a gexr, yel dder meixr mel leil miardal a, Barloxr leil ca cili gga gga teixl lei a, meixr hher ggie hier dil lol.

¹¹Hal cir xixlmei, Seirpor mel Barloxr dax ngier dae a bbeix: “Gexr nr ssa. Ni Yiluxlsaler zzi gga ca mel leil zabbar seilseir a ngo arseir a biar gger mel sael a, Loxrmar zzi gga ca mel leil lei biar gger ssi nia.”

Barloxr Leil Bei Zil Gger Nia Zzibbe

¹²Giedae cirnehe, Yoxrtaexl su ca ar mel a cirgo a zzibbe dae a ddar bbeix har zaxr a bbeix: “Barloxr leil seixl zil nr gger hozze, nr zzor nr dda.”¹³ Cirgo a zzibbe su ca mel liceimo nr ci sael zza. ¹⁴Yaa Arbosobo leil zi su vaervaerpor mel nei ca leil guaxr su camar mel leil i lei a bbeix: “Nguia ddar bbeix har zaxr ho a; Barloxr leil seixl zil nr gger hozze mel, nguia dder azo lei nr zzor. ¹⁵Eilcar a, nia nei Yoxrtaexl su ca ddei vaervaerpor mel zabbar seilseir a Barloxr leil ser box sael a bei laexl dae a, meixr cirdu guaxr su vaervaerpor ddei leil qiuxr a Barloxr leil eilmaex hier mal lei lol. Nguia bei har zaxr dae ho a; yar eilmaex lei nr ci seir dder nguia yar leil seixl zil gger nia.”

¹⁶Nael Barloxr ddei ssorddu ddox mel yaa zzibbe dae ddar eil mel

bbejjiur a dder meixr hher ggie ddir a, Barloxr leil bbeix gger ssi.

¹⁷ Yel Barloxr dder meixr cirxiu guaxr su ar ddei leil qie si lei a bbeix: “Caleixlssor eil ddox leil hier dae a meixr cirdu guaxr su ddei dax hier mal gger ssi. Yar yar leil ddar bbeix gger ddu zza.” ¹⁸ Yel yar dder caleixlssor ddei leil hier dae a, meixr cirdu guaxr su ddei dax hier mal a bbeix: “Ge ji dae Barloxr ddei ngo leil qiuxr a, caleixlssor eil ddox leil ni dax hier mal lei lol. Yar ni leil ddar ar mel bbeix gger nia zzor.”

¹⁹ Meixr cirdu guaxr su ddei yar leixrhher ddei leil gga dae a, ar piar ssi naer a arjjiuljjiu arla yar leil biex a bbeix: “Ni ngo leil arddolyox ddar bbeix gger niazzir dae?”

²⁰ Yar bbeix: “Yoxrtaexl su ca ar mel a zzipbe har ho a. Yaa arggeni ni leil qiuxr a, Barloxr leil Yoxrtaexl su ca ddei vaervaerpor mel dax hier mal nia bbeix var. Yaa Barloxr leil zabbar seilseir a ddar biex sael a bei laexl var. ²¹ Yaa ca liceimo nr ci sael ae pex a, Barloxr leil neix dae lol ho a. Yaa ddar bbeix har zaxr goxr a, Barloxr leil seixl zil nr gger ho zze mel yaa dder nr zzor, nr dda. Eilcar a, yaa cirza-hanga lei bei har zaxr ho a; hherdder ni leil xia dae a ddarkoxl lol lalnga a. Yel ni yaa leil ddarkoxl nr ddo.”

²² Yel meixr cirdu guaxr su ddei dder caleixlssor ddei leil jjixr lol a, yar leil bbeix: “Ni ngo leil ddar eil mel bbeix gger goxr a, ca leil saexl lol nr ddo.”

Barloxr Leil Feilisi Vaervaerpor Dax Ho Mal Gger

²³ Yar dder meixr cirxiu guaxr su nnel ae si lei a, yaa leil miardal a bbeix: “Nia qihher ssi su meixr nrxiuler, mur zzaer su meixr sirceiler, altor darsisi vei su meixr nrxiuler zo har zaxr. Eilmei 9:00 nia Kaersarlixlyal zzi gga ssi nia. ²⁴ Nia halae Barloxr zzaer ddu mur lei nnel sael zo dax har dae nia, yel kebal ca mel yar leil nr ke lol, yar leil Loxrmr su ddei vaervaerpor Feilisi dax halmaex ho mal nia.”

²⁵ Meixr cirdu guaxr su ddei yoxl xil vaexr a bbeix:

²⁶ “Yarzi middux Feilils vaervaerpor, ngo mel Gexrlardiu-Lirsiyal a. Ngo ni leil zzasoso dae biex. ²⁷ Yoxrtaexl su ca mel ca eil ddei leil ssu gex dae a, seixl zil gger niazzir dae. Nael ngo yar Loxrmr su ca a saexl a dder meixr mel leil hier dae a, yar leil jiuxl teixl lei a.

²⁸ Ngo, ca mel arsaenga a yar leil goxl saexl niazzir a, yel yar leil Yoxrtaexl su ca ddei vaervaerpor mel dax hier mal. ²⁹ Nael ca mel yar leil goxl a mel, yaa zzicarzzi dax Moxrxi vaexr dae Lixlfaxr mel zex a nga arnar a. Yar loxrgier mibbe bbeixsael si mibbe, zuixl nr zza. ³⁰ Giedae ca ar ddei a Yoxrtaexl su ca mel yar leil seixl nia zzibbe har ho a, ngo leil bbeix gger a. Yel ngo dder nialngasael yar leil ni dax halmaex ho mal gger lei, halae yar leil goxl su ca mel leil miardal a, ni dax goxl lei lol,”

eine bbeix a.

³¹ Yel meixr mel dder yaa leil miardal dae mel sael a bei a, hal cir xixlmei dder Barloxr leil Atirpaxldir zzi gga ho mal a. ³² Giedae cir ni, mur zzaer su meixr mel Barloxr leil ho mal a; jjiumo ssi dae meixr mel nael, meixr hher ggie jjixr lei a. ³³ Yaa Kaersarlixlyal zzi gga ssi ci a dder xil fo nei Barloxr leil Feilils vaervaerpor ddei leil jia gger a.

³⁴ Vaervaerpor hal ddei xil fo i ho a, Barloxr leil arddol su ca a biex. Yar mel Barloxr Jilixljia mermi su ca a saexl a ³⁵ yel dder bbeix: “Ni leil goxl su ca mel lei ci a, ngo ni biar ggie zabbar arleixr noni nia,” eine bbeix a. Yar dder ca mel leil miardal a, Barloxr leil Silixl zzirmar hher ggie ge dae lol.

Yoxrtaexl Su Ca Mel Barloxr Leil Goxl

¹ Ngor ni goxr ho a, Arbosobo leil zi su vaer zzir Yalnaxrnixryal nei ca leil guaxr su camar ar mel halae lixfaxr saexl su Titurloxr yaa dder Kaersarlixlyal zzi gga lei a, Feililsi vaervaerpor ddei dax Barloxr leil goxl lei a. ² Barloxr leil gga teixl lei a, Titurloxr dder Barloxr leil goxl a bbeix:

“Ngua ddei vaervaerpor Feililsi, ni cirza-hanga lei yarzi guaxr naxrcixl, ngua nixixl goxr a zzi dax toltor a nga, zaxl-nr-ddaexr. Halleix ngua goxrjia nr seir zza mel lei, ni seirseir gier mal gger a.

³ Ni eine bei seir dae a mel, ngua arddolmaex hher dae lei, ni leil na-nr-wo arleixr nr zza. ⁴ Ngo ni leil seirseil-arcixl dawo doxr nr bel, nael ngo ni leil qiuxr, ngua leil ddar eil nr qier sael arleixr noni gger la. ⁵ Ca eil ddei mel yarzi gexrddo ar ddei a ngua i teixl lei a. Yar mel nogielno mel sael a, mer woxrke Yoxrtaexl su ca hanga leil bei luaxl jjia gger. Yar halae Naxrsalexl ca hal cir ddei oldde ar ddei a. ⁶ Yar Arbosobo ddei xi gga lei nrbbba bei niazzir, yel ngua dder yar leil ssu gex du lei a. Ngua armael ddei Lixlfaxr dax zox dae a, yar leil ser niazzir dae arddeir a. ⁷ [Nael meixr cirdu guaxr su Liurxiyal ddei lei a, ddoddo-nrddo yar leil ngua leixrga gga su si, halae ngua leil miardal a, ni dax eilmaex gga goxl lei lol.]ⁱ ⁸ Ni yar leil biex a dder ngua yar leil azo lerler goxl dae eil mel saexl var,”

eine bbeix a.

⁹ Halmaex gga hher dae Yoxrtaexl su ca maelmaerjjia lei yar leil bbeix gger a bbeix: “Titurloxr bbeix dae eil mel mel yarzi a.”

ⁱ**24:7** *Nael meixr cirdu guaxr su Liurxiyal ddei lei a, ddoddo-nrddo yar leil ngua leixrga gga su si, halae ngua leil miardal a, ni dax eilmaex gga goxl lei lol.* Arbosobo Ddei Sul cirberber a ddar eil qier nr zza.

Barloxr Armael Leil Ddar Bbeix Gger

¹⁰ Eilcar a malmal, vaervaerpor hal ddei Barloxr leil ddar bbeix lol. Barloxr dder bbeix: “Ni goxrjia eil ddei gga ca zae nr koxl sael ser ho a mel ngo saexl, yel ngo armael leil weix a ni dax ddar biar a, yarzi ggese. ¹¹ Ni ca leil arleixr biex a dder saexl a; ngo Yiluxlsaler zzi gga Arbosobo leil zi ssi cirdae a eilni ci a lei ceinir ni a nga seir. ¹² Yaa ngo leil Arbosobo ddei xi gga, Yoxrtaexl su mel Arbosobo ddei sulzzaggie gga, bbeixsael zzi gga hher dae a, ca mel dax zex ggie nei yaa leil co ggie lei mia nr goxr. ¹³ Yaa ngo leil goxl dae mel yarzi nga nga nr nga lei yaa bbeix teixl lei nr xie. ¹⁴ Yaa bbeix, Yisu mul gger dae mel nr hoxr. Nael ngo mel dder hal mel leil ddarzzi, ngo cexrssexl. Ngo halae ngo porpor ddei Arbosobo leil visser a, Moxrxi vaexr dae Lixlfaxr mel leil nei xiezi vaexr dae maelmaerjjia ddarzzi. ¹⁵ Ngo nga loxia dae mel yaa nga loxia dae mel dax ciryoxr a nga, hherdder Arbosobo mel ca seir bbeixsael nr seir leil lei gol du xixl lei lol. ¹⁶ Yel ngo arddolcar lei azo bei lei armael leil Arbosobo nei ca meixsaer qier leil bei hoxr hal mel bei a, armael leil botaddu nr zza lol.

¹⁷ Ngo Yiluxlsaler zzi gga nr hher mel zae nr koxl sael nga a. Ngo eilboxl jjixr lei a mel, ngo carbeix Yoxrtaexl su mel leil zzirbae gger jjixr lei nei Arbosobo leil zi jjixr lei arddeir a. ¹⁸ Yaa ngo leil mia car a, ngo Arbosobo ddei xi gga hher dae a, ggecir nei nixmox seibeix lol leiddur ddei bei ho a, Arbosobo leil zi niazzir dae a. Ngo ca mel leil lei ae nr pex, luaxl lei nr luaxl. ¹⁹ Nael halmaex gga mel Yalxilyal mermi lei Yoxrtaexl su ca nrnelsael hher dae. Yaa ngo leil goxl ddu zza arddeirnga a mel, ni meixsaer qier leil goxl lei nia. ²⁰ Zeixleixr nr ddo arddeirnga a, eilmaex hher dae ca mel leil ngo Yoxrtaexl su ca ddei vaervaerpor mel meixsaer qier leil ngier dae a, yaa ngo leil ser car a, azo zuixl zza zo wo a biar lol ddo. ²¹ Hherdder bbeix goxr zzorbbeixlei cir qier a bbeix goxr. Ngo ca

mel agala gga ngier dae a worcixl-worni ae dae a bbeix: ‘Eilni ngo eilmaex lei a, nia ngo leil ser a mel, ca mel si ho a gol du xixl lei var ddarzzi a nga arddeir a.’ ”

²² Yisu leil ddarzzi su ca mel arsae lerler nga a mel Feilisi mel saexl a, yel yar dder nr ser a, nor dae a yaa leil bbeix: “Ngo Lirsiyal meixr cirdu guaxr su leil xia dae a yar lei ci a saelnei nia leil ser.” ²³ Yel dder meixr cirxiu guaxr su ddei leil miardal a Barloxr leil su dae lol, halae yar leil guaxr lar-nr-hor lol, yar ddei gaxggor carbeix mel yar sser zoxr mel yar leil gger lei cexr lol.

Feilisi Vaervaerpor Barloxr Leil Loxrgier Doxr Dae Lol

²⁴ Nr ni sael goxr ho a, Feilisi nei yar maerssor Tursila yaa nnel cirgo a lei a. Tursila mel Yoxrtaexl su ca a. Yaa Barloxr leil ae si lei a, ca mel Yisu Zidu leil arsae lerler ddarzzi hal mel yaa leil biar gger lol. ²⁵ Barloxr mel arsae Arbosobo dax bei mae dae nia, armael leil guaxr ssei xie nia, halae arddolcar a Arbosobo ca leil ser lei nia eil mel biar. Feilisi dder gexr zildu a Barloxr leil bbeix: “Eilcar ni ssi ddo a. Ngo mael a ni leil ae a saelnei ni lei ssa.” ²⁶ Feilisi mel halae Barloxr leil yar leil zzirbae ho lol loxia a, yel zoxlzoxl a Barloxr leil ae si lei a, yar dax ddar biar.

²⁷ Nr koxl goxr ho a, Boqiur-Feisidu ca hal ddei mel Feilisi ddei dirtu vaervaerpor bei a. Nael Feilisi mel Yoxrtaexl su ca mel leil ggese lol niazzir a, halae Barloxr leil ge ji doxr dae.

25

Barloxr Loxrmar Zzirmar Dax Goxl Ssi Niazzir

¹ Feisidu halmaex lei ci a, vaervaerpor bei so ni goxr ho a, yar dder Kaersarlixlyal zzi gga cirdae a Yiluxlsaler zzi gga ssi a. ² Arbosobo leil zi su vaervaerpor mel nei Yoxrtaexl su ca ddei vaervaerpor mel dder yar

dax Barloxr leil goxl. ³ Yaa mel jjiimo car gga Barloxr leil kerseixl niazzir a, Feisidu leil qiuxr a, Barloxr leil Yiluxlsaler zzi gga hier mal lei lol.

⁴ Feisidu yaa leil ddarkoxl a bbeix: “Barloxr leil Kaersarlixlyal zzi gga ge dae; ngo lei cirleixr dder halmaex jjixr du a. ⁵ Yel nia vaervaerpor mel ngo dax cirter a Kaersarlixlyal zzi gga ssi ddo. Ca hal ddei azo lerler nr seir bei goxr arddeirnga a, yar leil goxl ddo.”

⁶ Feisidu mel halmaex heixl ni nr ci hher a dder, Kaersarlixlyal zzi gga jjixr a. Giedae cir ni, yar Barloxr leil hier si lei lol a, caserggie Barloxr leil ddar biex. ⁷ Barloxr lei ci a, Yiluxlsaler zzi gga lei Yoxrtaexl su ca mel dder Barloxr dax zaza-lili ngier dae a, yar leil cirza-hanga yarzi larhor cirke goxl a. Nael yaa goxl dae maelmaerjgia lei arseir lei malma mia nr goxr, ca mel lei ddarzzi nr var.

⁸ Yel Barloxr armael leil weix a ddar biar a bbeix: “Ngo Yoxrtaexl su ca ddei Lixlfaxr mel dax nr zox dae ar yoxr bei nr goxr; Arbosobo ddei xi leil lei nrba bbeix nr goxr; Loxrmar goxrjia ddei zzirmar ddei leil lei de dae nr goxr.”

⁹ Nael Feisidu mel Yoxrtaexl su ca mel leil ggese lol niazzir a, yel dder Barloxr leil biex a bbeix: “Ni Yiluxlsaler zzi gga ssi a, ngo leil halmaex gga yaa ni leil goxl dae mel ni leil ser lol yuex yuex?”

¹⁰ Barloxr bbeix: “Ngo eilcar a Loxrmar goxrjia zzirmar ddei ca leil ser ggie ngier dae a. Eilmaex mel dder ngo leil ser ggie nga a. Ngo Yoxrtaexl su ca mel leil azo nr seir bei nr goxr mel, ni lei saexl mar. ¹¹ Ngo nr seir bei a si nia zuixl zza arddeirnga a, si zzorbbeixlei ngo azo ddar bbeixddu nr zza. Nael yaa ngo leil goxl dae hal mel yarzi nr nga arddeirnga a, arseir lei ngo leil yaa leil jia gger nr cexr. Ngo Loxrmar goxrjia ddei zzirmar dax goxl ssi nia.”

¹² Feisidu nei yar leil beijjiu su ca mel arleixr zzibbe ho a, Barloxr leil bbeix: “Ni Loxrmar goxrjia ddei zzirmar dax goxl ssi niazzir dae a mel

dder yar dax halmaex ssi ddo a.”

Feisidu Zzirmar Yalzipaxl Dax Barloxr Leil Biar

¹³ Nr ni sael goxr ho a, zzirmar Yalzipaxl nei yar nimo Baernixrzi yaa nrrnel mel Kaersarlixlyal zzi gga lei ci a, Feisidu leil zzasoso dae biex lei.

¹⁴ Yaa halmaex nr ni sael hher a, Feisidu dder Barloxr arsae lerler nga zzirmar Yalzipaxl leil bbeix gger a bbeix: “Eilmaex gga mel Feililsil leixrga gga dder ge ji dae ca ar ddei zza. ¹⁵ Ngo Yiluxlsaler zzi gga hher dae car a, Arbosobo leil zi su vaervaerpor mel nei Yoxrtaexl su ca leil guaxr su camar mel yar leil ngo dax goxl a, ngo leil qiuxr a yar leil si nia zuixl dixl gger lol.

¹⁶ Ngo yaa leil bbeix gger a bbeix, Loxrmar su ca mel leiddur ddei dax zox a mel arseir nga zzorbbeixlei, si yar leil goxl dae ca hal ddei armael leil weix a ddar nr biar seir, yar nei yar leil goxl su ca ddei casersu dax ddar nr biar seir a mel, yar leil zuixl dixl gger nr ddo. ¹⁷ Nael yaa eilmaex lei ci ho a, ngo lei da-nr-wo lol a. Giedae cir ni dder caserggie ssi a, ca leil miardal a, Barloxr leil gga teixl lei lol a. ¹⁸ Yar leil goxl su mel dder ngier du lei a, yar leil goxl. Nael yaa goxl dae zuixl mel ngo xiar dae zuixl yarzi gexrddo hal yoxr nr nga bbe. ¹⁹ Yaa mel zzicarzzi dax armael Arbosobo leil arsae ddarzzi zex nei Yisu mi ca ar ddei leil zex. Yisu mel si ho a; nael Barloxr bbeix yar halae gol dae seir. ²⁰ Eil mel leil arsae ser nia ngo cirdoxr lei nr saexl a dder yar leil biex a bbeix: ‘Ni Yiluxlsaler zzi gga ssi a, ngo leil halmaex gga ni leil ser lol yuex yuex?’ ²¹ Nael Barloxr ngo leil qiuxr a, yar leil hher dae lol a, Loxrmar zzirmar ddei leil yar leil ser lol, eine bbeix. Ngo dder yar leil cageggie xia dae lol a, Loxrmar zzirmar dax halmaex gga ho mal gger.”

²² Zzirmar Yalzipaxl mel Feisidu leil bbeix: “Ngo armael lei ca eil ddei ddar bbeix ggje arleixr noni niazzir.” Feisidu bbeix: “Arggeni ni yar leil noni cexr.”

²³ Giedae cir ni, zzirmar Yalzipaxl nei Baernixrzi yaa nnel middar zzazzamo caserggie ddir lei a. Halae meixr cirdu guaxr su mel nei zzi gga midduxdduxmo vaervaerpor mel lei yaa dax cirter a ddir lei a. Feisidu ar qier miardal a qie, ca mel Barloxr leil gga dil lei a. ²⁴ Feisidu bbeix: “Zzirmar Yalzipaxl nei eilmaex gga hher dae ca maelmaerjjia, nia i ddo a! Ca eil ddei mel hherdder eilmaex hher dae nei Yiluxlsaler zzi gga hher dae Yoxrtaexl su ca mel ngo leil qiuxr a, worcixl-worni ae dae a, bei zil gger nia bbeix dae ca hal ddei nga a. ²⁵ Nael ngo yar azo si nia zuixl zza zo nr teixl lei. Yar bbeix, yar Loxrmar zzirmar dax goxl ssi nia, yel ngo yar leil halmaex ho mal gger nia xiar har a. ²⁶ Ca eil ddei leil bbeix ci a mel, ngo Loxrmar zzirmar leil azo xil vaexr gger ddu nr zza. Yel ngo dder yar leil nia meixsaer qier leil hier mal lei, zzirmar Yalzipaxl meixsaer qier leil gielgiel hier mal lei nia. Yel Barloxr leil biex lol ho a saelnei arsae lerler nga Loxrmar zzirmar leil vaexr gger cexr. ²⁷ Ngo zzir dae a, ca ge dae ddei leil kebal ho mal gger a mel, yar azo lerler bei cox a vaexr teixl lei nr xie a mel, ho mal gger nr hoxr.”

26

Zzirmar Yalzipaxl Meixsaer Qier Leil Barloxr Leil Ser

¹ Zzirmar Yalzipaxl Barloxr leil bbeix: “Ni armael leil weix a ddar biar ddo.” Barloxr dder leixrhher ddei cei teixl lei a ddar biar a bbeix:

² “Zzirmar Yalzipaxl, eilni ngo ni meixsaer qier leil armael leil weix a Yoxrtaexl su ca mel ngo leil goxl dae cirza-hanga mel ni dax biar wo ddo a, ngo yarzi ggese! ³ Yoxrtaexl su ca mel ddei leiddur nei yaa azo lerler zex mel ni saexl, ngo gielgiel yarzi ggese. Yel ngo ni leil qiuxr, ngo bbeix dae mel, ni zabbar noni gger dae la.

⁴ Ngo leil xiu teixl lei cirdae a, ngo ngo dax cir cuxr ca mel dax cirgo a hher, giedae sael Yiluxlsaler zzi gga hher ssi. Halleix tortor lei ngo

arsaesael arddeir a mel, Yoxrtaexl su ca mel nr saexl su nr zza.

⁵ Yoxrtaexl su ca mel mel halleix tortor dder ngo leiddur miur zzir, larhor zzir Farlixlsaexl su ca hal cir dax bei zza dae saexl. Yel yaa ni leil biar gger yuex arddeirnga a, ni dder ngo bbeix dae mel yarzi a saexl var.

⁶ Ngo Arbosobo ngua porpor mel dax bbeix har zaxr goxr mel li wo loxia, yel eilcar ngo eilmaex ngier dae a ngo leil ser lol. ⁷ Arbosobo ngua porpor mel dax bbeix har zaxr goxr eil ddei mel ngua ca ceinir cuxr maelmaerjia merxixl-merni Arbosobo leil zi a, bbeix zae gger a li wo loxia dae ddei nga a. Zzirmar, Yoxrtaexl su ca mel ngo leil goxl a mel hherdder ngo eil ddei leil li wo loxia a nga arddeir a. ⁸ Nia arsaenga a Arbosobo ca si ho leil gol du xixl lei lol var eil mel ddar-nr-zzi neil?

⁹ Halleix ngo zzir dae a Naxrsalexl kax gga su ca Yisu leil ddarzzi su ca mel leil yarzisael bixr nia. ¹⁰ Yel ngo lei Yiluxlsaler zzi gga hher dae a, eine bei goxr a. Ngo Arbosobo leil zi su vaervaerpor mel leil ngo leil quexrlixl gger lol a, Yisu leil ddarzzi su ca seirseil ar ke ssu si lei a, yaa leil ge du lei. Yaa leil seixl zil gger eine bei a mel, ngo lei ddarkoxl goxr a. ¹¹ Ngo halae Yoxrtaexl su mel Arbosobo ddei sulzzaggie cirmaex-hanga ssi a, yaa leil deil a, Yisu leil bbeix vuxryixr lol. Ngo halae yaa leil yarzisael sirzzi a, kebal su ca mel ddei zzi gga ssi a, yaa leil bixr ssi.”

Barloxr Armael Arsaе Seirpor Leil Ddarzzi Biar

¹² “Eine ar boxl a, Arbosobo leil zi su vaervaerpor mel ngo leil quexrlixl gger a, ngo leil miardal a, Daxlmarsixlgexr zzi gga ssi lol. ¹³ Zzirmar, zzocir zzor ji ho a, ngo jjiumo car gga ssi dae a, merlabbor ddei yarzisael bbo, bir merni leil lei bbo leixl ar zex a, ngo leil nei ngo dax mae dae ca mel leil zaza-lili zoxl gex dae a. ¹⁴ Yel ngua dder middur ddei leil puxr gex dae a, ngo Xiboxrlaexr ddar te dae qiurte ar ddei bbejjiur a bbeix: ‘Sarloxr, Sarloxr, ni arsaenga a ngo leil bixr? Ni ngo leil bixr a mel dder niur qihher ddei seirpor ddei zzargger teixvilvil ddei leil tiex ssi mel sael

a nga, armael ddei armael leil bei no lalnga.’

¹⁵ Yel ngo bbeix: ‘Seirpor, ni arseir a leir?’

Seirpor bbeix: ‘Ngo mel dder ni bixr dae Yisu ddei nga a. ¹⁶ Ni ha du la a ngier dae. Ngo ni leil mia lol a mel, ni leil miardal a ngo leil miar bei gger ssi lol, halae eilni ni mia cirza-hanga mel nei arddolcar a ngo ni leil azo lerler mia lol mel, ca leil bbeix gger ssi lol arddeir a. ¹⁷ Ngo halae ni leil Yoxrtaexl su ca nei Yoxrtaexl su nr nga ca mel leixrga gga jiuxl teixl lei nia. Ngo ni leil miardal a, yaa dax halmaex ssi lol a mel, ¹⁸ yaa meixddur ddei leil cirza-hanga lei i wo lol, neixmar ggie hher dae mel bbele ggie jjixr lei lol, neir zzirmar Sardaxl leixrga gga hher dae mel leil, Arbosobo dax jjixr lei lol. Yel yaa ngo leil ddarzzi a, yaa ddei zuixl mel ssoxrsuxl halae kebal ca mel dax bbe kae a, Arbosobo ddei cassor-worssor loxr a.’ ”

Barloxr Armael Azo Miar Bei Biar

¹⁹ “Yel zzirmar Yalzipaxl, ngo halleix Arbosobo ngo leil meixcir mia lol merhhexr dax lei hal mel dax bei mae dae. ²⁰ Ngo Daxlmarsixlgexr zzi gga xilmeir ssi; giedae nael Yiluxlsaler zzi nei Yoxrtaexl mermi cirmaex-hanga halae Yoxrtaexl su nr nga ca mel dax lei ssi a, yaa leil quex a huixrsoxr nia, Arbosobo leil ddarzzi nia, seirseir bei nia bbeix gger. ²¹ Ngo eine bei a, Yoxrtaexl su ca mel dder Arbosobo ddei xi gga ngo leil ssu gex dae a, seixl zil gger niazzir. ²² Nael Arbosobo ngo leil beijjiu a, eilni ci a lei ngo leil eilmaex ngier dae lol a, quexrlixl zza bbeixsael quexrlixl nr zza, vaervaer-yeye ca mel leil ngo mia goxr mel biar gger lol. Ngo biar dae mel mel hherdder xiezi mel nei Moxrxi yaa arddolcar a arsae lerler nga var bbeix har zaxr goxr mel lar nga. ²³ Yaa bbeix dae mel dder ca mel Arbosobo tiur har dae ca leil jiuxlsu ddei leil seixl zil gger nia, yar si ho a yoxl gol du xixl lei var. Yar mel gol du xixl lei beil zzir ddei nga a. Yar Yoxrtaexl su ca mel leil nei Yoxrtaexl su nr

nga ca mel leil Arbosobo ddei bbobbolbbo hherdder Arbosobo ca leil jiuxl biar gger.”

²⁴ Barloxr armael leil weix a ddar biar a, Feisidu dder worcixl-worni bbeix: “Barloxr, ni tae a. Ni sul zza miur a tae a.”

²⁵ Barloxr bbeix: “Yarzi middux vaervaerpor Feisidu, ngo nr tae. Ngo ngazi mel lar bbeix dae, nrbba nrbba nr bbeix. ²⁶ Eil mel mel zzirmar Yalzipaxl saexl, ker bei dae nr nga, yel ngo nixmox vaervaermo yar dax bbeix bel. ²⁷ Zzirmar Yalzipaxl, ni xiezi mel leil ddarzzizzi? Ngo saexl, ni ddarzzi.”

²⁸ Yar Barloxr leil bbeix: “Ni ddar eine nr qier sael bbeix a dder ngo leil quex a, Yisu leil ddarzzi lol niazzir dae a ngo?”

²⁹ Barloxr ddarkoxl a bbeix: “Ngo ni leil cirleixr a biar gger bbeixsael seirseil-arcixl biar gger zzorbbeixlei, ngo Arbosobo leil qiuxr a, ni nei eilni eilmaex noni dae maelmaerjgia lei ngo sael a Yisu leil ddarzzi lol niazzir. Ngo sael a hexsox zex nael tor nr ddexr.”

³⁰ Yel zzirmar Yalzipaxl, vaervaerpor Feisidu nei Baernixrzi halae kebal ca maelmaerjgia lei ngier du lei a. ³¹ Yaa ddux ho a dder zzicarzzi dax ddar biar a bbeix: “Ca eil ddei mel arddolyox si nia bbeixsael loxrgier nia zuixl nr bei.”

³² Zzirmar Yalzipaxl yoxl Feisidu dax bbeix: “Ca eil ddei Loxrmar zzirmar dax goxl ssi nia eine bbeix nr goxr arddeirnga bbaexl dder piur ddo a.”

27

Barloxr Cuaxr Cux Dae A, Loxrmar Ssi

¹ Feisidu ngua leil Loxrmar goxrjgia zzirmar ddei dax ho mal xiar har a, yel dder ngua leil cuaxr vaervaer ar jiaxl leil zzi ssi lol a, Yixldaxllixl

goxrjia^j ssi lol. Barloxr nei kebal ge ji dae ca mel leil meixr cirxiu guaxr su Yorliuxr leil jia gger a. Yar mel Loxrmar zzirmar ddei meixr yarzi middux hal cir gga ddei meixr arddeir a. ² Giedae ngua cuaxr ar jiaxl leil ddeix a. Cuaxr eil jiaxl mel Yaldaxlmirtixr zzi gga cirdae lei a, Yalxilyal mermi neixvi qier leil zzi mel dax za gel niazzir dae. Marcixrduixl mermi Tisarloxrnixrjia zzi gga su ca Yallirdaxrgur lei ngua dax cirgo a ssi. map of Paul's journey to Rome|Paul4-BW YCL.tif|span|Acts 27:1-28:14|SIL||

³ Giedae cir ni, Siduixl zzi gga ssi ci a. Yorliuxr dder Barloxr leil seir a, yar leil yar gaxggor carbeix mel dax ssi lol a, yar leil beijjiu lol. ⁴ Ngua yoxl halmaex gga cuaxr zzi dae a ssi a. Nael mersi ddei doxdoxsi jia yel ngua dder Saexlpurluxlsi dal hal taex dax naer dae mersi jiul gex dae piar a gga ssi a.^k ⁵ Ngua Jilixljia mermi nei Paxrfeililyal mermi neixvi qier leil ssi gel a dder Liurjia mermi ddei Meirla zzi gga ssi ci a. ⁶ Meixr cirxiu guaxr su ddei mel halmaex gga Yallixlsadaxl zzi gga lei a Yixldaxllixl goxrjia ssi cuaxr vaervaer ar jiaxl zo box wo a, yel ngua leil cuaxr hal jiaxl leil ddeix lol. ⁷ Cuaxr jiaxl mel ardoxr ssi pixr a, yarzi kae sol. Yel hormo ni nga a saelnei Gexrnixrtur zzi ddei deixrgoxr ssi ci. Halae mersi jia a, ssi nr cexr. Yel dder Kellirtexl dal hal taex dax naer ggie mersi jiul gex dae piar a gga Sarmoxrnixr mermi deixrgoxr ssi gel. ⁸ Ngua yoxl dal taex yarqier ddei caca ssi, hormo kae worcixl a saelnei Lasiyal zzi dax naer ggie Jia'al mi cuaxr nor ggie ssi ci.

⁹ Mersi vaer a, ngua leil dawo a. Ngua hormo ni nei ssi doxr a, nr zzor

^j**27:1** *Yixldaxllixl goxrjia* Yixldaxllixl goxrjia mel dder Loxrmar goxrjia gga hher ji dae, zoxlyoxl zzir goxrjia ddei nga a. Yixldaxllixl goxrjia ddei zzirmar mel dder Loxrmar goxrjia ddei zzirmar nga a.

^k**27:4** *Nael mersi ddei doxdoxsi jia yel ngua dder Saexlpurluxlsi dal hal taex dax naer dae mersi jiul gex dae piar a gga ssi a.* Yaa Saexlpurluxlsi dal taex ddei dofa piar a gga a baexrfa piar a gga ssi.

nr dda Arbosobo dax ddar biar nia jiax ddei lei goxr ho a.¹ Almer zae almer zae nr seir, zeixleixr cuaxr zzi a ssi arddeirnga a mel fa sol. Yel Barloxr dder ca mel leil quex a bbeix: ¹⁰ “Ggocar, ngo zzir dae a niul zeixleixr cuaxr zzi dae a ssi a mel, yarzi fa sol; zzaegu nei cuaxr jiaxl lar bei xiaxr var nr nga a nei, halae niul olga ddei lei yarzi fa sol,” eine bbeix a. ¹¹ Nael meixr cirxiu guaxr su ddei mel cuaxrkaesu nei cuaxr seirpor ddei ddar lar no, Barloxr bbeix dae mel leil no-nr-ni. ¹² Neixvi qier leil cuaxr nor ggie eil ddei dax zzixzi goxr a mel goxr nr seir. Cuaxr gga ca cirke a lei eine zzir dae a dder cuaxr kae dae a ssi a, Kellirtexl dal taex qier leil Feinixrzi zzi gga halmaex zzixzi goxr ssi niazzir dae. Feinixrzi zzi ddei mel Kellirtexl dal xifa piar a gga cuaxr nor ggie ar ddei a.

Neixvi Teixlleil Mersi Daxlgaxl Jia

¹³ Eilcar a mel, naxrfa piar a gga mersi yelyemo jia dae a, yaa zzir dae a ssi cexr a dder cuaxr nor a sser dae hal ddei gga du lei a, cuaxr jiaxl Kellirtexl dal taex dax naelnaer a kae dae a, ssi a. ¹⁴ Hormo arleixr nr goxr seir, dal taex dax dobaexr hal piar a gga mersi yarzi larhor jia gel lei a. ¹⁵ Cuaxr jiaxl leil mersi jia a, bei lei bei wor nr ddo, yel ngua dder cuaxr jiaxl leil mersi ddei caca arddol ssi dder arddol ssi dae lol lalnga a. ¹⁶ Cuaxr jiaxl Gadaxl mi dal ssor hal taex dax naxrfa piar a gga mersi zabbar nr vaer ggie kae mal a. Halmaex gga saelnei cuaxr ssor jiaxl cuaxr vaervaer jiaxl leil gga deix lei wor. ¹⁷ Ca mel cuaxr ssor jiaxl cuaxr vaervaer jiaxl leil gga deix ho a, yoxl baezo sser a cuaxr vaervaer jiaxl leil neixl gex du lei a. Nael yaa cuaxr jiaxl Saexl'aerdir ae mermi neixvi

¹**27:9** *nr zzor nr dda Arbosobo dax ddar biar nia jiax ddei lei goxr ho a* Jiax eil ddei mel Arbosobo Yirsaexllixl su ca mel ddei zuixl ssoxrsuxl nixixl. Loxlmoxr se zi halleix goxr.

ddei ggie sa mel gga haxl ji dae lei a gexr a dder cuaxr nor a sserlabox ddei neixvi gga piar ji gger. Yaa cuaxr jiaxl leil mersi ddei caca arddol ssi dder arddol ssi dae lol lalnga a. ¹⁸ Mersi ddei halae yarzisael vaer. Yel giedae cir ni yaa cuaxr jiaxl ddei zei si lei a gexr a dder cuaxr jiaxl gga zzaegu ar mel a neixvi gga piar ji gger a. ¹⁹ So ni cir ni ci a, yaa yoxl cuaxr jiaxl leil sser dae zzaegu mel lei neixvi gga piar ji gger a. ²⁰ Ngua merni nei gie lei mia nr goxr hormo ni nei nga a; mersi ddei zzael jia doxr dae, yel ngua dder si lalnga a zzir dae a.

²¹ Ca mel azo lei ardoxr zzor nr goxr hormo ni nei nga a, Barloxr dder yaa agala gga ngier ji dae a bbeix: “Nia neixrneixr dder ngo ddei ddar no a, Kellirtexl dal taex leil hher dae arddeirnga a mel, niul dder zzaegu eine ar zzu bei pixl nr var, eine ar zzu bei xiaxr nr var. ²² Nael eilcar a ngo nia leil quex, nia gexr nr ssa. Cuaxr jiaxl lar xiaxr var; nia ca cir ddei lei olga pixl nr var. ²³ Armei, ngo visser dae Arbosobo yar ddei tisir mel ngo dax ngier dae lol a bbeix: ²⁴ ‘Barloxr, ni gexr nr ssa. Ni arsae nga lei Loxrmar zzirmar meixsaer qier leil ngier dae nia. Arbosobo ni leil seir lol a, ni nei ni dax cirgo a cuaxr zzi su ca mel leil lei si lol nr var.’ ²⁵ Yel nia ca cirddeir-hanga lei gexr nr ssa. Ngo ddarzzi, Arbosobo ngo dax arsae bbeix goxr mel dder arsae nga var. ²⁶ Nael niul dal ar taex dax zuax gex ssi nia.”

²⁷ Ceili ni goxr ho a, eilmerxixl ci a, cuaxr jiaxl halae Yaldaexrliryal neixvi gga mersi ddei caca bu doxr dae seir. Merxixl-soxiu sael ci a, cuaxrkaesu mel cuaxr jiaxl hieltebbor ssi ci ddo jiur a zzir dae a. ²⁸ Yel dder baezo zex ajjix ddei gga piur ji a, arsae neixlneixl sael zza i. Xilmeir boxl nael, ceinir zaxl zza seir; giedae boxl nael, ge zaxl a zza a. ²⁹ Yaa legelbbe leil zuax gex dae lei a gexr, yel dder cuaxr nor a sser dae hal liller cuaxr maeldae piar a gga ajjix gga piar zei gger a. Yaa yarzi merteir loxia. ³⁰ Cuaxrkaesu mel cuaxr jiaxl gga pa teixl niazzir a, cuaxr

oldde piar a gga cuaxr nor a sser dae hal mel ajjix gga piar ji sael a bei laexl dae a dder, cuaxr ssor jiaxl ajjix gga dol ji gger a. ³¹ Barloxr dder meixr cirxiu guaxr su nei meixr mel dax bbeix: “Ha ca eil mel cuaxr jiaxl leil nr hher dae arddeirnga a, nia dder gol nr var a.” ³² Yel meixr mel dder cuaxr ssor jiaxl leil gga gex dae baezo mel taexl te gger a, cuaxr jiaxl leil bu du si lol a.

³³ Merteir niazzir dae a, Barloxr ca maelmaerjjia leil quex a almeixr zzor lol a bbeix: “Nia almeixr lei nr zzor ceili ni xia doxr a. ³⁴ Nia cirddeir-hanga lei olce lei bax ar ba pixl nr var. Ngo nia leil quex, almeixr zzor nia, eine nga a saelnei nia ggecir ddei zabbar zza dae var.” ³⁵ Barloxr ddar eil mel bbeix ho a dder aba vei si lei a, ca mel meixsaer qier leil Arbosobo leil nawo ho a dder ngaxl kae a zzor. ³⁶ Yaa lei nixmox ddei zzaso zeil lei a dder zzor a. ³⁷ Ngua cuaxr eil jiaxl leil zzi su ca maelmaerjjia a mel nrxiu sircei qiuxller zza. ³⁸ Yaa zzor bbox ho a, cuaxr jiaxl ardoxr la lol niazzir a, cuaxr gga so mel lei neixvi gga piar ji gger a.

Cuaxr Jiaxl Xiaxr

³⁹ Giedae merteir a, cuaxrkaesu mel lei nr saexl mi ddei ar maex ssi ci a; nael yaa neixvi qier leil cuaxr nor ggie ar maex mia a hieltebbor ddeix cexr. Yel dder cuaxr jiaxl halmaex gga kae dil niazzir. ⁴⁰ Yaa dder cuaxr jiaxl leil cuaxr nor a sser dae hal mel leil neixl gex dae baezo mel taexl te gger nei arddol piar a gga ssi boxrlabox ddei leil neixl gex dae baezo mel piur kae gger, yoxl cuaxr ggaxrsibbor mersi bbiurlabox mae co gga du lei a, cuaxr jiaxl leil mersi ddei caca hieltebbor piar a dax jia mal lol. ⁴¹ Nael cuaxr oldde ddei sa mel gga haxl ji dae a, ha nr var a. Cuaxr maeldae ddei piar a zzael bolaxl vaervaer ddaexr gel lei a, co xiaxr gger a.

⁴² Meixr mel ca ge dae mel ajjix gga tiuxl ji a pa du si lei a gexr a, yel yaa leil seixl zil gger niazzir dae. ⁴³ Nael meixr cirxiu guaxr su ddei mel Barloxr leil jiuxl niazzir a, yaa leil nrbbba nrbbba nr bei lol. Yar vixluxtaer

var su mel leil miardal a, ajjix gga tiuxl ji a, hieltebbor taer mal zaxr lol.

⁴⁴ Vixluxtaer nr var su ca mel nael barpir nei cuaxr jiaxl leil te teixl lei sixco mel sser a, hieltebbor ddeix. Eine nga a mel, ca maelmaerjia leil lei hieltebbor jiuxl deix wo a.

28

Mar'exrta Dal Hal Taex Leil Ssi Ci

¹ Ngua zzasoso arla hieltebbor ddeix ci ho a saelnei dal hal taex leil Mar'exrta mi saexl. ² Dal taex leil goxr dae ca mel ngua leil yarzi seir. Halcar a mel, almer lei dae a yarzisael zzix, yel ca mel dder ngua leil adoxl zi ga a, ngua leil hexl. ³ Barloxr mel six ar mel ggux si lei a, adoxl ddei gga zi ji a. Nael duxr zza sae ar te hher ji dax dae a, taxl no wor nr xie a, ddux lei a, Barloxr leixrhher ddei leil kexl gex dae a. ⁴ Dal taex leil goxr dae ca mel sae te yar leixrhher ddei leil kexl gex dae ggie mia a dder zzicarzzi dax bbeix: “Ca eil ddei caseixlsu ar ddei a. Yar leil neixvi gga jiuxl teixl lei a bbeixarnar, nael merhhexr halae yar leil gol lol nia-nr-zzir.” ⁵ Nael Barloxr mel sae te leil adoxl ddei gga veil ji gger a, yar armael leil cirdoxr lei bei nr no. ⁶ Dal taex leil goxr dae ca mel zzir dae a yar leixrhher ddei pexl du lei var bbeixsael yar neixleixrsael de ze i a si var, nael yaa arcixl i doxr a lei yar arsae lei nr nga a, yaa yoxl bbeix: “Ca eil ddei mel seirpormar ar ddei a.”

⁷ Bulbaerliuxr ddei ake ddei nei yar ddei mi mel eilmaex naer dae. Yar mel dal eil taex leil guaxr su a. Yar ngua leil hexl si a, yar ake yarzi goxr seir so ni goxr a. ⁸ Halcar a malmal, yarbbor ddei mel safaex nei xilbe xiu a, yixrgguci ddei leil yixr dae. Yel Barloxr dder ddir a, leixrhher ddei yar ggecir ddei leil ta gex dae a, Arbosobo dax ddar biar gger a, yar dder kor a. ⁹ Hane cirdae a, dal taex leil kebal no su mel lei lei a, yaa leil lei ggukor gger a. ¹⁰ Yaa ngua leil zzaegu cirke gger a. Ngua ssi du a yoxl

ngua sser zoxr zzaegu mel ngua cuaxr jiaxl leil ho deix gger lei.

Barloxr Loxrmar Ssi Ci

¹¹ Giedae so xiubbo goxr ho a, ngua yoxl Yallixlsadaxl zzi gga lei cuaxr ar jiaxl leil ddeix a ssi a. Cuaxr eil jiaxl leil mel Suasexrhal eine ae. Cuaxr eil jiaxl mel dal taex leil nor dae a, zzixzi goxr. ¹² Cuaxr jiaxl Xilagur zzi gga ssi ci a, ngua halmaex gga so ni nor a. ¹³ Yoxl halmaex gga cuaxr kae dae a, Lilziwo zzi gga lei ci a. Giedae cir ni, naxrfa piar a gga mersi jia mal lei a, yel ngua yarzi ssi yoxryixl, nr ni dder Buldiulixl zzi gga ssi ci a. ¹⁴ Ngua halmaex gga Yisu leil ddarzzi su ca ar mel pex dae a, yaa ngua leil qie a yaa dax sir ni hher a. Giedae ngua zeixleixr ssi a, ngua eine dder Loxrmar zzi gga ssi ci a. ¹⁵ Yisu leil ddarzzi su ca mel ngua Loxrmar zzi gga lei a bbejjiur a dder Yalbirwu zzi gga nei Saguaxr zzi gga cirdae lei a, ngua leil zi lei. Barloxr yaa leil mia a qie Arbosobo leil nawo a, nixmox ddei vaer du lei a. ¹⁶ Ngua Loxrmar zzi gga ssi ci ho a, Barloxr leil cageggie nr hher lol; yar leil meixr ar ddei su dae a, meixr ddei dax cirgo a, kebal ar maex hher dae lol.

Barloxr Loxrmar Zzi Gga Ca Leil Arbosobo Ddei Ddar Biar Gger

¹⁷ Giedae so ni goxr a, Barloxr dder Yoxrtaexl su ca ddei vaervaerpor mel leil qie si lei a, yaa leil bbeix: “Arzzi-nimar, ngo mel niul Yoxrtaexl su ca mel leil bei vuxr-nr-yixr halae niul porpor bbeix dae leiddur mel dax bei nr mae nr bei. Nael Yiluxlsaler zzi gga ngo leil dir su ca mel halae ngo leil ssu du lei a, yoxl Loxrmar su ca mel leixrga gga jia ji gger a. ¹⁸ Yaa ngo leil ser a, nael ngo leil azo si nia zuixl ar ddei ser teixl lei nr xie, yel ngo leil piur yuex. ¹⁹ Nael Yoxrtaexl su ca ddei vaervaerpor mel nr piur lol, yel ngo baxlfaxr nr zza a, niul goxrjia ca mel leil azo goxl ddu nr zza lei, ngo Loxrmar ddei zzirmar dax goxl lei a. ²⁰ Yel ngo nia dax arleixr biar nia. Ngo Yirsaexllixl su ca mel leil jiuxlsu Yisu ddei leil

ddarzzi a, leixrhher ddei leil hexsox neixl gex dae a.”

²¹Ca mel bbeix: “Ngua Yoxrtaexl mermi su ca mel ni leil arsae lerler biar dae xil mel vei wo nr goxr; halae ca mel ngua leil ni ddei azo lerler nr seir mel bbeix gger lei su nr zza. ²²Nael ngua saexl, ni ddarzzi dae Yisu ddei leil ddarzzi su ca mel mel cirmaex-hanga hher dae ca mel lei yaa leil dir, yel ngua ni bbeix ggie arleixr noni niazzir.”

²³Yaa dder Barloxr dax arddol cir ni yar dax ddar biar lei bbeix har zaxr dae, yel dder ca cirke a yar hher ggie lei a. Barloxr eilneixrnehe cirdae a eilmerxixl zzezze lei Arbosobo ddei goxr ddei ddar mel yaa leil zabbar seilseir a biar gger. Yar Moxrxi vaexr dae Lixlfaxr mel nei xiezi vaexr dae sul ber mel leil sser dae a yaa leil biar gger a, Yisu leil ddarzzi lol. ²⁴Yar biar dae ddar mel leil ddarzzi su lei zza, ddar-nr-zzi su lei zza. ²⁵Yaa zzicarzzi dax zex du lei a ssi du si a. Nael yaa ssi xilmeir leil, Barloxr yaa leil ddar ar qier bbeix gger a bbeix: “Arbosobo ddei Xiu ddei xiezi Yirsaexlyal leil sser dae a, nia ddei porpor mel dax bbeix goxr ddar mel cirdoxr lei bbeix nr cox. ²⁶Yar bbeix:

‘Ni ca eil mel leil bbeix gger ssi a bbeix:

“Nia bbe lei bbejjiur, nael noni wo nr xie,
mia lei mia, nael azo yilsi a nr saexl.”

²⁷Ca eil mel ddei nixmox taex mel yarzi gex,
nolba ddaexrcir dae,
meixddur mix gex dae.

Nr nga a mel, yaa meixddur lei mia xie,
nolba lei bbejjiur xie,
nixmox zzar lei saexl,
huixrsoxr a ngo yaa leil ggukor gger.”^m

^m28:27 Yirsaexlyal Sul 6:9-10 leil vaexr dae.

²⁸ Yel nia saexl nia, Arbosobo ca leil arsae jiuxl mel Yoxrtaexl su nr nga ca mel dax biar ci a. Yaa mel noni var.” ²⁹ [Barloxr ddar eil mel bbeix ho a, Yoxrtaexl su ca mel zzicarzzi dax yarzi larhor zex dae a ssi du si a.]ⁿ

³⁰ Barloxr armael zzirbae ddux a, ngolhher dae xi ddei gga nr koxl hher bbi a. Yar yar dax ha lei su ca maelmaerjjia leil lei hexl. ³¹ Yar nixmox vaervaermo Arbosobo ddei goxr ddei ca mel leil biar gger halae Seirpor Yisu Zidu ddei cirza-hanga mel lei ca mel leil biar gger. Arseir lei yar leil bbiur gex dae su nr zza.

ⁿ**28:29** *Barloxr ddar eil mel bbeix ho a, Yoxrtaexl su ca mel dder ssi du si a, yaa zzicarzzi dax yarzi larhor zex dae a ssi du si a.* Arbosobo Ddei Sul cirberber a ddar eil qier nr zza.